

Luka Deuxu Rybe Wihikỹ Tỹmyra, Luka Tyyritidỹdu

¹⁻³ Wyla, Teòfilo. Adee heka watyyriti ariwahinykre timybo Kristu rotỹnyre. Tuu lobixidu mahãdu tuu relyymyhỹre-ribi, jiarỹ ire ariòbitinytyhykre. Kia heka jiarỹ adee reritinytyhyre, waiòlò, iwese ibutumy reeryrenyrehu bededỹna-ribi. Aõma inatyhymy kia rotỹnymy rare wahe. ⁴ Kia wese wahe. Iwese iny adee relyyre wese, jiarỹ adee arelyyre inatyhymy aõbo rotỹnyre. ⁵ Zacaria heka Deuxu xiwe wahidỹdu rare, Abia ijojõ wahe. Iriòrese Isabeli tahe tule xiwe wahidỹdu riokore mahãduõ rare. Kiau heka Herodi judeu bedesỹ iòlòmy raremyhỹ, Araõ riokore mahãduõ wahe. ⁶ Wiwanale heka awirenyre Deuxuru-ò. Òbitihyy heka ratximyhỹrenyrehu ibutumy Deuxu bededỹnanako-ò. ⁷ Tiiboho iriòreõhyre. Ihãwyy Isabeli heka rasenadunyrehu, uladu herina dori awiõre. Ihãbu tule ramatuarinyre.

⁸ Aõutxumy tahe Zacaria raaõmysdỹnymyhỹre aõma templo-ki. Kiatxu heka iròtenatxumy bede rỹimyhỹre templo-ò. Tahe iwo-ki ratximyhỹre. ⁹ Hewydysi lỹnywi ritoonymyhỹ Deuxu kia deàlànamy, iwese riwinymyhỹrewesehyyle. ¹⁰ Iu ahana-ki tahe sõwemy iny rexitòenymyhỹ. ¹¹ Iu Zacaria xiwena ruwe-ribi loosòna-ò rỹireu, hewydysi lỹnywi ritoonymyhỹre. Tahe

aõwesele ÿjuõ rexitÿnynyre Zacariako-ò. ¹² Tii tuu robireu heka rexiraòmy ruberumy reare. ¹³ ÿju rarybere: —Brebuõmykre, Zacaria. Deuxu roholare aixitòedÿÿna-ò. Tai heka adee iyyymy rareri. Ahãwyy Isabeli rariòrenykre. Kai heka Joaõmy bininikre. ¹⁴ Tai kaiboho heka iura heka beysabenyke sõwemy; ijõ iny tule reysakre iòraru-ki. ¹⁵ Tii heka hãbutyhyhykÿmy rarekre Deuxu dee tiu heka vï riõõtyhy mona hàrihikÿ riõõtyhy. Deuxu Tyytybytyhy. Juaõtykymy ralokre tii reareu. ¹⁶ Sõwemy heka aõma Israeli mahãdu Deuxu rityhynykre iòraru-ki wahe. ¹⁷ Tii heka hãbutyhyhykÿmy rarekre Deuxu rybedumy Elia wesemy. Tii heka aõma Deuxu deòdÿÿna juhUU rehemynymy reakre ikòlemy iny ywisidÿÿnakre rehemynykre juhUU, aõma Deuxu Tyytybytyhy dehemynyna riijemy tuu rehemynymy rakre. Tii bede ywina riòbitinykre inyy-ki. Tyby tariòre-wana wii riwoxinykremy. Tii heka iny ribedeerynykre aõma òbitimy rÿirakremy. Deuxu luumy rÿirakre aõma ilahireny rÿira wesemy juhUU.

¹⁸ Zacaria rarybere ÿju-ò: —Jiarÿ ramatuarinyre timykre heka? Hãwyy tule rasenadunyre ihãrele òsana tukre. ¹⁹ ÿju rarybere: —Jiarÿ Gabrieli watxireri, Deuxu deòdutyhy wahe. Tii heka diwateònyde kaò adee rybemy wahe. ²⁰ Kai tetyhynyõhytyeri tai kai marybeòkre uladu reakre xiery tahe marybekre. Kaa adee rarybereri dori òbitimy rarybereri warybemynamy ibutumy rÿikre. ²¹ Iny riraòmy rÿimyhÿ Zacaria òlòna, tahe raroorehenymyhÿ. Iroorehena rieryõhyymyhÿreny. Dòhònydeu ta, rybe-ki

rexisiranymy rarybeõhyyre. ²² Tii rehemynyreu tamy rybeõhykyre rahòra. Idi tebò-di raramynyre urile rybe riwisõnymy rarybeõhykymyhÿre aõma timybo aõhebo rotÿÿnyrá heka riòbitinykemy heka rarybeõhyymyhe timyrabo. ²³ Tahe taaõmysÿdÿÿna rihudi, taheto-ò ròòsere ixyby.

²⁴ Idi tahe Isabeli rabòtònyre iruwyre ahādumy bedede riijere rexiwòmý. ²⁵ Isabeli rarybere: —Deuxu awi heka rare, riwatare waixÿruna-ribi. Kuladu wadeke riwahinyreri.

²⁶ Ijõ ahādu tahe Deuxu Gabrieli riteònyre Nazare hāwā-ò Kalileia bedede-ò. ²⁷ ÿjuõ heka rybe-di ijadòma-ò. Kia ijadòma heka wii ritobinymy rÿireri tybyboho iseboho Jyje-wana roikremy. Jyje heka iòlò Davi kia mahāduõ rare. Ijadòma tahe Marie inire. ²⁸ ÿju heka kiamy rarybere: —Beysakre Marie! Inynyryÿ heka awana ratxireri. Bedeòbyhykÿ adee kidiwahinykre. Tii arāwowydynyneri. ²⁹ Kia rybe-di tahe Marie rexiraykynyre. Tii rieryõmy aõmybo rare. ³⁰ Tahe ÿju tamy rarybere: —Marie, Brebuõmy! Deuxu teteysanyte. Kai awi heka rare. Tii aõwihikÿbo adee kidiwahinykre. ³¹ Kai heka mariòrekre, uladu heka Jesusimy raninikre. ³² Tii heka hābu nihikÿ rarekre. Tii Deuxu riòremy raninikre. Deuxu heka tii iòlòmý risÿnykre, iwese Davi alabiehekÿreny ronyre wese, tii ronykre. ³³ Tii heka ibutu Ijaò mahādu iòlòmý rarekre. Iòlòna heka tiu itueõtyhy. ³⁴ Tai tahe Marie ÿju-ò rarybere: —Jikarÿ heka ijadòkòmátyhy watxireri. Timykibohe krabòtònykre. ³⁵ Tahe ÿju rirawyònyre: —Tyytybytyhy adee kanalokre.

Deuxu ruru heka adee kanakre. Tai heka kia uladu Deuxu òbiti riòremy raninikre. ³⁶ Nohòti lusaõmy anymy-ribi Isabeli riki bòtòkõmy rareke-ribi tahe bòtòmý ratxireri. Debò sohoji reurò ahādumy iahādu. ³⁷ Deuxu dee heka tiu aõ isiraõre. ³⁸ Marie rarybera: —Jikarỹ Wahĩ dekòdu rare. Anomybo tarybeteri ka ibutumy rekyrubunyreri. Wadeke awire. Anowaxina tuukre irybemynamy karotỹkỹnykre. Idi ỹju rikõmy reare.

³⁹ Idi ta tii heka Isabeli roramy rare. Zacaria sỹmy Judeia bedede hāwālò hāwā bedeki. ⁴⁰ Iu Marie rehemynyreu tahe wii rirybenyrenyre: ⁴¹ Tiu kia aõbo uladu Isabeli kia-kia iule rexiwatxinymyhy Marie-ò. Isabeli heka tỹxiykỹle Deuxu Tyytybytyhy-di ratximyhy. ⁴² Riajuamy rare deysana-di sōwere: —Kai hāwyy ibutu-ribi deysana rarekre. Auladu tule deysana rarekre. ⁴³ Anoherekibo Wahĩse waroramy naderi. Jikarỹ ano anokõ rare. ⁴⁴ Adeke rahokujareku, kuladu wawoku-kia rexilòrelòrenymyhy tabedesa-di. Tai tahe Isabeli rỹraxyimy ratximyhyre Deuxu Tyytybytyhy-di. ⁴⁵ Kai bekysabenyke kia tetyhynyteki. Deuxu rybe dokuri adeke nade. Iwese tiki raryberewesele ibutumy rāikre. ⁴⁶ Marie rarybere: —Jikarỹ wawoku-ribi Wahĩ rewokuwydynyre. ⁴⁷ Wawokuribityhy wadekysareri Wahĩ watarasadu dokuri rare. ⁴⁸ Ihyky tahe tiki tekòdu-ribi walanokonakona-ribi tōhòti rosakre. Tahe iny ibutumy hāwyky dekysanamy riwaninikre. ⁴⁹ Deuxu dokuri anomydỹkỹnana wiwihikỹ wadeke riwahinyre. Tii tahe ityhy rare.

⁵⁰ Tikiemy inydeke ruxetòena riwahinymyhÿre iny tamy wowydyndyna riwahinyreki.

⁵¹ Ixityhy nohõtidu mahādu tiki rehure. ⁵² Bede ikòlò sōwemy tiki rehure. Tule iny ianokō mahādu Deuxu riwikòhenanymyhÿre.

⁵³ Rama risamahādu deke rÿsÿna tiki riwahinyre.

⁵⁴ Irybe tahe tiki rityhinyre anobo tiki inytybyreny deke tiki raryberemy. Tikiboho tahe Deuxu riwikòhenanyre. ⁵⁵ Ruxetòena tahe Abraō deke riwahinyre tule tikiemy iriokore deke riwahinymyhÿre.

⁵⁶ Marie tahe inataō ahādu Isabeli-wana riwyrā. Idi tahe tasÿ-ò ròōsera.

⁵⁷ Bededÿÿnana Isabeli-ò rehemynyre. Iriòre reakremy ratxireriu, Iriòre reare. ⁵⁸ Isÿ mahādu heka teysana-ò roholareninyre, iery mahādu tule rabedesareninyre tamy Inynyryÿ raruxetòenyredi, Inynyryÿreny ruxetòena tamy riwahinyreki. ⁵⁹ Tahe debò inataō txu-di, uladu notyky resynamy bede rÿire. Zacaria raninykemyre. ⁶⁰ Tai tahe ise rarybere: —Anokōre, Joaōmy rarekre. ⁶¹ Isÿ mahādu rarybere: —Joaōmy ninadu taheka ijōkōhykyre inysÿreny-ki. Anoherekibo tuukre? tai tuu raninike wahe. ⁶² Tuu Zacaria-ò rÿÿraxireny: —Momybo raninykre? ⁶³ Tahe Zacaria tababese riòreō rimyre. Riritinyra kia: —Joaō heka inikre. Tahe ijō mahādu ibutumy ribedeòtiidÿÿnyre. ⁶⁴ Iu tahe Zacaria rarybere Deuxu riwowydynyre. Tahe ibutumy isÿ mahādu heka ruberure. ⁶⁵ Ibutumy heka tii relyymy raremyhÿ Judeia mahādu hāwālò nihikÿmy. ⁶⁶ Ibutumy tamy roholaré heka raryberenyre: —Timybo uladu rarekre? Inynyryÿ idi

tarukimy iweribikre.

⁶⁷ Tahe Deuxu Tyytybytyhy heka Zacari-
atykymy ralore. Tahe Deuxu aõmydỹỹnanamyhe
relyyre timybo rabededỹỹnananykremy. Tii
rarybere:

⁶⁸ —Judeu mahãdu Deuxu awi rare. Tii dori taijoi
roramy nade.

⁶⁹ Iwiòhedỹỹmy tulemy tarasadu tyhy Tii heka Iòlò
Davi mahãduy rare. ⁷⁰ Deuxu Rybedỹỹdu mahãdu
kia wesemy tuu raryberenyre.

⁷¹ Inydireny òludu mahãdureny-ribi riki iny
ritarenkyre. Iny-di heka raruxetòereny.

⁷² Tahe iny-ribi tōhõtireny rosaõhykyra. Tahe
rarybekre timybo raryberemy inytybyrenymy.
⁷³⁻⁷⁵ Tii heka iny ritarenkykemy inydireny ratxireri
inyòludureny-ribi. Kia-ò heka rarybere inyla-
biereny Abraõ-ò. Tai heka rikiwiòhenanyrenyke
brebuõlemy. Òbitimy iko-ò rakatxirenyhykyre.

⁷⁶ Kai wariòre Deuxu rybedumy mabekre. Kai
heka mabekre Deuxuhukỹ rybemy rybedumy.
Kai heka bōhònykre

Inynyryỹ-kò iry biywinykremy.

⁷⁷ Asỹ mahãdu-ò marybekre biu-ò hena
kanakremy ihyre. Deuxu heka tōhōti rosakre
iòrarunaren-y-ribi. ⁷⁸ Iny Deuxureny dori
inydeereny ruxetòedu rare. Tii heka biu-ò hena
ibutu-ò kidiōkre, tarasana wahe.

⁷⁹ Kia bedelurumy rỹira mahãdu biuloosònamy
robikre.

Zacaria rybe tahe rikonananyre. Loosòna
ywinary-ò tahe ritỹnynykre.

⁸⁰ Ihewo-ribi tahe uladu ratybienyre taumy-di Deuxu tyhydŷŷna-ki tule. Tii heka bederahy-ki raremyhŷ. Tiutxumy rexitŷnynykremy judeu mahādu-ò.

2

¹ Kia mahādu iòlò Augusto inire. Kia heka ibutumy bedeki inyni rityyritinykemy bedeki riywinyre. ² Kurina heka Siria bedeki dinodu rare. ³⁻⁴ Jyje heka Nazare hāwā-ki rasŷnyny raremyhŷ. Tai tahe Kalileia bedeki ribi tiiboho roirenykemy Judeia bedeki-ò. Iòlò Davi dori tai reare, Belē hāwā-ki. ⁵ Jyje tahe rare, tii dori Davi ijoimy rareki. Marie bōtōmy tii ridyre tai ihāwyy. ⁶ Tahe Belē hāwā-ò rehemynyre. Tahe herina roxina heto ihoōre herina tamyreny. Taihe awaru roxina heto-ò roire. ⁷ Tai hāwyy ratohouāsenyre. Idi rihetyntyre awaru roxina hynaro-ò ritidikemy.

⁸ Iu tahe budoeni-di itxeredu mahādu bedero-ki ratximyhŷreny. ⁹ Idi tahe ŷjuō tamy nade Deuxu-ribi. Deuxu loosōna tamy rityntyre. Ruberurenyre. ¹⁰ ŷju tamy rarybere: —Brebuōmyrenyke. Rybe wihikŷ-di adee rehemynyreny. Ibutumy iny reysakre ka rybe-di. ¹¹ Atarasadu heka ratohouānyra Davi hāwā-ki, abiu-ò hedu wahe. Tii heka Kristu rare, Inynyryŷreny wahe. ¹² Kaiboho heka awaru roxinaō-ò inihe bōike itxeremy. Tai heka tohouā roireri tyy-di rarahananymy. ¹³ Iule tahe sōwemy ŷju widotyde Deuxu dee rawiunykremy, kiawese rawiunynyrenyre riwowydynyrenymy:

¹⁴ —Biu-ki Deuxu loosōna ratxihiymyhŷre.

¹⁵ Tahe ŷju ròðserenyre biu-ò. Budoeni-di itxeredu mahãdu wídee raryberenyre. Wylemy Belê-ò ròkòirenykre itxeremy kia aõmydŷŷnanamy Deuxu inydee riteòsinyrerìò. ¹⁶ Tahe roirenyre idi tahe Marie, Jyje-txi rekoarenyre. Tuu robirenyre. Tahe broreni dòròtòhòhyna-ki uladu roire. ¹⁷ Tai tahe budoeni-di itxeredu mahãdu timybo ŷju tamy raryberamy, rarybere. ¹⁸ Tai tahe ibutumy kia tamy roholaré ribedeòtiinymy rŷire. ¹⁹ Marie heka tòhòti itxi reare. Tahe sòwemy raraykywydynany ronyre. ²⁰ Budoeni-di itxeredu mahãdu ròðserenyre rawiunyrenymy Deuxu-ò Deuxumy reàlàre ibutu òraru-ki. Iwese ŷju raryberewesetyhyle heka ibutumy rŷire.

²¹ Iribi tahe txu rŷireu tahe rare Jesuisi notyky orokré. Debò inataõ reurotxu rŷireu Jesuisi notyky raorokremy raywire. Tahe rininirenyre Jesuisimy iwese ŷju rarybere myna.

²² Xiwena rŷikemy bede rŷire Moisesi bede ywidŷŷnamyna. Aõutxumy tahe dehemynde Marie Jyje-wana kia idi riwinyrenykemy. Tahe Jyje ridykemy Jerusalê-ò idi ratxireri. Tai uladu-di roirenyre Deuxu-ò riteòsinykemy. ²³ Kiamy heka Inynyryŷ Ritidŷŷna-ki roire.

Weryrykeki, Deuxu dee rawahidŷŷkre. Tii uladudela weryrykreki.

²⁴ Iwese tule bòtòe inatximy rawahidŷŷkre ada bòtòerurà inatxi heka xiwenamy reakre Moisesi bede ywidŷŷna myna.

²⁵ Hãbuõ tai ratximyhŷre Simeaõ inire. Jerusalê hãwãdu wahe. Deuxu rityhynymyhŷre hãbuwi rare. Tii Kristu riraòmyhŷre Deuxu deòdŷŷna

wahe. Iijoi aõbina bina-ribi tarasadumy Deuxu Tyytybytyhy heka tai ratximyhÿre. ²⁶ Deuxu Tyytyby ihetxiu tamy rarybere: —Kai buruõtyhy Deuxu deòdÿÿnamy bobiõdi. ²⁷ Iu Jesusise tyby-wana rehemynyreu Deuxu Tyytybytyhy heka Simeaõ riteònyre kowa-ò. ²⁸ Simeaõ uladu taãxiò-ki rimyreu. Tahe Deuxu riwowydnyre:

²⁹⁻³¹ —Kiamy heka Wanyrÿ Iòlò arybe retyhynyre timybo tarybete wahe. Ibutumy dorihe tewinyta. Tahe aõwaxinyhe arurukre. Abiuòhenamy heka rabira. Tii ibutu iny tarasadumy rarekre biu-ò hena wahidÿÿdu wahe.

³² Kia heka ibutumy iny-ò loosòna tewahinyta judeukõdu mahãdu-ò. Tai judeu mahãdu tahe wowydnamy tii rarekre.

³³ Tai tahe Jyje Marie-wana bedè riòtiinyre aõmybo rarybereki. ³⁴ Simeaõ tahe Deuxu deysanamy tamyreny rarybere: —Deuxu biu-ò henamy heka kia uladu rare. Sõwemy judeu mahãdu tarasadumy rarekre, tule sõwemy tasÿ ituekre. Kia heka Deuxu deòsina rare. Sõwemy heka Jesusimy rakyararybenynykre. ³⁵ Ibutumy iny rayky-ribi heka ibutumy ritÿnynykre. Bederyry sõwemy bieryke tai aõhòkÿmy botÿÿnykre.

³⁶ Tule Deuxu rybe erydÿÿnaõ rehemynyre. Ana inire. Hãwy rare. Tii heka Fanueli riòre rare. Asere mahãdusÿõ rare. Tii heka rasenadunymy raremyhÿ. Ijadòmamy raremyhÿu heka roire hãbu-wana. Debò inatxi reurò beòralemy heka tii-wana raremyhÿ tahe tii rawytesenyre. ³⁷ Tii 84 beòramy heka bedè idi rÿire wytesemy. Tii Deuxu dohodÿÿna heto-ribi ròhònyõhyymyhÿre. Tii heka

rexitòdenymyhÿre rumy txumy tabyreõ-di. ³⁸ Tahe tii rehemynyre Deuxu dohodÿÿna heto-ò. Deuxumy reàlàre. Idi Jesusimy imahãdu-ò rarybere tii tarasadumy rarekremy.

³⁹ Iu Marie, Jyje-wana ibutumy bedeywidÿÿnamy ituereu, riòòserenyre tahãwã-ò Nazare-ò. ⁴⁰ Jesuisi raumynymyhÿre beòra beòramy. Iruru, ibede eryna sòwemy ijòdire Deuxu dori idi tarukimyhÿre.

⁴¹ Pascoa worana bedehesi riòlòdÿÿnyre Jerusalẽ hãwã-ki. Jesuisi tyby heka iseboho roihyymyhÿrenyre tamy. ⁴² Tule Jesuisi waòinatxi reurò beòra-di ridyrenyre tamy. ⁴³ Worana bedehesi rexihureu kidiòkesedenykremy doide. Tahe Jesuisi naride Jerusalẽkihikÿle. Tiiboho rieryrenyõhyyre naridemy. ⁴⁴⁻⁴⁶ Taijoirenywanale ratxirerilemy idi ròhòtinyrenyra. Txusohojimy heka bede idi rÿidi, rierenyre. Tai rahaõhyyrenyra iijesemy diòkesedenyde Jerusalẽ-ò ixyby. Inataõ txu-di tahe tai nahadenyde, Deuxu dohodÿÿna hetowo-ki wahe. Tii heka bede erydÿÿdu mahãdu-wana ronyre. Roholamymhÿrenyre irybe-ò ronymyhÿreny. Tule rÿÿraximyhÿrenyre. ⁴⁷ Tii heka ibutumy rirawyònymyhÿre. Tii dori bede ery nihikÿ rare. ⁴⁸ Iseboho tahe bede riòtiinyrenyre tai ronyreki wahe. Ise tamy rarybere: — Waritxòre, anoherekibo kai ikykyreny-ki tanyte. Anoherekibo tuu wadakereny tewinyteri aijesereny-di watxireri. ⁴⁹ Tahe Jesuisi rirawyònyre: —Waijeserenykõmyke. Waha heto-ki watxireri, Waha aõmysÿdÿÿnamy reywinyhyy watxireri. Kia aõbo teeryõhyytenyte. ⁵⁰ Tiiboho

rieryrenyõhyyre aõmybo Jesuisi rarybereri. ⁵¹ Idi tahe dòòsedenyde Nazare-ò. Tahe Jesuisi tyby rybe rityhynyhyymy raremyhỹ. Tahe Jesuisise kia ibutumy riyrubunyhyymy raremyhỹ tarayky-ki.

⁵² Jesuisi tahe raumynyre. Bede erytyhymy relere. Ibutumy he iny iluure. Deuxu wowy-dyna-di ihỹre.

3

¹ Tiberiò heka waiyre beòramy iòlòmý raremyhỹ. Poncio Pilato heka Judeia bedede dinodu. Ijõ heka Herodi inire. Inataõ inymy heka bedede dinodumy raremy. Herodi heka Kalileia bedede dinodu. Iseriòre, Filipi tahe Itureia bedede, Traconite bedede-wana dinodu rare. Ijõ iny tahe Lisỹnia inire. Tii Abileni bedede dinodu rare. ² Anasi, Kaifa-wana heka inatxi hãbu roire. Tiiboho wiwana xiwena wahidỹỹdu wedu raremyhỹ. Kia bedeu heka Joaõ rehemynyre bedero-txi. Tii iny-ò Deuxu rybe tỹnydỹỹdu rare. Zacaria riòre rare. ³ Tii kia bedede ibutumy rybe ritỹnyynyre, Jordaõ beroweramy ibutumy wahe. Kia wesemy rarybere: —Aòraru-ribi bòhònyke. Maratisebenyke. Tahe Deuxu aòraru riixãwididỹỹnykre. ⁴ Iwese Isaia ròritidỹỹre wesemy heka wiji rỹire.

Inyõ heka ryrymyhỹ bedero-ki.

Kia:

—Inynyry bexiywinybenyke. Ryòbitihikỹ biwinybenyke. Hãloo bitỹxinybenyke wimyny biijaranybenyke. Iry iòweòwena ramyhỹre heka, biòbitinybenyke.

5 Iratòratòkeki, wimyna biijaranybenyke.

6 Ibutumy iny heka Deuxu biu-ò henamy ro-birenykre. 7 Sõwemy iny nade riratisebenykre my Joaõ-ò. Tahe tii tamyreny rarybere:

—Kaiboho hemylalaweselemy toite. Deuxu ykarana-ribi bexitabenyke, aõwiwihikỹ.

8 Uritere kawese ryberenyõmykre: —Abraõ dori iny labiereny rare. Tai tahe ibutumy aw-ityhy rare inydeereny.

Jiarỹ dori adeereny ararybekre: —Deuxudeewikeki, Tii kia manadile iny riwinyke. Abraõ dee ijõ riòreõmy kia manadile riwinyke.

9 Woma heka òwòruraruti riòròmyhỹre. Kia raratynyõkeki heka, raòròkre. Heòty-di wõmy ririradỹnymyhỹke. 10 Tai tahe iny rỹraxyre Joaõ-ò:

—Timybohe rakatxirenykre. 11 Tai tahe rarybere:

—Inyõ tõre inatximy ijõdikeki, sohoji iny ijõ-ò riwahinyke. Irỹsỹnadikeki, tule ritxuatxuake ijõkõ mahãdu-ò. 12 Iny witxiraõ Joaõ-ò rehemynyre. Tiiboho nieru tarasadu mahãdu rare bededodu-ò. Tai rỹraxyreny: —Timybo aõhebo rokotỹnyrenykre. 13 Joaõ rirawyõnyre: —

Uritere aõnihikỹmy itarasarenyõmykre. Bede ywidỹna tyyriti myna ta tuukre. 14 Tai tahe soldado tamy rỹraxyre: —Inyboho tahe aõhebo rokotỹnyrenykre. Joaõ rirawyõnyre: —Inyõ biteranyõtyhy adee nieru kanakemy. Inieru dori ahõrõ aõkõ rare. Beysake, adinodu-ribi tiwesebo nieru tetamahãte-di. 15 Tahe kia iny mahãdu raraykynyre Joaõ-di. Kowa aõbo hãbu Kristu ihỹre. 16 Tai heka Joaõ rarybere: —Jiarỹ heka bedi araratisebenyreri. Ijõ wahewo-ribi kanakre tahe woratyre inihikỹ rarekre. Tii heka

awityhy rare. Jiarỹ heka raixỹruwãhãre iwataana aritake lau. Tii heka akanaratisebenykre Deuxu Tyytybytyhy-di. Heòty-di tule wahe. ¹⁷ Iti tebò-ki ratxireri. Maixõmo ruxity hitxina-di wahe. Tii heka ritakre. Maixõmo riyrubunykre ihyna-ò. Iruixityy tahe ritoonykre. Kia heòty heka tiu ruriòtyhy. ¹⁸ Aõ heka Joaõ rarybere. Sõwemy aõna aõnamy iwesele rarekemy. Dohodỹỹna wihikỹ-di tamyreny rarybera. ¹⁹ Bede dinodu Herodi heka taseriòre riòrese-wana roire. Aõbina binahakỹle riwinyre kia. Tai tahe Joaõ tamy rarybere: —Kia awi aõkõ rare. Ibina heka rare. Sõwemy aõna aõna bina tule tii riwinyre. ²⁰ Tai Herodi heka Joaõ mynomy riteranyre ròtenawo-ki roikemy. ²¹ Joaõ ixiwesehyyle rexitỹmyranomy iny riratisebenyre. Tahe tule iny witxirahe-ki Jesuisi riratisebenyre, Jesuisi rexitòenyreu, biuwetyhy rarayre. ²² Biuwetyky-ribi tahe Deuxu Tyytybytyhytle dobehemy nade bòtòerurà wesemy. Biu-ribi rybeò-ò iny roholare: —Kai heka Wariòre tate. Aluure heka jiarỹ wadeysatyhyre. ²³ Jesuisi 30 beòramy raremy taaõmysỹdỹỹna tyhy ritelenyreu, iny heka Jyje riòrelemy rōhōtinymyhỹre. ²⁴ Jyje heka Eli riòre rare. Matate, Levi, Maki, Janai, Jyje, ibutumy labiehekỹ Jyje rare. ²⁵ Ijõ tahe Matatias, Amos, Naum, Esli, Nagai, ²⁶ Maate, Matatias, Semei, Jyje, Joda, ²⁷ Joana, Resa, Zorobabe, Salatieli, Neri, ²⁸ Meki, Adi, Cosã, Elmadaõ, Er, ²⁹ Josue, Eliézer, Jorim, Matate, Levi, ³⁰ Simeaõ, Juda, Jyje, Jona, Eliaki, ³¹ Melea, Mena, Matata, Natã, Davi, ³² Ijese, Obede, Boasi, Sala, Nasaõ. ³³ Aminadabe, Adimim,

Arini, Esraõ, Peresi, Juda. ³⁴ Ijaò, Ijai, Abraõ, Tera, Nakò, ³⁵ Serui, Raau, Faleki, Eber, Sala, ³⁶ Aina, Arfaxade, Sem, Noe, Lamei, ³⁷ Metusalê, Enoi, Jarete, Maleleel, Aina, ³⁸ Enosi, Sete, Adaõ. Tii tahe Deuxu juhuu riwinyre iriõre wese.

4

¹ Bero Jordaõ-ribi Deuxu Tyytybytyhy heka Jesuisi diòòsedỹỹnyde Tai heka tule bederò-ò rexiykynyra. ² Tahe Satanasi Jesuisi riurihire, 40 txu-di wahe. Aõ heka rirỹsỹõhyre Jesuisi kia itxumy txu rỹireu wahe. Idi tahe sõwemy rama risare. ³ Satanasi tamy rarybere: —Kai Deuxu Riòretyhy tate-wana heka, mana bitxienykre hinamy. ⁴ Tai Jesuisi dirawyònyde: —Deuxu Rybe tule kiamy rarybere.

—Hãbu hewa byre sohojiribile aõkõ irumy rỹimyhỹre.

⁵ Tai Satanasi heka Jesuisi ridyre heto ratyti tyre. Ibutumy hãwãhãkỹ riteòsinyre bedede rỹirá.

⁶ Tahe Jesuisi-ò rarybere: —Kai biwalàhànanykeki, ibutumy aõna aõna adee ariwahinykre, ibutumy hãwãhãkỹ dinodumy tule wahe. ⁷ Wahõrõ heka rare. Inyõ-ò aõtxile ariwahinykre. ⁸ Idi tahe Jesuisi dirawyònyde: —Deuxu-ò sohojile walàhàna biwahinykre. Kiamy Deuxu Rybe rarybere. ⁹ Idi Satanasi Jesuisi ridyre Jerusalê hãwã-ò. Biu-txi tahe rỹire, Deuxu dohodỹỹna heto tyre-ki wahe. Tii narybede, kai Deuxu Riòre tyhy tate wana heka bexiwatxitxinyke inihe karibi hetoratyti-ribi.

¹⁰ Ỹju riki arayrubunykre wa. Deuxu taỹjuõ bedede riywinyre aramykemy. ¹¹ Tule kia rarybemyhỹre Deuxu Rybe.

Awa riki manaõ riwotõmonyõtyhy.

¹² Tahe Jesuisi dirawyõnyde: —Tule Deuxu Rybe rarybere: —Inyõ heka Deuxu uri urihixiõtyhy.

¹³ Rexihure tahe Jesuisi urihixina. Tahe Satanasi heka Jesuisi ririre. ¹⁴ Idi tahe Jesuisi ròsere

Kalileia bede-ó. Deuxu Tyytybytyhy ruru tahe tii-wana ratximyhỹre. Ibutumy heka kia hãwã-ki ibededỹỹnana rierumy hỹreny. ¹⁵ Jesuisi heka dohodỹỹna heto-ki ròbedeerydỹỹmyhỹre. Ibutumy tuu rarybere. Tuu reàlãmy rarybemy rỹimyhỹ.

¹⁶ Iribi tahe Jesuisi ròsere tai raumynyréò, Nazare hãwã-ò. Sabado txuu tahe dohodỹỹna heto-ò reamy raremy iwesehyyle. Tii tahe lamamy rỹire tyyriti-di rariakremy. ¹⁷ Tahe tamy Isaia tyyriti riwahinyreò. Tahe Jesuisi riijemyhỹre rybeõ idi rariakemy. Tai idi rariare:

¹⁸ —Wanyrỹ Tyytybytyhy waki ratxireri. Rybe Tỹmyra wihikỹ inyko arotohodỹỹkremy. Iny aõkõ mahãdu-ò rybe wihikỹ ararybekemy riwatare. Tule iny ròtena-ki rỹira mahãdu, jiarỹ ariòlòdỹỹnykemy. Kiamy heka tamyreny ararybekre. Tule ruetỹmyra ariwahinykre ruetà mahãdu-ò. Iny idi rarỹỹnymyhỹre mahãdu-ribi, aritakre idi risinymyhỹreki. (Aõna aõnamy risỹnyrenymyhỹreki wahe.)

¹⁹ Tibedeubo Inynyrỹreny taijoi ritakremy ararybekre. ²⁰ Idi tasỹ ixyby riwerasenyre. Tahe riwahinyre ixyby kia hãbu riyrubunymyhỹreò. Tii ronyre. Ibutumy kia dohodỹỹna mahãdu idi retehemy rỹimyhỹre. ²¹ Tahe Jesuisi ritelenymy rarybera: —Wiji idi rariará heka aõbo tamy ibed-

edÿÿnanamy roire. Kia aõbo ritidÿÿna-ki roireri ihetxiu. Kaimy tahe wiji rarybereri, jiarÿ heka tii rare. Tii adeereny tyriti rariará wahe. ²² Tai tahe bedede riòtiinyrenyre. Kia tahe aõmybo raryberakí. Tahe widee raryberenyre. Kaa heka Jyje riòrele ratxireri. ²³ Tahe Jesuisi ixityre tamyreny rarybere: —Aõu kaiboho wamy tarybetenyteri rybeõmy, myÿ manarybeke: Kai bexideytenyke, hàri, òhotibedu. Kiamy aõbohe wadee manarybebenykemy atxitenyteri:

Iwese Kafanaõ bedede-ki tewinyte wese ariwinyrenykemy wadi atxitenyteri, ahãwã-ki.

²⁴ Adeereny inihe tuu ararybekre. Rybe tÿnydÿÿdu heka õmo rityhynyõtyhy ihãwãreny-ki. ²⁵⁻²⁶ Tahe iwitxiramy ararybekre. Ibedeu kia raremyhÿu, sõwemy heka rama reamy raremyhÿ judeu sÿ mahãdu. Sõwemy wytese mahãdu heka ramamy rurumyhyre. Biu heka roaõhykyre tai inataõ beòra weeremyhÿ wahe Sareta hãwã heka Sidõ bedede-ki tii rasÿnymyhyre. Tahe Deuxu bedede riywinyre Eliasi rakemy iny sohoji wytese-ò, rÿsÿna riwahinykelemy wahe. ²⁷ Eliseu bedeu heka sõwemy tybybinadu rÿimyhÿ. Sohoji inyle riteytenyre. Naamy heka inire. Tii heka Siria bedede luduõ rare. ²⁸ Kia dohodÿÿna mahãdu heka ibutumy iu tamy rakyarananyre. ²⁹ Rimyrenyre heka Jesuisi. Idi retÿhirenyre hãwãlò ratya-ò ridyrenyre. Idi rehurenykemy riwisÿnyrenyre. ³⁰ Tahe Jesuisi inysõwehekÿy-txi ralore. Idi rahenyre. ³¹ Iribi tahe Jesuisi rare Kafanaõ-ò, Kalileia bedede-ò. Sabado txuõ txuõlemy heka Jesuisi iny ribedeernymyhyre. ³² Sõwemy heka

iny ribedeernymyhyre mahādu tamy awimy rŷira, irybe dori awireki wahe. ³³ Hābuō raremyhŷ dohodŷŷna hetowo-ki tyytybybinahakŷ-di tahe taumywo-ki ratximyhŷ. Tai tahe tii ryryre: ³⁴ —Jesuisi, Nazareludu, aōhebohe ijoi bisŷnykremy atxiteri? Biwahubenykre aōbo? Jiarŷ heka araeryre mobo taté. Kai heka Deuxu deòdu atxiteri. ³⁵ Tai tahe Jesuisi tamy rarybere tyytybybina iumywo-ki riyrykemy. Iribi riòlòdŷŷnyre. Tahe idi rehure iutyde-ò idi iribi ròhònyre. Hābu aōhe risŷnyōhyre. ³⁶ Ibutumy heka iny ribedeòtiidŷŷnyre. Iny sohoji sohoji widee rarybere: —Aōrybemy aōwe tii rarybereri? Timybo iny-ribi tyytybybina riteònyke. ³⁷ Ibutumy timybo Jesuisi riwinyre, ijyynamy reare. ³⁸ Tahe Jesuisi ròhònyre Simaō heto-ò idi rare. Simaō riòrelahi webinadumy roire rubuna-di. Tai Jesuisi-ko tuu relyyrenyre. ³⁹ Tai Jesuisi ibireweribi-ò rare. Tahe irubuna iribi riòlòdŷŷnyre. Tahe tii ritamadŷŷnyre. Rŷsŷnaō tamy riwahinyre. ⁴⁰ Ibutumy iny tawebinadu mahādu didydenyde. Ibutumy Jesuisi riteytenyre tibò iratityre rilidimyhŷre. Sōwemy iny tyytybybina-di rŷireri mahādu riòlòdŷŷnyre. ⁴¹ Iu tahe ryrymy reamy rŷimyhŷ: —Kai Deuxu Riòretyhy tate. Tii Jesuisi rierymyhŷ tii Deuxu deòdu raremy, tyytybybina wahe. Tai Jesuisi tamy rarybere rybeōkemy. ⁴² Txu iijiramy Jesuisi rare bedero-txi ixisohojile. Iny sōwemy riijemyhŷ. Itxi rearenyreu, iatysy deramy rekoamyhŷreny. ⁴³ Tai Jesuisi rarybere tamyreny: —Jiarŷ heka Rybewihikŷ Tŷmyra arelyykre iwitxira hāwā

Deuxu Òlòna Tǎmyramy arelyykre. Tuu Deuxu diwateònyde. ⁴⁴ Jesuisi ibutumy Judeia mahādu bedede bedemy dohodǎyna rǎiraki rotohodǎymhǎre.

5

¹ Jesuisi tahe aho ijà-ki rǎire Kenesare aho ijà-ki. Iny heka sǎwemy Deuxu rybe-ò roholakemy iu rǎimhǎ. ² Tii robire hǎwòò inatximy roinyimhǎre. Waxidumy mahādu heka rirahure rià-di risuhòreri. ³ Idi tahe rimyre hǎwòò. Simaō hǎwò heka rare. Tii tahe ixi-di ritaranyre beroro-ò. Tai tahe tii rexidelenymy relyyre. Kia iny rǎimhǎ mahādu heka ribedeernymy relyymhǎre. ⁴ Rexihure rybe-ribi. Idi tahe Simaō-ò rarybere: —Make wa bera-txi. Rià bitidike. Bimykemy utura. ⁵ Tahe Simaō rirawyònyre: —Wanyrǎ, ruu wa wadireny aōkǎhykylemy bedewadireny rareri, uturamy ho aōkǎ. Tarybete urenana anakre. Aritidikre heka rià. ⁶ Tahe ritidireu tahe, rià utura sǎwemy rimyre, kia rautxienyre. Tule riykamhǎ rià. ⁷ Talawò biòwa mahādu-ò rryyre: —Bòdòibedenyke bidiwawiòhenanybenykemy. Inatxi hǎwò heka rǎxire. Ritǎxinyre utura-di. Ihyy berahatxi-ò ijiramy riwisǎnymhǎ ilawòreny. ⁸ Simaō tuu robire. Tii Jesuisi ratximhǎre tahe tatiowomy resere Jesusiko-txi. Simaō Pedro rarybere: —Wanyrǎ, aribi kǎny iòhòmy arǎiòthy. Jiarǎ heka waòrarudimy rare. ⁹ Simaōboho bedede riòtiinymy rabadewore aōma utura sǎwemy tamyreny riwahinyraki wahe. Tii tuu iximy rarybere. ¹⁰ Ibutumy tiiboho mahādu ribedeòtiidǎnyrenyre Zebedeu riòre kia

Txiau, Joaõ-wana. Jesuisi rarybere Simaõ-ò: — Brebuõmyke heka ikonana-ò heka utura bimyõkre. Wadee dori maaõmysỹdỹnykre hãbu wadee bimykre. Tamyreny biwatỹnynykre. Iwese utura temymyhỹte wese, wadee hãbu wiji bimykre waerydỹna mahãdumy rarekre. ¹¹ Tahe waxidumy mahãdu ibutumy kaa tawaxi tarià iu ririra Jesuisi riheludunykremy.

¹² Ròirenyre rirònyreny ibutumy hãwã-ò. Idi tahe hãbuõ rare ityyjyhykyle. Hãbu Jesuisi robireu tahe resere iko-txi, rexitòenyre: —Wanyrỹ, adeewikeki biwateytenykre. ¹³ Jesuisi tamy tebò ritetemy rarybere: —Kohe, arateytenykre. Tii reytemy reare. ¹⁴ Tai Jesuisi rarybere tamy: —Inyõ-ò tahe ijyyõmykre. Xiwena wahidỹdu mahãdu-ò make. Tai maxiwekre tuu Moisesi bedede riywinyre myna. Xiwenaõ heka biwinymy biwahinykre. Moisesi rarybere wese wahe. Iny mahãdu-ò heka biteòsinykre. Kia riteòsinykre teytetamy. ¹⁵ Tahe ihãrele Jesuisi ibutumy rieryre. Sõwemy iny heka wirotyre raholakremy. Ijõ nade aõma iwebinaduna ibina-ribi riteyteuykemy. ¹⁶ Tahe Jesuisi iribireny aõma rexitòenykre rexitare.

¹⁷ Ijõ txuu ròbedeerydỹmyhỹu, fariseu mahãdu, bedede ywina rybe bedede erydỹduõ-wana ronymyhỹreny. Ibutu hãwã hãwã-ribi dotydenyde wese tahe sõwerenyre, Kalileia bedede-ribi Judeia bedede-ribi, Jerusalẽ hãwã-ribi. Deuxu deytana Jesuisi-ki ratximyhỹ. Jesuisi hãwãlò-ribi dobehede tii-wana, taerydỹna mahãdu-wana wahe. Tahe sõwemy iny iube-ki ributunymy

ronymyhÿre. ¹⁸ Iny mahãduõ heka hãbu iumymy manadu kididydenykemy ratxireri Jesusiko-ò ritidirenykemy. Idi tahe hãbu webinadu wahe Jesuisi-ò rakemy bedé riywinyre. Inatyhyle riatyhynyre. ¹⁹ Inysõwereki tahe tamy rehemynyrenyõtyhy. Tai tahe hetoratyti-ò raòwònyre hãbu webinadu-di. Iribi tahe diberesedÿÿnyde reroti-di. ²⁰ Jesuisi robire, rieryre aõma rityhynymy ratxirenyrereri. Hãbu-ò Jesuisi rarybere: —Wy, aòraru heka raixãwididÿÿnyra. ²¹ Tahe fariseu mahãdu he widee raryberenyre: —Mobo kia hãbu ratxireri, timyhe tu kia irybeõna rybe-di. Deuxu-ò kia rybe ibinatyhy rare. Deuxu sohojile òraru-ribi iny riixãwididÿÿnymyhÿre. ²² Tahe Jesuisi rierymyhÿ timybo rexinohõtinyinymyhÿreny. Tai rarybere: —Aõherekibo kia wesemy texiraykynytenyteri. ²³ Tibohe irutaõre webinadu-ò rybe: —Aòraruna reixãwididÿÿnyra ada myimy mariake aõbo. ²⁴ Deuxu Riòre Hãbutyhyhykÿ jiarÿ rare. Tai waruruna wadee Deuxu Riòre òraruna ixãwididÿÿnamy. Katahe bierybenykre inatyhymy aõbo rarybereri: —Myike, abyre biwymy asÿ-ò ta mahe. ²⁵ Hãbu tabyre rimymy tahe aõwesele tasÿ-ò rare. Deuxu riwowydynymy rare. ²⁶ Sõwemy iny ribedeòtiidÿÿnyreny. Riwowydynymy rÿimyhÿ. Tiiboho raryberenyre: —Aõwitxiramy wiji inyboho robirenyra. Tiu juhúu tukõre-ribi wahe robirenyra.

²⁷ Iribi tahe nieru bedé dinodu nieru mynydumy robire, Levi heka inire. Tii heka raaõmysÿdÿÿnymyhÿ titxibo nieru tarasana-ki. Jesuisi tamy rarybere: —Manakehe wawana.

28 Tahe taaõna ibutumy ririre, idi ihemy rare.

29 Levi tahe taheto-ki roxinaõ riòlòdÿÿnyre Jesuisi dee. Tamy rehemynyre nieru arisidu mahãdu, tule fariseu mahãdu. Ibutumy iny iarixina mahãdu. 30 Kia fariseu mahãdu kia bederydÿÿdumy mahãdu tyyritirybedÿÿdu mahãdu kie heka aõbina binahylemy rarybereri Jesuisimy. Jesuisi terydÿÿna mahãdu-wana kiamy rarybereny: —Aõherekibo kaiboho teroxitenyteri, nieru arixidu-wana, iõrarudu sõwe mahãdu-wana. 31 Jesuisi rirawyõnyre: —Iny awimy ratxireri-wana, òhotibedumy reaõmyhÿre. Webinadu mahãdule ta tuu reamyhÿre. 32 Òbiti mahãdu-ò aõkõ heka jiarÿ anade rybemy. Tiibohole heka ixi-txi tõhõti reakemy idi watxireri.

33 Tahe tiiboho Jesuisi-ò rarybere: —Joaõ heludu mahãdu roxiõmy txumy rÿire. Tule tiiboho rexitòenyreny. Sõwemy rexitòenymy hÿre fariseu mahãdu erydÿÿna tule. Tahe aijoi tahe riroximy hÿreny riõmy hÿreny. 34-35 Tahe Jesuisi tamy rarybere: —Hãwyymy heridu tÿmyra ijoi ratxikeki heka tiu itobidÿÿnana mahãdu wahe. Kia heka riroximy hÿke. Kia tahe tÿmyra iribireny ratakreu, iijoi mahãdu renarehekre. 36 Tyky tÿmyraõ tiu tykytyby dòbõnamy iny ritidiõtyhy. Timyki dori wii wiòbydÿÿõna. 37 Vĩ tÿmyra heka tiu aõiròdu tyky watxiwe yla tyby-ò rarareõmy hÿre, tukeki ta kia raykakre idi vĩ urile rejujukre. 38 Vĩ tÿmyra heka hyna tÿmyra-ò rararemy hÿke. 39 Inyõ vĩ tybyhykÿ riõkeki, itÿmyra rexitòenyõtyhy. Kiamyki rybe. Vĩ tyby dori itÿmyra-ribi awi rare.

6

¹ Judeu elehydÿÿnymyhÿÿreny txu kia idi rekoarenyre maixômo-ho-di. Ierydÿÿna mahâdu rimyra maixômo, maixômo, debò-di riroxitytxiwimyhÿÿ riymy idi rare. ² Fariseu mahâdu tuu robire. Tamy rÿÿraxire: —Aôherekibo kia wese tewinyteri. Kiamy heka iwidÿÿômyke bede ywina rybe rarybemyhÿÿre judeu elehydÿÿnymyhÿÿrenytxumy. ³⁻⁴ Jesuisi tamyreny rarybere: —Ihetxiu Davi tamahâdu-wany rama risareu, Deuxu dohodÿÿna hetowo-ò rirònyre. Tai Davi xiwena rÿsÿnale taijoi-wana rirÿsÿre. Xiwena wahidÿÿdule heka irÿsÿdure, inywitxira ta aôkô. ⁵ Jesuisi ritÿnynyre tamy: —Hâbutyhyhykÿÿ jiarÿ rare, Deuxu Riôre wahe. Kiata sabado wedu jiarÿ rare, elehydÿÿnymyhÿÿrenytxu wedu wahe.

⁶ Ixityre ralore dohodÿÿna mahâdu heto-ò ròbedeerydÿÿkemy. Hâbuô tai rare tebò rabinamy. ⁷ Tahe fariseu mahâdu Jesuisi-ò retehere. Riteyteynykemy kia hâbu webinadu judeu elehydÿÿnymyhÿÿrenytxu. Rexiwodohonanyre. Kiatxuu tii riwinyrekeki tahe ribinanyke judeu elehydÿÿnymyhÿÿrenytxu, riwinykeki wahe. ⁸ Jesuisi rierymyhÿÿre aômybo tiiboho raraykynyrenyreri. Jesuisi tamy ryryre, —Aôma hâbu debòbina-ò: —Mynyike ini, ityareny-txi. ⁹ Tahe fariseu mahâdu-ò Jesuisi rarybere: —Arÿÿraxikre inihe adeereny, awire adee ka hâbu debò ariteytenyke sabado txuu. Aôbo adeereny awire sabadotxu widÿÿ. Aôwihikÿÿwidÿÿmy aôbo ada aôbina widÿÿmy. Rubu-ò wahidÿÿ aôbo ada rubu-ribi itarasa aôbo. ¹⁰ Retehere! Ibutu-ò idi hâbu-ò rarybere: —Ebò inihe

biditeòsinyke. Tiu hābu tebò riteòsinyreu tahe, reytere. ¹¹ Reburerenyre heka. Timybo Jesuisi risŷnyrenykemy rexinohōtinyrenyre.

¹² Idi tahe Jesuisi heka hāwālòratyy-ò rare ixitòedŷŷmy Deuxu-ò. Rureherehemy heka tamy rexitòenymy bedede idi rŷire. ¹³ Txuijaramy tahe ludu mahādu-ribi waòinatxi reurò taheludutyhy mahādu ritare. Tarybemy rybedumy rininirenyre. ¹⁴ Sohoji ijō heka, Simaō inire, Pedromy idi ranire, ijō tahe Andre rare, iseriòre. Idi Txiau, Joaō, Filipi, Bartolomeu. ¹⁵ Mateu, Tome, Tadeu Txiau, (Kia Txiau heka Afeu riòre rare.) Ijō Simaō Kana bedeluduō rare, tasubedeluudure. ¹⁶ Juda Txiau riòre, ijō Juda Isariò tahe Jesuisi tyhedŷŷdu rare. ¹⁷⁻¹⁸ Jesuisi dobehede bedero-ò hāwālò-ribi. Tahe sōwemy iny iheludu mahādu tii-wana rŷimyhŷ. Judeia bedede mahādu Jerusale hāwā mahādu. Tule Kalileia bedede, Tiro hāwā, Sidō hāwā mahādu. Tiiboho wii ributunymy hāwā mahādu Jesuisi-ò roholakemy idi reytekemy. Kia tai ròteytedŷŷmyhŷ. ¹⁹ Ibutumy Jesuisi tyky-ò tamy adereximy risŷnymyhŷre adeytena iribi ròhònymyhŷ.

²⁰ Tamyreny retehere tai ibutumy rierynanyrenyre: —Kaiboho aōkōrenyre-kì, beysebenyke. Deuxu Òlòna dori ahōrōreny rare. ²¹ Rama arasareri-wana beysabenyke. Bihydymy dori mabekre. Tule tahinyteri wana beysakre ihewo-ribi. ²²⁻²³ Beysamy butxuenykre, inyō umy radònykeki tule. Kaiboho dori Deuxu Riòre tetyhynytenyte jiarŷ tiire, Hābutyhyhykŷ Riòre wahe. Kia mahādu eramy ijira Riòre

rỹikeki beysake. Beysa tyhyki tai. Biu-ki dori aõwiwihikỹ bitakre. Deuxu rybemy rybedu mahãdu tule rotỹỹnyrenyire iòraru-ki. ²⁴ Kobe làhàxe kaiboho ityhy mahãdu abedesanareny dorihe rexihura. ²⁵ Kobe làhàxe ahàdyreny mahãdu, aramasanareny dori rehemynyre. Kobe làhàxe abedesareny, ahinanareny dori abrunareny rehemynyre. ²⁶ Kobe làhàxe atyhydỹỹ sowereny tule dori. Ilabiereny rybemy rybedutyhy aõkõ rityhynyrenyire.

²⁷ Warybe-ò taholatenyteriki inihe ararybekre. Aòludu luumy atxibenyke amykyaradureny-di, awimy idi mabeke. ²⁸ Ibinamy aõma umy rarybekeki aõbinahakỹ riwinykeki, tamy bexitòenykre Deuxu-ò. ²⁹ Aòsỹny-ribi anahatenykeki iyre-ribi iwyòdỹỹmy tamy bexirahòreke. Inyõ atyky riwykeki tule tamy arahana biwahinyke. ³⁰ Iwese aõtxiu aõna inyõ adee rexitòenykeki, tamy biwahinyke ixyby iribi iwydykõkemy. ³¹ Aõbina inyõ adee riwinykõkemy atximahâte. Iwese tiu kia aõhõkỹmy inyõ isỹdỹỹõmykre. ³² Kai aluu mahãdu sohojile iluuõmyke; òrarudu mahãdu dori tuu rỹimyhỹre. ³³ Kai aery mahãduòle tawotòemahâte, timyki Deuxu-ribi aõ atarasaõna. Iny itxỹte iehehe mahãdu dori widee rawotòemyhỹre. ³⁴⁻³⁵ Òrarudu mahãdu heka widee rihuòtemyhỹre. Iribi tahe iwesele ixiby kidiwykemy idi riwisỹnymyhỹ. Kai ta buhuòtemyhỹke idi tehuòtete ixyby iraròsòkõmyke. Tukõkeki ta Deuxu-ribi aõ atarasaõna. Aòludu luumy atximahãbenyke. Tai Deuxu-ribi aõwiwihikỹ bitakre. Tai Deuxu wihikỹ riòremy mabekre.

Tii dori inywi-ò inybina-ò awire. ³⁶ Awimy kaiboho boibeke, iwese boreny awimy biu-ki ratximyhÿre wese. ³⁷ Inyõdee kyarakõmyke tai Deuxu adee rakyarananyheny. Inyõ taðraruna biixãwididÿÿnyõkeki, Deuxu tahe aðraruna riixãwididÿÿnyõkre. ³⁸ Ainytyhyke inyõdee imyna Deuxu adee rainytyhynanyhykre. Deuxu ibutumy aõwi adee riwahinykre. Tiwesebo tõwahite wesemyna idi Deuxu adee ròwahikre.

³⁹ Aõmybo ribedeerynyre ijyyõmy relyyre: —Inyõ ruetà heka riwiòhenanyõtyhy iwitxira iny ruetà. Tukeki heka hãloo-txi wiwana resekre. ⁴⁰ Ierysÿdÿÿ iòrysÿdÿÿdu, kia ratyre aõkõ ratximyhÿ. Kia uladu ratyyritinyre nihikÿmy tahe erysydu tiu taerysydÿÿdu ratyre ratxiõmyhÿre. ⁴¹⁻⁴² Òwòrukre nihikÿ aruety-ki roire. Aõherekibo aseriòre ruety-ribi òwòru rÿnysiõ tarasamy tewisÿnyteri. Kia heka itxenadÿÿdu tate. Juhuu òwòrukre aruewo-ribi bitakre. Idi tahe betehemy iruewo-ribi aõsõmo bitakre. ⁴³⁻⁴⁴ Òwòru wihikÿ tiu bederaty binaõ riwahinyõhyymyhÿre. Tule òwòru binahakÿ bederatywimy raratynyõmyhÿre. Òwòru raerymyhÿre iraty-ò itxere rÿimyhÿreu, beraty-ò retehemy awire ada ibinare aõbo beraty-ò retehemy awire ada ibinare aõbo. Figoraty uvaraty tiu iwitxira òwòru-ribi raheõmyhÿre. ⁴⁵ Hãbuwi heka aõwimy rotÿÿnymyhÿre iwo-ki tuu rÿimyhÿremyna. Tule hãbu bina aõbinamy rotÿÿnymyhÿ iwomy tuu rÿimyhÿremyna aõbina bina. Inyõ dori aõmy raraykymyhÿremyna rarybemyhÿre.

⁴⁶ Kai rarybere boholaõkeki aõbo bi-

winykeki. Uritere wanidỹỹõmy. Wanyrỹmy tiwaninimyhỹtenyte tahe warybemynamy atxõhyylemyhỹtenyte. ⁴⁷ Tiwese hãbu warybe riywinyre wese adee ararybekre. Tiu heka ariteòsinykre. ⁴⁸⁻⁴⁹ Hãbuõmy akoreny arelyykre. Tii warybe-ò roholare idi imynany rotỹỹnyre. Tii kiata taheto riwinyre manadelemy ria-di. Beòra iheto reseõhyyre manatyre-ki relereki wahe. Ikõmyta warybe-ò roholakõre, kawese rotỹỹnyre. Taheto uritere sukile riwinyre. Beòrau ta, urile resere. Ikyhynakõreki wahe. Kiamyta rotỹỹnyre warybe tyhydỹỹdu-ò idi ityhydỹỹdukõ-ò.

7

¹ Jesuisi tarybe rahu-di tahe Kafanaõ hãwã-ò rare.

² Tai Roma soldado dinoduõ tai ihỹmyhỹ. Teòduõ tahe binamy irubu iòhòmy roimyhỹ. ³ Soldado dinodu Jesuisini-ò roholareu tahe, iòrysmy rarybere. Taita judeu mahãdu kia matuariõ rex-itòenyre aõma kididykremy riteytenykremy kia webinadumy roireri. ⁴ Tahe Jesuisi nade juhu be kiamy Jesuisi rarybere: —Ka hãbu heka awi biwiòhenanykre heka. ⁵ Ka hãbu heka waijoi luu nihikỹ rare ihyymy ta dohodỹỹna hetoõ riwinyre waijoi-ò. ⁶⁻⁷ Tai tahe Jesuisi rare tii-boho-wana. Tehemyny sỹ iòhòmy rare. Idi tahe ryrowetyakile Jesuisi-wana wii riòbynyre. Aõma soldado dinodu kia biòwa-ò wahe. Rarybere he aõma soldado dinodu kiamy rarybereri: —Noõmy heka. Ihãrele teka awimy rareòle heka bedehe mynyke. Awi tate timy heka anaixiranyõtyhy dori raixỹruwỹhỹre alau adee ixitòedỹỹ-ò aõma

dori adee rybe r̃yīekile aōweseleke wadeòdu kia reytemy reake. ⁸ Jiar̃y dori inydee radỹ̃du jiar̃y rare. Aōbo riwinykemy. Kia riwinyre warybemynale kia heka jiar̃y rare. Wadeòdu-ò rarybewāhāraki heka: —Kia biwinybenyke. Riwinymyh̃renyre. Kai tule marybeke, beyteke. Tahe aōwese reytemy reake. Robedeòtiidỹ̃nyre, kia tuu rarybereki wahe. ⁹ Jesuisi ròkesereri kia rarybemyh̃ò wahe: —Jiar̃y ka tiu judeu mahāduy-ki. Hābuōmy rabiō watyhydỹ̃namy. Rabireri riwatyhnyreri rabireri. ¹⁰ Soldado dinodu deòdu ròkesereri. Ixyby reytereri idi ronyre.

¹¹ Jesuisi rare terydỹ̃na mahādu-di ijō hāwā-ò. Nāi hāwā-ò heka rare. Kiemy rahyymy heka rahyyre. Sōwemy iny iheki rare. ¹² Hāwā ijò-ki rehemynyreu tahe kia ibutumyle rehemynyre. Sōwemy iny rubudu rareò wabede-ò. Weryrybòò rurure. Ise, wytese, heka iriòre sohojihyylere. Iny sōwemy heka riheludunyre tahi-di taibru-di. ¹³ Tai Jesuisi tuu robireu, idi rexiwòtenymy kamy rarybere: —Ibrukōmyke! ¹⁴ Jesuisi debò ritidire caixaō-ò. Iu idi itxyydu ruhurenyre. Idi tahe rarybere: —Weryrybò, bexixake wahe. ¹⁵ Weryrybò rexixamy reamy ronyre. Idi rarybere. Tai tahe Jesuisi ise-ò riwahinyre. ¹⁶ Ibutumy tasỹ mahādu ribedeòtiidỹ̃dunyre. Tai tahe Deuxu riwowydynymyh̃reny: —Ebe, aōherewe, Rybedu nihikỹ kỹnyhe witxijumy inydeereny rehemynyre. ¹⁷ Kia taheka bedede hāwāmy Jesuisini reare.

¹⁸ Joaō heludu mahādu ibutumy tuu relyyre iko.

¹⁹ Inatxinareny Joaō riteònyre Jesuisi dỹ̃raxyimy kamy wahe: —Kaiwe nodu aōbo tate, ada txiò

aõbo ini nodutyhy ariraòrenykre? ²⁰ Idi Jesu-isi-ò ròirenyre tuu itỹĩraxidỹĩmy; —Kai we nodutyhy tate? Ta txio aõbo ini ijõ ariraòrenykre? ²¹ (Iu ta Jesuisi yla aõkõ webinadu, binanamy binana mahãdu riteytenyra, tyytybybinamy ykydu mahãdu, iruetà mahãdu sõwemy tule.) ²² Irahu-di ta Jesuisi rarybere Joaõ ijoi-ò: —Bòòsebenyke. Ibutumy kamy tabitenyta taholatenyta Joaõko-ò tuu belyybenyke: —Iny ruetà bina mahãdu retehererimy, Iny rutiàre mahãdu rariarerimy, tyybinamy binana mahãdu reytererimy, iny nohõtity mahãdu roholarerimy. Iny rubu mahãdu heka rubu-ribi rexixarerimy, urimynodu mahãdu heka Rybewihikỹ Tỹmyra-ò roholarerimy. ²³ Iny bedesa heka rare, warybe tyhydỹĩdu mahãdu.

²⁴ Joaõ heludu mahãdu iribi ròhònyreu tahe Jesuisi rarybere Joaõ bededỹĩnanamy: —Aõmybo wahe Joaõ-di tõiõtintytenyte aõmy tubedi nohõtintyrenyre tamy itxerena bederahy tõiitenyteki wahe. Otxirarade wese yhy-ki idi tahõtintytenyte. ²⁵ Aõma hãbu urimynodutyhy aõbo tahõtintytenyteri. Hãbu tyywihikỹdiremy tahe tahõtintytenyte. Iwese iòlò taheto wihikỹ-ki ratximyhỹre wesemy aõbo tahõtintytenyteri. ²⁶ Wadee manarybeke aõbo betehékemy tahõtintytenyteri. Deuxu rybeduõmy aõbo tahõtintytenyte. Inatyhy tii rare. Kia ratyre heka tii rare. ²⁷ Aõma dori tyyriti-ki rarybemyhỹre:

—Tii heka wakoki kadehemynykemy ratximyhỹre, tamy relyykemy, ryõ riywinymyhỹre.

²⁸ Inatyhy kaa rare. Tie heka ibutu hãbu ratyre

ratximyhÿre. Ihãrele tahe inyõ Deuxu Iòlòna-ki ratxikeki heka iratyre ratximyhÿre. ²⁹ Tahe nieru butudÿÿdu mahãdu kia-ò roholare. Tule sõwemy iny kia-ò roholare. Tiiboho Deuxu bede ywina tyhydÿÿdu mahãdu roire. Tule Joaõ Sebedÿÿna mahãdu roire. ³⁰ Fariseu mahãdu tahe, bede ywina erydÿÿdu mahãdu tahe Deuxudeewina dera rare. Tai Joaõ-ò ratisebemy roiõtyhy. ³¹ — Mowesebo heka wijinabòdu mahãdu wesemy ratxireri. ³² Uladu mahãdu wesemy tiiboho ratxireri. Tiiboho ijõ uladu mahãdu-ò ryrymyhÿre: —Inyboho rawiunyre, tahe kaiboho teseõtyhy. Wobina wiu rawiunyre tahe kaiboho tahinyõtyhy. ³³ Joaõ Sebedÿÿdu renareherenyõmy rÿire, vÿi riõõre. Ihãre tahe kaiboho tarybete: —Tii tyytybybina-di ihÿre. ³⁴ Hãbutyhyhykÿ jiarÿ rare, Deuxu Riòre wahe. Jiarÿ reroximyhÿre tule reõmyhÿre. Tai tahe tarybemahãte jiarÿ wabyre nihikÿlemy wamomohõkÿremy. Jiarÿ riki òrarudu liinatyhy heka jiarÿ rare, nieru tarasadu liina wahe. ³⁵ Ihãre tahe aõikõkõlemy heka taraykynymyhÿtenyte ihãre taheka òbitilemy ixi-di tahõtinyinmahãtenyte.

³⁶ Fariseu mahãduõ heka Jesuisi ritobinyre taheto-ò roximy. Jesuisi tahe rare idi ronyre roximy. ³⁷ Kia hãwã-ki tahe hãwyyõ rasÿnyre, wydena wahe. Tii heka Fariseu heto-ki riroxirerimy roholareu, tii tule rare. Tahe hyna òwyhykÿ rimyre. Alabastro aderònahynani rare. ³⁸ Hãwyy tahe Jesuisi hewomy ronyre, iòhòmy. Tahe aderòna ritxiwire iwatyre. Tule iwa-ki ruworuwòmÿ ratximyhÿ irube-di iwa risuhòra

idi irade-di rabunyre. ³⁹ Fariseu kiamy robireu, ixideele rarybera: —Kia hãbu Deuxu rybeduõ aõkõ rare. Tuukeki tii hãwyy rieryke aõhãwyybo tii ratxireri. ⁴⁰ Jesuisi tahe fariseu-ò rarybere: —Simaõ, adee ararybekemy watxireri. Simaõ tahe rarybere: —Manarybeke Waerydỹỹdu! ⁴¹ Tahe Jesuisi rarybere: —Nieru huòteduõ heka inatxi hãbu-ò nieru riwahinyre. Ijõ 500 rihuòtera, ijõ tahe 50my rihuòtera. ⁴² Idi tahe hãbu inatxi nieruõhyymy rỹire òòsemy tanieru tamy. Tai tahe nieru huòtedu riwotòenyrenyryre tahe ritusanyre, wiwana iòwy riixãwididỹỹnyre. Tibo huòtedu ilàhànadỹỹdu tyhyre. ⁴³ Simaõ dirawyònyde: —Kia òsana 500my rihuòtere. Tahe Jesuisi rarybere: —Inatyhy rare. ⁴⁴ Jesuisi tahe hãwyy, riijemy, tahe Simaõ-ò rarybere: —Kahãwyy ini bìdiijeke. Jiarỹ nadehemynydeu, tii tarube-di wawa risuhòra. Kai beeõ tadiwyòte. Tii tarube-di riwawasuhòra. Iu tarade-di riwawarabunya. ⁴⁵ Kai tiwawehityhynanyòte rehemynyrau, tii tahe riwaatyõhyymy ratxireri. ⁴⁶ Kai warade-ki òlỹre tetxiwiòta tii tahe aderòna wawatyre-ki ritxiwire. ⁴⁷ Tai tahe adee ararybekre. Tii inatyhymy waluure. Taòraruna ixãwidỹỹna-ki. Inyõ iòraruna ibutemy raixãwidỹỹnymyhỹreki, tii inatyhymy aõkõ taòraruna ixãwidỹỹdu luure. Ijõ tahe inatyhyhykỹlemy taòraruna ixãwididỹỹdumy reamyhỹre. ⁴⁸ Tai Jesuisi hãwyy-ò rarybere: —Aòraruna reixãwididỹỹnyre. ⁴⁹ Tai roxidu mahãdu widee raryberenryre: —Mohãbubo kia rare? Tii òraruna riixãwididỹỹnyrerimy. ⁵⁰ Tahe Jesuisi hãwyy-ò rarybere: —Atyhydỹỹnamy

texitarasadỹnyte aòraruna sòwe-ribi biu-ò hena tetateri. Mata hỹny.

8

¹ Rexideleny raremyhỹ ralòralòmy hãwã hãwã ikòkòmy reamy rare kia aõma Deuxu Rybewihikỹ Tỹmyra relyymy rare. Tai ierdỹyna mahãdu waòinatxi reuròmy idi ròirenyre. ² Tule hãwyyõ tiiboho wana ròirenyre Ijõta Marie Madalena heka rare. Juhuu tahe tyytybybinahakỹ-di raremyhỹ. Idi debò inatxi reuròmy tyytybybina iribi riòlòdỹnyre. ³ Ijõta Joana Kusa hãwyy rare. Tii iòlò Herodi heka aõmysỹdỹdu heka rare. Tule ijõ hãwyyõ Susana inire. Idi tule ihona hona Jesuisi taijoi-wana ibutumy tanierureny-di riwiòhenyrenymyhỹre.

⁴ Idi iny sòwemy titxiribibo dirahude kia-ò. Kia mahãdu-ò heka Jesuisi ribedeerynyre ijyyõmy. ⁵ Alòbòròna-di dehuu heka ròhònyre taoworu-ò. Alòbòròna-di imahãdu ijõ ryo-txi resere. Tai heka iny rariamyhỹre alòbòròna tyre-ki. Nawii tule tuu riroximyhỹ. ⁶ Mana rotysu-txi ijõ rejuxunyreri mana rotysu-txi suu dori ibututere tai tahe iraruxiòlemy raumynyre. ⁷ Ijõ tahe edey-txi resere. Raumynyreu tahe edemy riòhỹtỹnyre. ⁸ Ijõ resere suwi-txi. Tai ta raumynyre idi sohoji alòbòrònaty-ribi 100my raratynyre. Jesuisi tamy rarybere: —Kaiboho òhòtirenidyeki heka inatyhymy warybe-ò boholabenyke.

⁹ Tai tahe Jesuisi-ò rỹraxyrenyrene: —Aòwe kaa tekewesenanyteri? ¹⁰ Jesuisi rirawyonyre: —Kaiboho heka teerytenyete aòbohe wasimy ijyy rare Deuxu dori adeereny ritỹnynynyre. Kia tahe rare,

Deuxu Iòlòna aõmydỹnana wahe. Ijõ iny-ò tahe rarybere ijyy-di relyyre.

Tai robikre tahe, rieryõtyhyke. Roholarenkykre tahe rieryõtyhyke, timybo juhuu Deuxu rybemy rybedu mahãdu rarybere wese.

¹¹ Aõmybo kia aõijyybo kia rare wahe. Alòbòròna heka Deuxu Rybewihikỹ wese rare. ¹² Ryro-txi resere heka ijohonadu wesemy rare. Deuxu ijyy heka resera ede sõwey-ki. Tii heka Deuxu Rybe-ò roholamyhỹre mahãdu wese rare. Idi tahe Satanasi heka ritamyhỹre iworeny-ribi. Tai rityhynyrenykyõmy idi biu-ò rahenyõkremy.

¹³ Ijõ tahe manasuõ-txi resere heka, kia Deuxu Rybe-ò roholamyhỹre mahãdu wese rare. Rybe-ò juhuu roholamyhỹre deysana-di rityhynymyhỹre. Kia manatyre resera heka irarutiõhykre. Iny mahãdu wese heka rare. Idi ikyhynakõreki, iwodelòlòtõmoreki urile tatyhydỹỹna riatymyhỹre.

¹⁴ Ijõ tahe edesuyky-txi resere heka, kia Deuxu rybe-ò roholamyhỹre, idi iworekena sõwemy, iaõdelòlòtõmomy, idi ityhyna wahe urile riòhòtỹnymyhỹre. Tai ròwiòhenadỹỹõhyymyhỹre Deuxu tyhydỹỹna-ki. (Kia tahe alòbòrònaõ ede yky-txi resera tahe iny umy witxira wesemy heka rare. Iny umy tyhyna idi ratxireri heka kia wesemy kia ede-txi iny reseremy. Aõma kia inytyhyna ratxireri. Tiu heka ityhydỹỹna riòlòdỹỹõtyhy. Kia alòbòròna tahe tai heka rokuõtyhy.) ¹⁵ Kia ijõ alòbòròna suu witxi-txi reserá tasỹ iwitxira inywesemy rare. Kia ijohonadu aõma rierymyhỹre. Irayky-ò ralòmyhỹre. Kia iwotyhywo-ò òbitimy ratxirerí tahe, òbitilemy

aō riwinymyhỹre. Iwese kia alòbòròna sōwemy ratyy rawahinyre wese tahe tii rare. ¹⁶ Ijō ijyy tahe kiamy roire. Uritere inyō loosònaō rideōmykre butxi rawo-txi ada herina rawoō-txi aōbo. Loosòna bidekre bedewiō-ò. Tai tahe ibutumy bede ritoosònanykre. ¹⁷ Aō heka tai wasimy ratxiōhyymyhỹre. Aōutxumy dori ibutumy erynamy rarekre. ¹⁸ Tahe bexijebenykre ijohona-ò. Kia sōwemy idi r̃yirerimy ih̃yre heka sōwemy rimykre. Kia urihimyo iwo-ki r̃yireri heka iribi ritakre. Idi ibutumy r̃yireri heka iribi ritakre. Urihimyo iribi iny ritakre. Urihimyo iwo-ki r̃yireri heka hulemy iribi ratakre.

¹⁹ Jesuisise, tariòreboho tamy doide. Tii ròbedeeryd̃ỹmyhỹki isirare tamy dehemys̃y iny sōwe òraru-ki. ²⁰ Tai inyō Jesuisi-ò rarybere: —Adihe wa aseriòre boho hewa ahanakile ratxireri umy robikemy ratxirenyreri. Adee rarybekemy. ²¹ Tai Jesuisi rarybere: —Waseriòre wa kia Deuxu rybe eryd̃ỹnaō rare. Kia tamy roholamynyrele heka rityhynymyhỹrele heka nadi wesele rare. Tii-wana iwese waseriòre wesele rare.

²² Iribi tahe hāworo rorukurenyreu Jesuisi rarybere: —Ròkòireny kanawe-ribi ijà-ò. Idi tahe roirenyre. ²³ Jesuisi rōrōmy tòru-ki. Idi tahe yhynihik̃y òbònihik̃y-wana tamyreny reare. Ruberurenyre tiiboho r̃ymyrenyke lau. ²⁴ Tai tahe wylemy riixixanyreny: —Eryd̃ỹdu, Eryd̃ỹdu rekekoarenykre berahatxi-ò. Idi Jesuisi donymy deademy tahe yhy dee rarybere: —Biyr̃yke, Biyr̃yke. Yhy ruhumy resere. Òbò tule ruhumy ibutumy riyryre, iny rurukre. ²⁵ —Kaiboho tiwexe ainatyhynareny? Tiiboho rabedeòtid̃ỹmy

ruberumy widee raryberenyre: —Aõhãbuwe kaa rare. Yhyhykỹ dori òbò dori irybemy reòbyreri.

²⁶ Kanawe-ribi ijà-ò rehemynyrenyre Kerase bedè-ò kalileia aho weribi-ò. ²⁷ Hãbuõ heka tamyreny dobehede hãwãhãkỹ-ribi tamyreny dobehede. Tiiboho riòtyròny hãwãro-ribi iu ta tyytybybina-di ratximyhỹre hãbu tiu rexitynyõhyymyhỹre tatyy-di hyymyhỹre. Kiamy wabedekihyyle ratximyhỹre. ²⁸ Jesuisimy robireu tahe bedetxile resere tairy-di ryryre: —Aõhebo biwasỹnykre Jesuisi. Kai Deuxutyhy Riòre atxiteri. Uritere aõhõkỹmy wasỹdỹõmykre. ²⁹ Tahe Jesuisi heka tyytybybina iribi riòlòdỹnyre. Sõwemy dori riuwinyre hãbu rimymyta. Riuwinyre idi rihure. Tai heka tii uritiere womati reroti-di ritaataamy riijemyhỹre. Ihãre tahe ixi-ribi riòròmyhỹre. Tai bedero-txi reamyhỹre tyytybybinamy rawonymy. ³⁰ Idi tahe Jesuisi rỹrãxire tamy: —Mobo anire? —Sõwemy wanire. Tyytybybina sõwemy dori tuu rexiykynyreki. ³¹ Tiiboho raryberenyre: —Uritere bedebinahakỹ-ò wateòdỹrenyõmykre. Uritere sỹu-ò noõma rarekremy hãlootxi-ò. ³² Iu tahe ixỹni juramy riroximyhỹ hãwãlò-ki. Tai tyytybybina mahãdu Jesuisi-ò rarybere: —Biwateònyõke. Kowa ixỹnijura-ò biwateònybenyke aralorenkykremy. Tai Jesuisi riròtenyrenyre. ³³ Iu kia hãbu-ribi tyytybybina ròhònyrenyreu tahe ixỹniwo-ò ralòreki wahe. Raòlònyra ijò-di rejuxunyre taraò wahe. Ibutumy ahoro-txi rejuxunyre. Ibutumy rururenyre berahatximy. ³⁴ Ixỹni-di itxeredu mahãdu ibutumy raijiranyra hãwã-ò tule relyyrenyre tuu iny rasỹnymyhỹre

mahādu-ò. ³⁵ Tai iny dirahude tamy itxeremy. Idi tahe rare Jesuisi-ò. Hābu robimyh̃renyre tatyky-di ronymyh̃ ibutumy rexiywinymy Jesuisi-ribi iòhòmy ronyre. Kia iny mahādu heka sōwemy ruberure rabedeòtiid̃h̃nymyh̃re. ³⁶ Ibutumy relyyre. Kia tyytybybina timybo aōhebo rot̃h̃nyremy. ³⁷ Kia Kadara bedeludu kia mahādu tahe rexitòenyre Jesuisi-ò iribi ròhònykremy, ilau ruberurenyreki wahe. Idi tahe Jesuisi ròkòsere ixybyle reare hāworo-ò. ³⁸ Hābu tahe rexitòenyre Jesuisi-wana rakremy, kia tyytybybina-di iwo-ki ratximyh̃ wahe. Tamy rarybere: ³⁹ —Aōkōre bøkese aheto-ò. Ibutumy belyyke aōbo adee Deuxu riwinymy. Tai ta ibutumy hāwā hāwā-ò relyyre aōhebo Jesuisi ris̃h̃nyremy.

⁴⁰ Kia iny sōwehek̃ mahādu heka teysa-di rimyre ridyremyh̃re riraòhyymy ratximyh̃reny. ⁴¹ Kia hābu dohod̃h̃du hetowo eryd̃h̃du tahe nade Jesuisi-ò. Tii heka dohod̃h̃nana dinoduò rare. Ijairu inire Jesuisi-ò sutxi resere: —Mynake was̃ Jesuisi ⁴² Jiar̃ wa wariòre sohojile rare waòinatxi reuròmy iwyra. Tii ka rurukremy roireri. Idi ta Jesuisi rare is̃h̃-ò. Sōwemy iny Jesuisi riheludunyre.

⁴³ Hāwyyō raremyh̃ heka hāwyy webinadu rare iòhò Jesuisi rexis̃h̃ny waòinatxi beòramy heka idi ròhònyre hykyky hālubu ratxireri. Tiu heka inyō reteytenyòhyymyh̃re luahid̃h̃du, òhotibedu mahādu he risiranyre. ⁴⁴ Tai tahe Jesuisi tykysi-ò reare. Tai ta aōwesele reytemy reare. ⁴⁵ Jesuisi rarybere: —Mowe watxi reare? Ijō rarybereri:

—Erydÿÿ mahãdu aõkõre, jiarÿboho aõkõre. Pedro rarybere: —Aõheta sõwe iny kaki rÿireri. Timykibo tuu tÿÿrayiteri. ⁴⁶ —Jiarÿ dori reeryre. Mobo watxi rearaule reytera. ⁴⁷ Tiihe hãwyy ratxiremyhÿ ramytatamy. Tamy ramytatamy heka tamy rehemynyre. Iòraò rexibedenyre. Ibutumy iko tuu relyyre. Aõherekibo itxi reriramy. ⁴⁸ Tai tahe Jesuisi tamy rarybere: —Lerÿ, atyhydÿÿna myna teyteta. Ta bexiywinymytahÿny maa!

⁴⁹ Kie raryberemyhÿwanale tasÿ iny witxiraõle dehemynynde. Kia aõma dohodÿÿna wedu heto-ribi dehemynynde. Ijairu-ò rarybere: —Ariòre wa rurura. Uritere ta òhotibedu-ò ijiraõma ixinamy tii rakre. ⁵⁰ Jesuisi kia-ò roholareu tahe Ijairu-ò rarybere: —Urile bityhybenykre. Breburenyõma tii reytekre. ⁵¹ Tii rehemynyre heto-ò. Jesuisi ralòre iny deramy reare. Tii wana rake lau. Kia uladuse, uladutyby, Pedro, Txiau, Joaõ wana kiale ralòre tamy tiiboho wana. ⁵² Ibutumy rasÿbinamyhÿ Jesuisi rarybere: —Ibryrenyõmyke hewa rurumy aõbo roire, urile rõrõmy roireri. ⁵³ Ibutumy rieryrenyreri tiiboho urile tai idi risinyrenyre rurumy roimyhÿki. ⁵⁴ Jesuisi ihãre ta hirari debò-ki rimyre. Tai tahe idi rarybere: —Hirari, bexixamy, bodonyke. ⁵⁵ Ityytyby aõwesele ixityre tamy ralore. Dexixade, donyde. Rÿsÿna hirari-ò riwahinykemy Jesuisi rarybere. ⁵⁶ Tai tahe tybyboho sõwemy rabedeòtidÿÿrenyre rabedesarenyre. Jesuisi rarybereri: —Urile wamy ijyyrenykomÿkre. Aõbo adeereny rewinyramy.

9

¹ Jesuisi tahe tawaòinatxi reurò taerydÿÿna

mahādu ributunyre. Taruru tamy riwahinyre tyytybybina iny-ribi ritakremy. Tule iny webinadu mahādu riteytenykremy. ² Tule rarybere tamyreny: —Kaiboho belyybenykre Deuxu kia Iòlònamy tule webinadu biteytenybenykre. ³ Aō awanareny wydyrenyōmykre debōna aōkō, aōna hyna tule aōkōre. Tule rysŷnake aōkō, nieruke aōkō. Ainatxityyke aōkōkre. ⁴ Hāwā-ki hetoō-txi malòkeki taile bonykre. Hāwāribihyyle bòhònykreu, kia heto-ribi bexitakre. ⁵ Ibinamy aramyrenykreki, urile bixitakre. Idi òlòna-ki, awa bitòtynykre ibinamy tai tahateny taki. ⁶ Tiiboho ròirenyre hāwā sōmo sōmo-di Rybewihikŷ Tŷmyramy relyyrenykemy ròirenyre. Tule iny webinadu ibutumy iteyteynyrenyre hāwā hāwā-di.

⁷ Idi tahe iòlò Herodi ibutumy heka aōna aōna rierymy ratximyhŷ. Tai tii bedede ryy rieryōhyymy ratximyhŷ aōbo riwinykre. Roholamyhŷre heka iny rybe rybe-ò. Joaō heka rexixamy ratxireri. ⁸ Ijō tahe kiamy rarybereri: —Eliasile ratxireri. Ijō rarybere Deuxu rybemy rybeduō ratxireri. ⁹ Tai tahe Herodi kiamy rarybereri: —Jiarŷ heka Joaōra resymy rewahinyre. Mobo ratxireri iwese Joaō raremy wese he ratxireri. Moobo ta kiamy raholamy watxireri. Tai Herodi tuu robikemy riwisŷnymyhŷ.

¹⁰ Jesuisi eryna iko relyymyhŷreny ibutumy aōbo aōhebo rotŷŷnyrenyremy tabededŷŷnana. Jesuisi riòlònyrenyre ijō hāwā witxira-ò, Besaida hāwā-ò wahe. ¹¹ Tai iny sōwemy hekŷ rieryōlemy idi ta rieryreu tahe sōwemy ihemy rare roirehe. Jesuisi he ributumy ikole relyyre. Deuxu Iòlòmy

relyymyhÿre. Tai ròteytedÿÿmyhÿ webinadu mahãdu. ¹² Aõtxu tahe katxioromy Jesuisi eryna mahãdu, waòinatxi reurò mahãdu tamy raryberenyre: —Bede biywinyke ibutumy iny rÿireri hãwãõ-ò tarÿsÿna õbradÿÿmy. Inyboho dori bedero-ki ratxirenyreri. ¹³ Tahe Jesuisi rarybere: —Kaibohole rÿsÿna biwahinybenyke. Rirasÿnyrenykemy ierydu mahãdu diwyõnydenyde: —Aõheretahaka, iruyre orotxu idi inatxi uturale heka roireri. Aroikemy aõbo wadireny atxiteri rÿsÿna õbradÿÿmy inysõwe-ò. ¹⁴ Txibo 5000 hãbu sõwemy heka rÿimyhÿ. Jesuisi rarybere: —Bihitxinybenyke 50 iny heka iny bisÿnybisÿnybenyke. ¹⁵ Tii myna ieryna mahãdu rotÿtÿnyrenyre. ¹⁶ Idi tahe Jesuisi utura inatxi, orotxu iruyre rimyre. Biu-txi reteheremy rexitòenyre. Deuxu reàlàre tamy rexitòenymy riyreyrenymy riwahiny taerydÿÿna mahãdu-ò. Riwyrenyre tahe riwahiriwahinyrenymy idi roire. ¹⁷ Ibutumy riroxirenyre idi rihydyrenyre. Ihãre ta waòinatxi reuròmÿ hyna ixyby rÿximy rauhenyre. Idi ierydÿÿna mahãdu ixyby ributunyre.

¹⁸ Jesuisi heka ixisohojile rare ixitòedÿÿmy. Ierydÿÿna mahãdu heka irarò-ki rÿimyhÿ rijemy rÿimyhÿ. Idi tahe tamy nade tÿÿraximy: —Moboho jiarÿ raremy wamy raryberenyneri? ¹⁹ Tai narybedenyde: —Ijõ Joaõ Sebedÿÿnamy adireri. Ijõ ta Eliasimy adireri. Ijõ ta juhoo Deuxu rybedu mahãduòmÿ adireri. ²⁰ Jesuisi tamy rarybere: —Adeereny tahe. Mobo jiarÿ watxireri. Idi Pedro rirawyònÿre: —Kai Kristu tate, Deuxu deòdÿÿna

wahe. ²¹ Tahe Jesuisi tamy rarybereri: —Uritere tuu iny-ò ijyykõkremy. ²² Jiarỹ Hãbutyhyhykỹ, Deuxu Riòremy, aõhõkỹmy arotỹỹnykre. Judeu wedu mahãdu, xiwena wahidỹỹdu wedu mahãdu, bedede ywina erydỹỹdu mahãdu waderamy reakre. Jiarỹ arurukre. Inataõna txu-di arexixakre. ²³ Idi ibutu-ò rarybere: —Wahemy kanake mahãdu urile ixi dee rexiiĩõnykre. Txuõ txuõlemy taitxeò rimymy kidiwaheludunykre. ²⁴ Waòrary-ki rubudu heka biu-ò hedukre. Tukõkeki urile ixinany inatyhymy rurukre. ²⁵ Aõmydỹỹnanamy iny ritakeki, tahe taumy riõnonykeki, kia heka aõmy aõkõkre. ²⁶ Inyõ raixỹrukeki warybe lau tule jiarỹ Hãbutyhyhykỹ, Deuxu Riòre wahe, tai ilau araixỹrukre. Deuxuko-ò ýjuko-ò iu adehemynysỹu Deuxu Iòlõna-ki wahe. ²⁷ Inatyhymy heka adeereny ararybekre. Ijõ kaki rare. Deuxu Iòlõnamy robikre tarubukõtyre

²⁸ Tahe debò inataõ txuu rỹidi, Pedro, Txiau, Joaõ-wana Jesuisi ridyre. Tiiboho sohojile bederatòò-ò roire Deuxu-ò rexitðenykemy. ²⁹ Jesuisi rexitðenyrieriu tii tamyreny rexiwitxiranyre iu rexitðenyreu ityy heka urile rabòtòranyre. Iurahakỹmy relere. ³⁰⁻³¹ Tahe tamyreny dexitỹnynde Eliasi, Moisesi-wana tahe rarybemyhỹre Jesuisi-wana. Jesuisi rubunamy Jerusalẽ hãwã-ki widee rarybemyhỹreny, kia Deuxu bedeywidỹỹnana myna. ³² Pedroboho rõrõrenyeri. Idi tahe rexixarenyre, tiiboho Jesuisi loosõnamy robirenyre. Eliasi, Moisesi-wana tiiboho tuu robirenyre. ³³ Ròireriu, Pedro rarybere Jesuisi-ò:

—Wawedu, awityhymy inyhe inyboho kaki ratxirenyreri tahe rikiwinyrenykre inataõ hetomy, ijõ adee, ijõ Moisesi-ò, ijõ Eliasi-ò. Pedro rieryõlemyhỹre aõmybo rarybemyhỹ.
³⁴ Tai rarybereu Nonoe dobehede iubòròna bedede ritòbònyre. Pedro, Txiau, Joaõ-wana ruberumyhyỹrenyremy. ³⁵ Tahe ròhònymy reare rybeuni iuribi: —Kia heka Wariòre waluu rare. Kaiboho tamy boholabenyke.
³⁶ Tiiboho reteherenyre tahe inyõmy robiõlerenyre Jesusilemy ta robirenyre. Tahe rybeõmy rỹirenyre. Iu inyõ-ò aõmy raryberenyõre tuu.

³⁷ Tai tahe ijõ txu ratò-ribi dehemynynde iny sòwehekỹmy Jesuisi-ò ròirenyre. ³⁸ Inyõ rarybere: —Erydỹdu, wariòre adee redyreri. Beteheke wariòre sohoji-ò. ³⁹ Tyytybybina rimymyhyỹreu tahe riatyre bedede-ò. Idi tahe urile txuu riyiyidỹnyymyhyỹre. ⁴⁰ Aerydỹna-ò jiarỹ rarybera tyytybybina riteònykremy, tahe tiiboho riixãwidỹnyõhyrenyre. ⁴¹ Jesuisi tamyreny rarybere: —Tiwesebededỹnanabo wijinabòdu ityhyõlemy rỹira. Tiwesebededỹnanabo akyreny-ki ariijekemy. Wadee uladu bididyke.
⁴² Tahe didydenyde Jesuisi-ò. Tahe tyytybybina urile riitxỹteitxỹtenymy resere. Idi tahe urile bedede-ki rexiraòhòhòremy sutxi resere. Idi rarybexinymy. Rybexi irywomy ròhònymyhyỹ. Jesuisi tahe tyytybybina iribi riòlòdỹnyre uladu riteyteyre. Idi uladu tyby-ò riwahinyre.
⁴³ Ibutumy iny Deuxu aõwidỹna-di bedede riòtiinyre.

Jesuisi taerydỹ mahãdu-ò rarybere:

⁴⁴ —Boholatyhyki warybe-ò, Deuxu Riòre

Hãbutyhyhykÿ heka rawahidÿÿkre hãbu mahãdubinaõ-ò. ⁴⁵ Tiiboho rierykõlere. Kiamy dori ilaureny riwore. Tahe ruberurenyre tÿÿraxidÿÿki.

⁴⁶ Ryro-ki ierydÿÿna mahãdu widee rarybemyhÿre: —Mowexe wiratyre ityhykremy. ⁴⁷ Jesusireny rexiraykynymyhÿreny rieryre. Idi tahe uladuõ rimymy rarybere. Jesuisi uladuõ wana ronyrenyra. ⁴⁸ Tahe taerydÿÿna-ò rarybere: —Moõ uladu ka wese wadee riwiòhenanykeki, riwawiòhenanyre. Moõ riwawiòhenanykeki, tule waha riwiòhenanyre. Mobo deòdumy reakre, tii ibutu ratyrekre.

⁴⁹ Joaõ tamy rarybere: —Erydÿÿdu, jiarÿboho riòlòdÿÿnyrerimy tuu rabirenyra inyõ tyytybybina-di animy rehureriò. Tahe iny mahãdureny aõkõ rare. Tahe jiarÿboho tamy reijõnyrenyre iny inyijoirenyre aõkõki. ⁵⁰ Tahe Jesuisi rarybere: —Biijõnybenyõkre. Inyõ inymyrenydòdukõkeki, inyweribireny-ki tii rare.

⁵¹ Tahe Jesuisi bededÿÿnana iixihidu iòhòmy idi biu-ò rakreu, tii Jerusalê hãwã-ò rakremy rexiywinyra. ⁵² Tahe takomy inybuta bede riywinyre. Tai itÿhinamy rutòmy Samaria hãwã-ò. ⁵³ Tai tahe Jesuisi deramy rekoarennyre Jerusalê-ò ramyhÿreki. ⁵⁴ Txiau Joaõ-wana kia rierymy tahe narybedenyde: —Wanyrÿhÿkÿ, adee wikeki heòty biu-ribi ityreny kedesekey aritxuhorenykre risòrenykre. ⁵⁵ Tahe Jesuisi irybereny-ki ibinamy rahare tahe reburemy taò riòòsere iribireny. ⁵⁶ Idi ta iwitxira hãwã-ò roire.

⁵⁷ Tahe Jesuisi taerydÿÿna mahãdu-wana roirenyreu, hãbuõ tamy rarybere: —Ihyymy

awana arakre titxibo makreu, ahekile arakre.
⁵⁸ Tahe Jesuisi tamy rarybere: —Ijòrò heka ihâloo dire. Nawii týtýt dire. Tahe jiarỹ, Deuxu Riðre wahetoõre, Hābutyhyhykỹ rare hārele. ⁵⁹ Tahe ijõ hābu-ò rarybere: —Biwaheludunyke. Tahe tii dirawyònyde: —Wanyrỹ, Waha heka rurura. Tai tahe juhuu arituunykre. ⁶⁰ Jesuisi rarybere: —Txioinihe, rubu mahādu wii rituunyke. Kai tahe makre Deuxu Iòlõnamy belyykre. ⁶¹ Ijõ rarybere: —Wanyrỹ, araheludunykre. Urile juhuu wasỹ mahādu arawehityhynanykre. ⁶² Tai Jesuisi dirawyònyde: —Inyõ ritelenykeki, tahe ixyby òðsemy rexinohõtinykeki, tii waheludu mahāduõmy rareõtyhy.

10

¹ Jesuisi 72 hābu heka ritare inatxi inatximy tako-ò tihāwāhāwātxibo rakreò bedé riywinyre. Kiamy tamyreny rarybere: —Waijyy my rybemy boibenyke. ² Kiamy heka tamyreny rarybere: —Waaõmysỹdỹỹna heka inihikỹ-di isirare. Iwese maixõmo iny riòròmhyhỹre wese heka waaõmysỹdỹỹna rare. Maixõmo oworu heka inihikỹre, idi aõmysỹdỹỹdu heka ibutere. Tai oworuwedu-ò aõmysỹdỹỹdumy bexitòenybenyke, Deuxu-ò wahe. ³ Kiaboho heka budoeni wesemy iyreny-ki boibeke. Kia-ribi nohõti losaõmykre. ⁴⁻⁵ Tai heka bexiijebenkykre anierureny wydyõmy. Aõna aõna renyhynykeõ aõkõ awareny wydyõmy iny-ò ryberenyõmy iny iny-ò ryberenyõmy, rywetyatyamy abededỹỹna nodỹỹmy. Inyheto-ò malokreu Deuxu deysanamy birybenybenyke. ⁶ Tii adee awirenykre wana heka teysakre

kahetoludu. Tai tahe ixibyle adee Deuxu deysana ròðekre adee awiðhyykeki wahe. ⁷⁻⁹ Aõma hãwãð-ò malò-wana uritere deuròsò deòròsòõmy matximahãke. Tai tehemynomy atxiterikile bexiijemahã tetxilemy. Uritere rÿsÿna òta òtað aubeð ritidi wana uritere rybeðlòõmy. Birÿsÿmy rybeðlemy. Awiðhedÿÿmy ruruke wana bimymyhÿ aõbo adee riwahinymyhÿre. Iny raaõmysÿdÿÿmyhÿre heka ròtamyhÿre. Kia wese heka biwinymyhÿke. Birÿsÿmahãke aõbo adee riwahinymyhÿke. Binað roiwana biteytenymahãbenyke. Kia wesemy tamy marybeke: —Deuxu Iòlòna heka iòhòmy ihÿre. ¹⁰⁻¹¹ Hãwãð-ò birònykeki, inyð aradyrenyðkeki, boibenyke hãwãky-di. Myÿ marybebenyke tamyreny: —Aõbo wawa-ki hãwã-ki rÿireri. Wawa aritòtynykre bryby iribi ròhònykre. Adeereny ariteòsinykre nohòti ijaranamy tamyreny. Nohòti losarenyõmy Deuxu Iòlòna adeereny iòhòmy dehemynyde. Tahe kaiboho teramy tekoatenyte. ¹² Aõma ywisidÿÿnatxu heka tiiboho aõhòkÿmy rotÿÿnyrenykre. Jesuisi rarybere: —Tiro hãwã Sidõ hãwã heka awimy aribireny ròhònykre. ¹³ Kobe làhàxe kai Korasì hãwã, tule Besaida hãwã. Òhotibe ayreny-ki rÿire, kia heka Txiru hãwã, Sidõ hãwã tule kire-wana tað òta òtareny-ribi rexiatyreny. Tiiboho tykysausuhukÿtyre rexisÿnyre bryby-di rexiereny. ¹⁴⁻¹⁵ Òhotibetxumy heka Deuxu raruxetòenykre Txiru hãwã mahãdu, Sidõ hãwã mahãdu! Kaiboho tahe aõkore. Deuxu araruxetòenyðkre. Kai Kafanað hãwã yludu mahãdu aõbo adeereny rotÿÿnykre. Biu-ò

aõbo bòibenykre. Aõkõ heka heòtybina bedexi heka boibenyke. ¹⁶ Tahe Jesuisi taerydỹna mahãdu-ò ixyby rarybere: —Inyõ aradyrenykre wana tasỹ-ò. Iwese riwadymyhỹre wesele, aradyrenykre. Moo adeereny roholamyhỹre iyubu wadee roholamyhỹre. Wana tahe waderalemy reamyhỹre. Waderamy reamyhỹre tahe tule Waha deramy reamyhỹre. Deuxu wateòdỹdu wahe.

¹⁷ Tanonanareny-ribi iribi tahe kia erydỹna mahãdu ibutumy dòòsedenyde. Tiiboho heka teysa nihikỹmỹ dòidenyde. Tybybinanahakỹ heka irybe-ki ròhònyhỹre irybereny-ki. Riòlòdỹnymyhỹreny wana Jesuisini-di heka ròhònymyhỹre kiamy Jesuisiko-ò tuu relyyrenyde.

¹⁸ Tii rarybere tamyreny: —Bexiije benyke jiarỹ dori Satanasimỹ biu-ribi rabire, biudela wese my reseremy tuu rabire. ¹⁹ Inatyhy rare waruruke nyderi rewahinyre. Tai hemylala tyre-ki mariabenykeki. Tiu inyõ ruruòtyhy itytibòrò nihikỹ arawerenykeki, tiu buruòtyhy. Tule kai aòludu rururatyre arurureny-di boibekre.

²⁰ Ihãrele tahe uritere deysarenkõmỹ atxibenyke ka ruru òraru-ki tyytybybina deòdỹna, ruru wahe. Kaiboho dori anireny raritinymỹ roimyhỹre biu-ki kia ta ateysanarenykre.

²¹ Iule tahe Jesuisi reysare heka Deuxu Tyytybytyhy iwomy reareu. Kiamy rexitòenyre: —Waha, kai wa biuwedu tate ibutu bede wedu tate. Umy reàlãmỹ watxireri tamy retòenyre. Wadeysamy watxireri ka aõma dỹnana bederaremy nihikỹ iribi tewòmỹ atxiteriki wahe. Tamy hete iwese iny uladu

wesemy rityhynymyhÿre heka. Tai tahe tamy ritÿnynymyhÿre. Kia adeewimy tuu rare. ²² Jiarÿ heka ibutumy Waha wadee riwahinyre. Inyõ rieryõhyymyhÿre Waha wahe. Waðrarukile tahe iny rierymyhÿre. Mobo Waha rare wahe. Waðrarukile dori rierymyhÿre. Ijõ aritÿnynykemy watzireri. Tai tahe tiki tule riery iruru. Taile rierykre. ²³ Rexitõenymy rahudi tahe wasimy iwõtemy heka rarybere taerydÿÿna mahãdu-ò: —Kaiboho heka sõwemy aõwiwihikÿmy tabimyhÿtenynte. Tai kaiboho beysabenyke. ²⁴ Ihetxiu heka Deuxu rybedÿÿdu wana kia aõmysÿnanamy iòlò mahãdu wana. Kaireny aõmydÿÿnanamy robikemy risÿnyre, tahe aõkõhyre. Wijile heka tuu robireri aðrarureny-ki. Tule tabitenyteri kaiboho ratximyhÿ inatyhymy aõbo òbitimy Jesuisi ijyy-ò roholarenykemy tahe aõkõhyre.

²⁵ Moisesi bedede ywina rybe-di rãire Jesuisi lÿÿraxidÿÿmy. Iwese kai ixiluure wese, iny witxira luuke! Tii tahe Jesuisi rihixidÿÿmy rarybere: —Aõhebo arotÿÿnyke biu-ò arahenykemy. ²⁶ Jesuisi dirawyònyde: —Timybo kÿnyhe Moisesi bedede ywina tyriti-ki roimyhÿre? Timybo tuu man-arybekre. ²⁷ Tii tahe diwyònyde timybo tyriti-ki roimyhÿre myna:

—Deuxu adinodureny, ibutumy awo-ribi iluuke, ibutumy arayky-ribi aruruna-ribi, ayky-ribi heka iluuke. Tule ibutumy iny ixiwesemy idi atximahãke.

²⁸ Tai tahe Jesuisi tamy rarybere:

—Kai inatyhymy tarybeteri tai inatyhymy mahenykre biu-ò.

²⁹ Kia hābu heka rexiòbitinykemy idi ratxireri. Taita rarybere Jesuisi-ò: —Mobota waeryre? ³⁰ Tahe Jesuisi ikò relyyre iyyymy. —Judeu mahādu hābu heka ratỹinamyhỹ Jerusalē hāwā-ribi, Ijeriò hāwā-ò. Iribi tahe kia wasidu mahādu rimyrenyre. Inieru ibutumy iribi ritarenyre. Ityy hỹre raòhòtere irubudỹyle rasiranyre ririre. Tahe ruruòki rỹimyhỹ. ³¹ Aōma judeu xiwenawahidỹduò heka idi rare. Tahe hābumy robire. Idi hābu-ribi irehemy rexiemy reare. Tahe tỹtxi rerikòle rare raty resere. ³² Hābuò rehemynyre tiie-ki dohodỹỹna wiòhedỹỹduò rare, Levita wahe. Tule ratyresemy ririre. ³³ Tahe ijò nade Samaria bedē hāwā luduò heka rare. Judeu mahādu heka Samaria mahādu luukōre. Idi tahe kia judeu mahādu roimyhỹ. Tahe Samaria mahādu hābu sōwemy riruxetòenyre. ³⁴ Idi tahe tamy rexitỹmynymy tahe iwotōmona rituahinymy ritaataamy iwotōmona. Idi tahe ka hābu relyymy idi rare. Aōma ijumenta tyre-ò ritidimy. Idi rare rirarehu tahe heto-ò ritidikremy ririkremy ridymy heka idi rare. Rummy heka ritòenyre hykyky idi bedē nade awimy risỹnykemy. ³⁵⁻³⁷ Rudile heka heto òwy-di iwedu-ò heka nieru riwahinyre riòwynyre inatxi womati nieru. Tamy rarybere: —Biwiòhenanyre idi mabekre adòòsekre riròkre. Moma arỹnaderenykre Arỹnadebenykre heka adiòwynykre adòòsekreu wahe. Ka hābuhe rarybere: —Hābu bireludu ratxireri. Kia taruxetòenyreri tiòsinyre waha tieka idi hābubireludu ratxireri. Wimy raòludumyhỹre hārele taheka riwiòhenanyre. Jesuisi tamy

rarybereri. —Iwesele biwinykre iweseka hābu riwinyra weselemy biwinykre. Kai aōhebo botỹỹtyhy mahake. Iwesele wahe. Jesuisi rỹỹraxire: —Mobo hābu aōtxino biōwa rare? Mobo ibireludu wahe? Bede ywina erydu tai rirawyònyre: —Iwiòhedỹỹdu wahe.

³⁸ Jesuisi, ijō mahādu-wana ròirenyre. Hāwā-ò rirònyrenyre. Hāwyyō rare Marta inire. Tahe ridyre tasỹ-ò tai ratxirenykemy. ³⁹ Tahe Marta heka iseriòre dire. Marie inire. Marie urile ibire-txi ronyra aōbo tarybeke roholakelemy.

⁴⁰ Marta heka raelelemy ratxireri. Aōna aōnale rotỹỹnymyhỹle riwinymy taile rare ratximyhỹ. Tai tahe nade Jesuisi-ò rarybere: —Jikarỹ sohojile wa watxireri waseritxòre riwawikòhenanykòhykyreri. Kai anobohe kòbitimy tai tahateri. Tamy marybeke riwawikòhenykeny.

⁴¹ Tai tahe Jesuisi he tamy rarybereri: —Marta, Marta, aōherekibo kai taelelemy teamy atxiteri? ⁴² Sohoji aōmydỹỹnale heka awire. Marie awityhy aōmydỹỹnana ixidee rimyre. Kia moo iribi ritaōtyhy. Riwinymyhỹ awityhyreki wahe. Tamy rarybeōtyhyō wadee roholarereri iribi ariòlòdỹỹnyke wahe.

11

¹ Tiutxubo Jesuisi rexitòenymyhỹre, iny rieryōlemyhỹre. Jesuisi rexihudi, ijoi rarybera: —Biwaerynanybenykre iwese textitènyteri wese, Joaō tahe taijoi riernanyre. ² Tai riernanyre. Kai bexitòenykeki, kawese marybekre:

—Waha, ani ibutumy tamywimy. Wylemy my-nake iny òlòdỹỹmy.

³ Rÿsÿna txuõ txuõlemy biwahinybenykre.

⁴ Inyòraruna biixãwidinykre, iny iwitxira-dori taòraruna ariixãwidinykre. Waatysyrenyõmy òraruna-txi.

⁵ Jesuisi heka taerydÿÿna mahãdu rierynanyre ijyy-di: —Kai arÿsÿnaõmy bonykeki, abiòwa-ò make ruetya rexitòedÿÿmy rÿsÿnaõ huòtemy bidiwykemy: —Wy, ahina inataõ wadee bidihuòteke.

⁶ Wabiòwa rehemynyreri bedetÿi-ribi. Aõ heka wawahisidÿÿkõnare.

⁷ Tii òsana myÿ adee rarybekre: —Wadee ixitòedÿÿõmyke ruetyahakÿmy. Arÿiòtyhy waherina-ribi rexiyrubunymy heka rãireri. Ibutumy iny heka ròrõmy rÿireri. Uladu, tule iumy ròrõmy rÿireri. Wadee ixitòedÿÿõmyke.

⁸ Rexitòenyhyhyhy tai hyhyhy rÿikeki tai ihãrele rÿike. Abiòwatòenamy aõkõ kÿnyhe rÿike. Texitòenyterikile rÿike.

⁹ Tai heka adeereny rarybereri. Bexitòenykeki, biwyke. Biijeke aõbo teijeteri, tai tahe mahake. Ijòtòbòna bihetenyke tahe adee riraynymy tahe malòke. Tai tahe adeereny rarybera. Ibutumy rexitòenymahãke, tamy riwahinymahãke. Ibutumy iny riijemahãke, tai rahake. Iny rihetenymahãke riraynyke.

¹⁰ Tai adeereny rarybere: —Ixitòedÿÿki iny aõ rimymyhÿre. Aõitxe-ki aõtxi ijara rÿimyhÿ. Ijò-di ròtemy ijara-ki iny ralòmymhÿre. Ijò-di ròtemy ijara-ki, iny ralòmymhÿre.

¹¹ Uladuõ tyby-ò uturamy rexitòenykeki aõbo, hemylalaõ tyby tamy riwahinyke irÿsÿnamy? Timyki tuukõna! Kaiboho kiamy aõbo botÿÿnybenykre? Timyki tuukõna!

¹² Uladuõ tyby-ò hãniesimy rexitòenykeki aõbo, itytibòrò tamy riòkre. Timyki

tuukõna! ¹³ Kaiboho aõbina binahakỹdile tahõtínymahãtenyťe, aõwihikỹ aõbohe ariòrereny-ò biwahinyke. Boreny aratyre heka bede rieryke, Deuxu wahe. Tamy bexitòenybenykeki, tii Deuxu Tyytybytyhy adeereny riwahinyke.

¹⁴ Ixityre tasỹ hãbuõ raremyhỹ irybeõmy. Jesuisi taile ratximyhỹ tahe tyytybybina riòlòdỹňnyre iribi. Iu tyytybybina iribi rohonyreu tahe, hãbu rarybere kia rybeõmy ratximyhỹré wahe. Tahe iny sõwehekỹ mahãdu sõwemy idi rabedeòtiimy rỹire. ¹⁵ Inyõ tahe, inysõwehekỹ yluduõ tahe kiamy rarybere: —Kia diabo ruru-di, Belisibu ruru-di heka iribi riòlòdyňnyre. Tii tyytybybina mahãdu wedu rare. ¹⁶ Ijõ tamy rarybere: — Jesuisi, araeryrenykre inihe aõ biditeòsinykre wadeereny. Inatyhy aruru biuludu ratximyhỹre. Widỹňnaõ inihe wadeereny bitỹňnyke kialemy heka rarybemyhỹre urile riurihimy tamy aõ itxerenamy riwinykelemy. ¹⁷ Jesuisi tahe rierymyhỹ aõmybo raraykynymyhỹreny. Tai heka tamy tuu rarybere: —Kia iny mahãdu wiribi hitximy raraykywydynykeki, tii tahe rexihuke itueke, sỹ mahãdu tule wahe. ¹⁸ Timybo Satanasiboho bede widee ribinanymyhỹrenykeki, awityhymy roirekre. Jiarỹ araeryrenyreri timybo taraykynytenyteri. Aõma Satanasi ruru-di tyytybybina ariòlòdỹňnykemy tarybetenyteri heka reeryreri. ¹⁹ Kia riki ariwinykeki, kaiboho tule wawesele tewinytenyte. Timybo? Mobo awiòhedỹđdureny rare? Satanasi aõbo? Kaiboho boibenyke igitòedỹđmy awiòhedỹđdureny-ò. ²⁰ Jiarỹ Deuxu ruru-di ariòlòdỹňnykeki, kaiboho

bexiijebenyke, Deuxu Iòlòna tahe adeereny iòhòra. ²¹ Hābu deburehekỹ tadebòna-di

taheto riyrubunykeki, rexytyhynymy ronyke. Iaõmydỹyna ibutumy iyrubudỹynamy rỹike.

²² Tahe ijõ kedehemynyke iratyre teburetyhy, tahe iaõmydỹyna ibutumy iribi riwyke. ²³ Iny

wawana aõkõ ratxirerimy ihỹre, tii heka waribi hitximy ratixmyhỹre. Iny wawana aõkõ ratxireri, tii tahe aõtxile ramyhỹre ixideòna.

²⁴ Jesuisi ijõ iyyy relyyre: —Iny-ribi tyytybybina ròhònymyhỹreu, tii heka rake ixitawo-di rake titxibo.

Rubumy rarunymy rake. Bedeõ-ki rahakeki tahe, rõhõtynyke. Aròòsekre, tikibo rarawãhãòle.

²⁵ Ixyby kòdòòsekeu tahe, isỹ ibutumy, tytymy roike iruxeraõ. ²⁶ Idi ixityre ijõ rimyke debò inatxi reurò tyytybybinaõ.

Idi tahe tamy rasỹnyrenyke. Iratyre tyhy wahe ibina. Iu kia ixisohojimy tyytybybina-di aõmysỹdỹmy raremyhỹu tahe,

ihewo-ribi rimyra tahe iroona-ribi tahe aõnityhymy releke. Ibinatyhymy tamy rare.

²⁷ Iribi tahe hãwyyõ ryryre ibutu ijohonamy: —Hãwyky heka aratxurananyre, aratibienyre heka iny bedekòby rare.

²⁸ Tahe Jesuisi rarybere: —Deuxu Rybe tyhydỹỹdumy iratyre wadee awire. Deuxu deysanamy tamy kanakemy idi watxireri.

²⁹ Idi tahe inysõwetyhymy dehemynyde Jesuisi-ò. Jesuisi kiamy rarybere: —Iny heka kia mahãdu ibinatyhymy rỹire aõwihikỹle heka riijemy rỹire.

Itxerenaõmy robikre ratxireri tahe itxerena Jonasi-ribi nadelemy tahe robikre. ³⁰ Jonasi heka Ninive hãwã mahãdu-ò itxerenaõ heka tii rare.

Tule jiarỹ heka Deuxu Riòre Hãbutyhyhykỹ

rare wijinabòdu mahādu dee itxerenaõ jiarỹ rare. ³¹ Ibòò mahādu bedede konana-ribi iòlò hāwyy Salomaõ bedede eryhykỹ-ò ijōhonamy irehe-ribi nade. Wijinabòdu mahādu taheka naōhyymahāde wadee ijohonamy. Salomaõ ratyre heka jiarỹ watxireri. Ikonana txu tahe ibòò iòlòhāwyy rỹikre rarybekremy. Tii rarybekre: —Anoherekibo Jesuisi deramy teakamahātenyte wahe. Timykibohe irybe bedekeryna-kò ijohokuna rỹikōmyhỹreki wahe. ³² Ninive hāwā mahādu tule rỹikre rarybekremy iwesele. Jonasi rybe tỹnydỹna-ki rexirāhĩrenyre. Kaki heka Jonasi ratyre hābuõ ratximyhỹre, jiarỹ wahe. Wadee ijohonadu aõkō heka toite.

³³ Moheka loosōnaõ rideōhyymyhỹre heri-narawo-txi toosò iwasihiikỹmy roosōmyhỹkemy. Tiiemy heka biuòhyy rademyhỹre ibutumy bedede ratỹnymyhỹkemy. ³⁴ Arue umy dori itỹnymy roimyhỹre. Arue awikeki heka ibutumy aumy awikre. Arue ibinakeki tasỹ aumy heka bedelorokile rỹimyhỹkre. ³⁵ Awo toosōmy ratximyhỹre wana, bexiijemahāke. Aumy biemahāke bedeloro-ki rurunyhenny. ³⁶ Bedelorohokỹ aumy-ki rỹiōmyhỹre wana, tai tahe boosokre ibutumy titxibo bedede-txi mamahākre wana.

³⁷ Jesuisi kiamy rarybereu tahe, fariseu mahāduõ tamy rarybere: —Manake wasỹ-ki rikiroxikremy. Tai tahe Jesuisi rare, ralore, ronyre roximy. ³⁸⁻³⁹ Jesuisi ronyreu, tebò risuhòõre. Tai tahe idi bedede riòtiinyre. Jesuisi rarybere: —Kaiboho fariseu mahādu, ibutumy heka texisuhòsuhòmahātenyte. Ebò

tesuhòmahâte, aumy ibutumy tesuhòmahâtenyte. Webòròsityyludu wahe. Kaiboho heka isuhukỹlemy toimyhỹte ibutu aõikõkõ-di isumy roimyhỹre aworeny-ki. ⁴⁰ Iu heka òbitimy taraykynytenyõhyymahâtenyte. Deuxu heka iwebro ludu riwinyre, inatyhy? Tule aworeny, araykyreny wana riwinyre. ⁴¹ Iny aõkõ mahâdu-ò maruxetòemyhỹbenyke. Tai tahe byranybenykre heka. Ibutumy awo-ki, ahana-ribi tule ryranykre.

⁴² Kobe làhàxe kaiboho fariseu mahâdu. Kaiboho Deuxu dee tewahinymahâtenyke uriõno. Debòwiò aõ tetatenywana heka, sohoji tewahinymahâtenyte. Tule aõmydỹnareny aoworoludurenyõ tewyteny wana, tule tewahinymahâtenyte. Kia awire, biwahinymahâbenyke. Urile tahe teerytenyõhyymahâtenyte Deuxu luuna, Deuxu òbitina. Biwahinymahâbenyke heka Deuxu dee aõmydỹñaõ. Tii tahe awire. Tule nohõti losarenyõmyke, luuna, òbitina. ⁴³ Kobe làhàxe kaiboho fariseu mahâdu. Dohodỹña heto luureny ikoòhòkỹle heka torokomahâtenyte. Kaiboho arybedỹnareny-ki awimy tahamyhỹtenyte. ⁴⁴ Kaiboho kobe làhàxe. Wobrona wesemy toite. Iwese iny rubuhãloo tyremy iny rariamyhỹre wese ierykõnamy, kiawesele toite.

⁴⁵ Bede ywina bede erydỹduõ heka tai ratximyhỹ. Tii tahe Jesuisi-ò rarybere: — Erydỹdu, kai heka aõbinahakỹlemy wamyreny tarybeteri, kia wese rybe-ki. ⁴⁶ Inatyhy rare. My tahe Jesuisi risỹnyre: —Inatyhy dori tule bironybenyke aõhòkỹmydỹñana. Iny dori adeereny rarybemyhỹre iny rybe bityhynymyhỹbenykemy

tahe ihãrele tetyhynyõhyymahãtenyte. Bede ywina ritidỹyna tewinymahãtenyte, ihãrele tahe tiu heka tetyhynyõhyymahãtenyte. ⁴⁷ Kobe làhaxe kaiboho, alahireny, alabiereny wese toite. Iwese tiiboho Deuxu rybedu rirubunyre wese kaiboho toite. ⁴⁸ Kaiboho rubudỹỹdumy toite. Òbitile tewinymahãtenytelemy ixidee tahõtinyinmahãtenyte. ⁴⁹ Deuxu tahe rarybere umyrenymy wahe: —Tahe jiarỹ aditeònykre heka Deuxu rybedỹỹduõ tule Deuxu deòdỹỹnaõ heka aditeònykre. Imahãduõ birubunybenykre ihona tahe biteònybenykre. ⁵⁰ Kaiboho heka bede òrarumy boibekre kia rubudỹỹ òraru erydumy wahe. ⁵¹ Abeli hãlubu txiwina tahe xiwena hure rubuna. Idi tule Zacaria hãlubu txiwina wahidỹỹna bire-ki heka Deuxu hetobire-ki. Kohe, ihure rubureny òraru-ki aõhõkỹhỹkỹmy biòwynybenykre. ⁵² Kobe làhaxe, kaiboho bede ywina erydỹỹdu mahãdu, bedeeryna ijò rayna dinoduboho wahe. Kaiboho tahe terònyõmy bede eryny heto-ò. Tule inywitxiraõ tetòenytenyte iròte lau.

⁵³ Jesuisi ròhònyreu, teburemy tiiboho rityỹraxinymyhỹre aõna aõnamy. ⁵⁴ Tuu ròtỹỹraxidỹỹmyhỹre timykibo rirutaõnyrenykemy.

12

¹ Sõwemy iny tahe ributunyre. Ube tahe rỹximy ratxireri. Tahe juhoo Jesuisi taerydỹỹdu mahãdu-ò rarybere: —Fariseu mahãdu, saduceu mahãdu urina biebenyke. Tiiboho dori ruidu mahãdu roire. ² Wasimy wiji adeereny relyyre. Tiu ta ibutumy iyyynamy rỹikre ³ Aõbo wasimy

wiji taholate heka ibutumy biurasòmý ratỹnykre.
4 Uritere iny lau brebuõmyke. Aumyle tii rirubunykre. Ijõ ibinamy adee aõkõ tii rotỹnykre.
5 Iny lau sohojile breburenyõmykre. Deuxu lau ta buberukre. Tii dori atyytyby bede bina-ò rahuke ixideewikeki. 6 Nawiiõ kaiboho bidymyhỹbenyke iòwy riòre iny heka riwymyhỹrekre. Ibutumy heka Deuxu nawii rieryre sohoji sohojimy.
7 Deuxu ara erymy heka aõma arati-ki tiwesebo aradeti rỹimyhỹre rierymyhỹre. Brebuõmyke, aõma Deuxu heka anaerymyhỹre nawii sõmo ratyre heka rierymyhỹ. 8 Kai marybeke: —Jiarỹ Deuxu retyhynyre dori tahe umy arelyyke Deuxu ýjukomy rarybeke biu-ki wahe, jiarỹ Deuxu Riòre Hãbutyhyhykỹ wahe. 9 Iny sõwehekỹy-ki riwatxiõnykeki tule aritxiõnykre jiarỹ Deuxu ýjuko-ò. 10 Inyõ Deuxu Riòremy aõbina binamy rarybekeki, irybe-ribi nohõtilosa rỹikre. Deuxu Tyytybytyhymy tahe inyõ ibinabinamy rarybekreki tahe, aõhõkỹmy rotỹnykre irybe òraru-ki. 11 Aramykeu heka uritere nohõtiõmyke aõmobo marybekremy ywisidỹỹna-ki. Bede heka ariwahinykre rybedỹỹnanau. Rybeõmyke ikotyre. 12 Kai ixiwanaale aõkõre marybeke. Deuxu Tyytybytyhy arãwiòhenanymyhỹreny.

13 Hãbuõ inysõwey-ki tahe Jesuisi-ò rarybere: —Wanyrỹ, Waha rurura. Waseriòre tahe ibutumy waha aõna aõna riwyraxidee sohojile. Tamy marybeke wadee ritxuranykemy. 14 Jesuisi tamy rarybere: —Hãbu, kia waaõmydỹỹna aõkõ rare. Timybo ayreny-ki araywisidỹỹnyke? 15 Tahe Jesuisi ibutumy iny-ò rarybere: —Warybe-ò bodoho-

labeledenyke. Ixityhyõmy! Arutyhy heka aaõna aõna-ki aõkõ rare aõna aõna sõwerẽhãre. ¹⁶ Tahe Jesuisi ijyymy ròkewesenadỹỹre: —Hãbutyhy riki ioworu nihikỹre. Tahe sõwemy rỹsỹna ributun-
yre. ¹⁷⁻¹⁸ Iheto tahe iyjare ibutumy ributunykemy. Tahe ixidee rarybere: —Aõhebo arotỹỹnykre? Waaõnaheto butumy aritxiwikre. Ijõ iribi in-
ihikỹmy ariwinykre. Tai ibutumy waaõwiwi. tamy aridekre. ¹⁹ Tai tahe ibutumy waõwiwi-di areysakre. Arexielehynykre, ariroxikre, ariõkre. Waruhyy areysakre. ²⁰ Deuxu tahe kia hãbu-ò rarybekre:

—Hãbu itxỹtere. Kai wijirulemy burukre. Tai tahe mobo aõna rimykre.

²¹ Jesuisi taijyy rihure rexirybenymy. Kia heka aõhebo rotỹỹnyre iny ityhy mahãdu. Tiiboho dori Deuxuòle ityhymy aõkõ ihỹrenyre.

²² Kia heka Jesuisi taerydỹỹna mahãdu-ò rarybereri. Uritere nohõtiõlemy arỹsỹna tule atyymy, idi matykynykemy. ²³ Aumy heka rỹsỹna ratyre aõnityhy ratximyhỹre. Aumy heka atyky ratyre aõnimy ratximyhỹre. ²⁴ Nawii-di betehebenyke. Tiiboho heka ioworuõrenyre. Tarỹsỹna riyrubunyõhyymyhỹrenyre. Deuxu heka nawii riyrubunymyhỹre, irỹsỹna tamy riwahinymyhỹre. Kaiboho tahe nawii ratyretyhy toite Deuxu dee. ²⁵ Sõwetyhymy maraykywydynanykeki aõbo arumy arirarehemy mariake? Aõkõre! ²⁶ Kia aõ iyjare tahe Deuxu-ò. Kia biwinybenyõkeki, aõherekibo ijõ aõna aõna nihikỹ-di tahõtinymyhỹte? ²⁷ Beteheymy inihe noijasa-di. Aõma tiiboho raaõmysỹdỹỹõhyymyhỹrenyre. Ihãre tahe

iruxerarenyre ityy wiwihikỹrenyre wese. Tyy ixidee riwinyõtyhy Deuxu rityyny wihikỹ heka tyy wihikỹ tamy riwahinyreri. Salomaõ heka ityynihikỹ rare. Ihāre tahe ityy heka awityhymy aõkõ noiròsò wese. ²⁸ Deuxu heka noijsa rityynymyhỹre kia wijilemy idi ihỹre. Biurasòmy tahe ixāwimy reamyhỹre. Tii heka tyy adee kidiwahinykre. Tai tii atyyreny. Tai ta ixinohõtiyredỹỹrenyõmy. Aõherekibo ainatyhyna ibutere? ²⁹ Tahe raykyõmy nohõtiõmy titxiribibo arỹsỹna adee kanakredi. ³⁰ Tyhydỹỹdukõdu mahādu heka tuure. Inytybyreny heka rierymyhỹre aõmybo tarumahāte. Ibutumy heka arerymyhỹre aõmybo teamyhỹte. ³¹ Tii Deuxu aõmy dỹỹnana sohojidile maraykynykeki heka tii ibutumy adee riwahinykre. ³² Brebuõmy ahābenyke wariòreboho. Deuxu Iòlòna adee kanakemy, Deuxudeewina wahe. ³³ Aaõna aõna-di bohonybenyke. Iòwy tahe iaõkõdu mahādu-ò biwahinyke. Anieruhyna wiwihikỹdile boibeke. Kaki ibutudỹỹlemy heka biu-ò bibutunyke. Tai heka judòera aõ riròõtyhy tule rararyõtyhy. Tule tai wasidu ralòõtyhy. ³⁴ Tikibo aõwireny rỹikeki, tai heka araykyreny ratximyhỹre.

³⁵ Ijõ tahe Jesuisi rarybere: —Kaiboho bexiywinybenyke, ibutumy aõhebo rotỹỹnykremy bexiywinyke. Awereysanareny-di atyky beximye. Aloosòna bitoonyke. ³⁶ Deòdu mahādu wesemy boibenye. Bexiywinybenyke awedu dehemynyna-ò, tii worana bedehesi-ribi rehemynyremy wahe. Iu rehemynyreu, teòdu mahādu heka ijò riraynyke. ³⁷ Tiiboho

riraòrenykeki, deysamy rỹikre. Iwedu dori reximykre ityky wereysana-di tahe rỹsỹna teòdu mahãdu-ò riwahinykre. ³⁸ Tii ruwetyakile rehemynykeki, deòdu mahãdu reysakre. Tiiboho dori rexiraòmy rỹimyhỹrenyre. ³⁹ Tai heka iny rexiywinymy rỹimyhỹkemy rybe roimyhỹre awedureny kanakreki. Aõma hãbuõ kanakeki heka tiu aõma hãbuõ itxeredumy ronykeki heka, tiu hãbuõ iribi rawasinyõtyhy. ⁴⁰ Kaiboho tule bexiywinybenyke wadehemynyna txu heka biijemy bonymyhỹbenyke.

⁴¹ Tahe Pedro rarybere: —Wanyrỹ, kai wadeerenyle ijjymy telyyte ada ibutumy iny-ò aõbo telyyte? ⁴²⁻⁴⁴ Tahe Jesuisi riwyònyre: —Aõtxile inyõdee, tibo deòdu taaõmysỹdỹỹna riywinymyhỹre, kia idinodu tai awimy rahamyhỹre tii dori rỹsỹna òbitimy riòriõmyhỹre. Idi tamy aõwiwi riwahinykre taaõna aõna-di itxeredumy tule risỹnykre. ⁴⁵ Tii iwitxiramy rexiraykynykeki tahe, ijõ teòdumy raòhòtemy urile idi risinymy kamy rexirybenymy: —Wawedu dori wiji aõkõ rarerikre. ⁴⁶ Tai ierykõna-di iwedu kedehemynykre. Tuu rierymy iaõmysỹdỹỹna-ribi ritamy aõhòkỹmy risỹnykre ityhydỹỹdukõdu mahãdu wese. ⁴⁷ Deòdu tawedudeewi rierymyhỹre. Tai heka tuu rotỹỹnyõkeki, tii tahe sõwemy aõhòkỹmy rotỹỹnykre, òhòtemy wahe, tamy riywinyõreki. ⁴⁸ Ijõ deòdu tahe tii iwedudeewimy rieryõkeki, tii tahe aõbinamy riwinykeki, tamy tahe urihimyo òhòte tai rỹikre. Inyõ sõwemy ityhykeki, sõwemy ijõ iny tamy rexitòenykre.

⁴⁹ Jesuisi ijō rarybere: —Heòty-di bede ariworonykemy heka jiarỹ anade. Tii òte raworonykemy idi watxireri. ⁵⁰ Jiarỹ ratisebenaōwesemy aralokre. Arurukre dori. Ele elemy rỹikemy ixi-di watxireri. ⁵¹ Kaiboho tahōtinyte wadehemynyna-di. Ywina adiwydemy wadi tahōtinyte. Aōkōrehe, bede jei jeidỹỹmy anade iribi widee rahitxihitximy rỹikemy. ⁵² Iruyre inysỹ mahādu heka widee rahitxihitximy rỹikre. Inataō iny iuhe òludumy rỹikre. ⁵³ Hābu mahādu heka tyby òludumy rarekre. Hāwyw tule tadi òludumy rarekre. Iriokorese heka tariòrelahi òludumy rarekre.

⁵⁴ Ijōmy Jesuisi rarybere: —Iu biuwetyky biura-ribi ròhònyreu, Kaiboho kia rybemy tarybemaḥātenyte biu kòdòakre. Inatyhymy biu ròamyhỹre. ⁵⁵ Tule tarybemaḥāte. Yhy ibòò-ribi rebonyreu, bede ratòteekre. Inatyhymy tuu ratòteemyhỹre. ⁵⁶ Itxenadỹỹdu mahādu! Kaiboho kia terymahātenyte bede, biu aōmydỹỹna tule iwitxira aōmydỹỹnana teerytenykhōlemahātenyte, bededỹỹnana konana erna wahe. ⁵⁷ Ijō Jesuisi rarybere: —Kaibohole teywinyōmyhỹtenyte, aōòbitinamy wahe. ⁵⁸ Aōòrarumy heka aòludu umy rarybekeki, idi ywisidỹỹna ube-ò aradykemy ratxireri, tii-wana widee marybeke idi widi bede biòbitinykemy. Aōkōkeki, tii aradykre ywisidỹỹdu-ò idi ròtenawo-ò soldado mahādu araròtenykre. ⁵⁹ Tiu heka aòlòkōmy heka mabekre. Ibutumy iòwy biòwynyke xiery bòhònyke.

13

¹ Tahe inyō Jesuisi-ò relyyre: —Pilato

rybemynamy Kalileia mahādu rururenyre Deuxu-ò raxiwerenyrieriò. ² Kia ta Jesuisi narybede: —Kaiboho timybo irubureny-di texi-nohōtinytenyteri. Ijō wiratyre raðrarunanyrenyreki aōbo? ³ Ture aōkō, kaiboho bexirāhīōbenykeki tule burubenykre irubureny wese. ⁴ Iasỹse ijō. Iu Silòe hāwā mahādu tyre heka heto rarie resereu 18 iny sōwe rirubunyunyrene. Arāỹraxikre Jerusalē hāwā mahādu ratyre raðrarunanyrenyreki aōbo? Aōbo tahōtinytenyteri? ⁵ Kaiboho bexirāhīōbenykeki tule burubenykre irubureny wese.

⁶ Tahe Jesuisi kaa ijyy-wana rikewesenanyre, Figoratyò wese heka. Tahe Jesuisi kaa ijyymy de-lyyde: —Hābu oworu-ki figoòò rỹimyhỹre. Tii iraty dilawijunyde tiubo. Tahe iraty-txi reakōre. ⁷ Tahe hābu taoworu-di itxeredu-ò narybede: —Inataō wyramy relawijunyre tahe aōkōhyra. Urile ta biòròkre. Iraty ihoōreki, awi aōkō rare. ⁸ Tahe oworu-di itxeredu dirawyònyde: —Wawedu, txioini kawyramy idi warukikre, isu ariywinykre. ⁹ Aōkōhykreki tahe urile raorokre ijō wyrau.

¹⁰ Judeu mahādu elehyna txuu Jesuisi rotohodỹmyhỹ judeu mahādu dohodỹna heto-ki. ¹¹ Tai ta hāwyyō ratximyhỹ. Tii 18 beòra webinadumy ratximyhỹ tyytybybina òraru-ki. Tii iumy rarabunymy rariamyhỹre. Ixitaradỹ risiranymyhỹre. ¹² Jesuisi tuu robireu, tamy narybede: —Hāwyy, kai heka teytemy tate. ¹³ Tahe Jesuisi tebòmy rimyre iuleta reytere. Tai tahe hāwyy heka Deuxu riwowydynyre. ¹⁴ Dohodỹna heto wedu tahe ibinamy Jesuisi-ki rahare, judeu mahādu elehynatxureki wahe. Takamy

inyreny-ò narybede: —Debò sohoji reurò txumy aõmysỹdỹĩnamy rỹimyhỹre iu heka adeytemy ixi-di bòdòimyhỹke, judeu mahãdu elehynatxu ta aõkõre. ¹⁵ Tahe Jesuisi dirawyònyde: —Kai, itxenadỹĩdu tate uriteremy iximy rybedu. Kaiboho judeu mahãdu elehynatxu dori abroreni, aawaru heto-ò toimahãte tuu teesenymahãtenyte, tedymahãtemy idi ibemomodỹĩmy bidybenykremy.

¹⁶ Kaa heka Abraõ riore riòreõ heka Satanasi 18 beòramy rimyre. Aõherekibo ta iribi retarakı sabadotxu ibinamy tahateri. ¹⁷ Tahe Jesuisi òludu mahãdu raixỹrurenre Jesuisi rybe òraru-ki. Tahe ixỹ mahãdu awityhymy tai rahamyhỹ iòraru-ki. Ibutumy reysarenre.

¹⁸⁻¹⁹ Tii rarybera: —Deuxu Iòlòna wexe aõwesere. Aõ-ò wexe rikiwesenanyrenykre. Tiwexe ijyy kawesere? Deuxu Iòlòna heka alòbòròna sòmo sòmo wesemy ratximyhỹre. Raumynyreu heka òwòru rariwesele relemyhỹre. Nawiile tuu rỹtỹnymyhỹre kia òwòru-ò.

²⁰ Ixityre tamy rarybere: —Aõ ijyy wese heka Deuxu Iòlòna rare. Aõwexe rikiwesenanyrenykre. ²¹ Paõ ixiòlòdỹĩna wese rare, iuri rare. Hãwy paõ riwinymyhỹreu, inataõ urihixina-ki iuribemy riurinymyhỹre. Tai tahe raubỹtỹmyhỹre, rexiòlònymyhỹre.

²² Jesuisi tahe Jerusalẽ hãwã-ò rareu, hãwã hãwãmy rotohodỹĩmy. ²³ Iu inyò rityỹraxinyre: —Wanyrỹ, Hedu mahãdu we sòwekre aõbo? ²⁴ Jesuisi tamyreny narybede: —Bexityhynybenyke ijòyja-di birònybenykemy. Sòwemy iny tahe ròtemy reakre tahe ralòõhykre. ²⁵ Hãbuõ kie

taheto ijòtòbòna ritòbònyre. Iu kaiboho uritere bydyrydenykre: —Wanyrỹ, aralòrenyke ini. Kiata tii anawyònydenykre: —Tiludubo toite, araeryrenyõre. ²⁶ Kamy ta bidiwyònydenykre: —Inybohòle riroximy roiremyhỹ. Wahãwãreny-ki tòbedeerydỹỹmyhỹ. ²⁷ Ixityre anawyònydenykre:

—Boibenyke aõbina bina widỹỹdu.

Tiludubo toite dori reerykõre. ²⁸ Deuxu iòlò-ki Abraõmy, Ijaimy, Ijaõmy, tule ibutumy Deuxumy rybedu mahãdumy bobibenykreu, kaiboho malòbenyõtthy. Tai hii, ibru, jumytata rỹikre.

²⁹ Iny ibutu bede bede-ribi, Ibòò-ribi, Iraru-ribi, Biura-ribi, Beà-ribi Deuxu iòlò-ò hãwãmy.

³⁰ Kiaremy ta, koludu mahãdu heka ibutuhewomy kedeakre. Ikõmyta, hewoludu mahãdu, koludumy kedeakre.

³¹ Iu ta fariseu mahãdu Jesuisi-ò narybedenyde: —Mahenyke, Herodi dori arubudỹỹmy araijereri.

³² Jesuisi dirawyònyde: —Bòòsebenyke kamy ijòrò-ò marybebenykre: —Jiarỹ tyytybybina iny-ribi retareri, tule ròteytedỹỹreri wiji biurasòmmy. Ijõ txumy ta waaõmysỹdỹỹna arihukre. ³³ Kiaremy ta kia rewinyreri arihukre. Deuxumy rybedu dori Jerusalẽ hãwã-ki sohojile rurukre, iwitxira hãwã-ki ta aõkõre.

³⁴ Jerusalẽ, Jerusalẽ hãwã, amahãdu heka rirubunyunyke Deuxu rybedu mahãdu wahe. Iwese hãnie tariòre ributunymyhyre wese terawo-ò, kia wesele arayrubunykeny rexinohõtynyre tahe kaiboho terarenyre. ³⁵ Aheto-ribi heka Deuxu rexitakre.

Kaheka ararybekre adeereny: —Wamy heka bobiõtthy ixityre. Tiutxumy kamy bexirybenykre bede-ò, myỹ:

—Deuxunimy nodu awityhy heka rare. Kiaule wamy bobikre.

14

¹ Sabadoõu Jesuisi heka fariseu mahãdu wedu mahãduõ heto-ò ralore roximy. Tahe iny idi retehemyhÿreny. ² Iu inyõ taruti, tadera-di taritari-di tamy dehemynyde. ³ Tahe Jesuisi narybede bede ywina erydÿÿdu-ò, fariseu mahãdu-ò: —Sabado txuu deytedyÿwe awire aõbo, aõkõre aõbo. ⁴ Tiiboho rirawyõnyõhyyre. Tahe Jesuisi hãbu riteytenymy bede riywinyre iribi tahe riòlòdÿÿnyre. ⁵ Ixyby narybede Jesuisi: —Txibo kaiboho ariõreõ ada abroreniõ hãloo-txi resekeki, bitabenyke Sabadotxu hãrele. Aõhe inatyhy. ⁶ Tiiboho rirawyonyõhyyre.

⁷ Tahe Jesuisi roxidu mahãdu-di retehemyhÿre. Tiiboho dori rynana wihikÿ-txi rononymhÿreny. Tai kamy tamyreny rarybere: ⁸ —Txibo inyõ bedesanaõ araarikeki. Uritere rynanawi-ò rÿõmykre. Txibo dori inyõ aratyre ityhy kanake lau. ⁹ Tukeki bedesa dinodu inyõ aratyre-ò arynana-txi ronykemy adee kanarybekre. Tai tahe maixÿrummy rynana bina-ò bonykre. ¹⁰ Kialemyta inyõ araarikeki, rynana bina-txi bonykre. Tahe bedesa dinodu adee kanarybekre: —Wy, katxi bodonyke rynanawihikÿ-ò. Tai tahe kai mabedesakre ibutuko-ò. ¹¹ Tahe ixityhydÿÿdu mahãdu uritere reakre. Kõmyta uriixi dinodu mahãdu rawowydykre.

¹² Tahe Jesuisi bedesa dinodu-ò rarybere: —Txibo roxina biwahinykeki, uritere asÿ mahãdu, aery mahãdu, ityhy mahãdu aarixiõmykre.

Urikō-ribi iwese teariteri wese araariheny.
¹³ Tukōmyta roxi biwahinykeki, uriteremy rŷira mahādu, iny tiere mahādu, iny ruetà mahādu biarikre. ¹⁴ Tai adeysatyhymy mabekre. Tiiboho dori tiu ixiwesemy araariōtyhy. Deuxu tahe aòwydŷŷdukre iu bede awikre.

¹⁵ Ijō roholare Jesuisi rybe tai tamy rarybere: — Deuxu Iòlòna-ki, òwòrubese rŷdu mahādu reysamy rarekre. ¹⁶ Tahe Jesuisi rarybere: —Inyō roxina nihikŷō riwinykemy ratxireri. Sōwemy iny rito-binyre. ¹⁷ Rexihumy rŷireu, teòdu mahādu bede riywinyre iny kididykremy. ¹⁸ Sohoji sohoji tahe tarybe tamy riwahinyre. Ijō taoworu tŷmyra-ò reteheke. Ijō kanaōtyhy heka. ¹⁹ Ijō tahe broreni debòitue riōbranyre tai riurihikreki kanaōke. ²⁰ Ijō tahe hāwyy herinamy rexihumy rŷire tai kanaōke. ²¹ Teòdu tahe ròòsera tawedu-ò tamy relyyre. Tii reburere tahe rarybere: —Wylemy makre ibutury-di hāwā-ki. Ibutumy iny witxira witxira bididyke, iaōkō mahādu, itiere mahādu, ruetà mahādu wahe. ²² Iribi tahe teòdu ròòsera rarybere: —Ibutumy rewinyre wawedu, tahe heto rŷxiōmy rŷire. ²³ Tahe iwedu ixybymy bede riywinyre hāwā-ribi ibryrary-ò iny kididykemy: —Aruru-di bididyke, waheto dori rŷximy rŷirakremy idi watxireri. ²⁴ Juhuu watobidŷŷna mahādu warŷsŷna riurihiōtyhy.

²⁵ Iu sōwemy iny Jesuisi heludumy roire. Tai Jesuisi tamyreny rarybere: ²⁶ — Kaiboho aōbo inatyhymy waluu mahādumy toite. Tuu tarybeta. Tahe boluu, adiluu, ahāwyyлуу, ariòreluu, aseriòreluu, ixiluu ratyre

waluuõkeki, wamahādumy aõkõ boibeke. ²⁷ Inyõ riwaheludunykeny ratxireri, tii juhū taitxeò riwykre. Kialemy tahe riwaheludunyen inatyhymy. ²⁸ Inyõ heto rare riwinykeny ratxikeki, juhū iòwy-di rōhōtinykre. Inieru rimykeki tahe riwinyke, aõkõkeki tahe riwinyōtyhy. ²⁹ Tii tuu rōhōtinyõkeki, tii ibutelemy riwinykre tahe inieru ituereu, ibutumy iny idi risinykre: ³⁰ —Tii taheto rarei ritelenyre tahe rexihuōtyhy. ³¹ Iòlò wou riwinykeki, juhū taaõbinadu mahādu-di rariamyh̃yre. Idi rōhōtinyre. Ijō iòlò wawiò mil soldadomy ijōdikeki, tahe tii debòwiò mil ijōdikeki, tahe wou riwinyōtyhy. ³² Juhū tahe teòdu riteònyre ijō iòlò-ò ireheribile tii-wana wou ixāwid̃ỹmy rarybekemy. ³³ Akireny tule iweselere. Ibutumy aaõna aõna biriõbenykeki, waheludu mahāduõmy boibeōtyhy.

³⁴ Saa heka aõni awi rare. Tatxuberere rexi-hukeki tahe turibi ixāwike. ³⁵ Tai tahe suurina-ki ahirana sil̃na binakõki awiõhōtidirenykeki boholabenyke warybe-ò. Suò awiõre, tule ahirana bitòbònykeny awiõre. Urile idi behuke. Kaiboho õhōtidirenykeki, boholabenyke!

15

¹ Idi nieru tarasadu mahādu sōwemy tamy roholamy doide. Tule ijō iny òrarudu mahādu rehemynyre. ² Fariseu mahādu, tule bedeywina erydu mahādu kawesemy rarybere: —Kahābu ibinare. Tii òrarudu mahādu-wana riroximyh̃yre, iny iehehe-wana.

³ Idi Jesuisi rierynanyre ijyy-di rawesenanyre.

⁴ Kaibohoõ òsana 100 budoeni ijōdire. Sohoji heka

iy-ribi iõre. Kai aõbo makre ijesemy? Kohe, iuhe, 99, birike bedero-ki tahe biõryhycke. Aõhe inatyhy? ⁵ Mahakre wana tahe eysamy atxikre. Tahe bidyke iuhe-ò. ⁶ Taheto-ò rehemynyreu, tasỹ mahãdu-ò tahe ritobinyre: —Wawana ini kỹny bedeysabedenyke. Wabudoeni-ki rahara, iõreõ wahe. ⁷ Iwesetyhylemy taheka adee reerymahãre iny òrarudu mahãdumy. Iu sohoji iny rexirahĩkeki, biu-ki deysana sõwemy rỹikre. Iny òbiti 99my tahe urihimyo biu-ki deysana rỹikre.

⁸ Ijõ Jesuisi relyyre: —Hãwyyõ òsỹny womati ura nieru debõwiò dire. Sohoji iõre-wana, tii riijeke inatyhy? Loosõna ritoonyre, iube riwysynyre, sõwemy riijeke ihyymy tahe tai rahara. ⁹ Tii itxi reakreu, reysamy rỹira. Iu tasỹ mahãdu ritobinyre: —Wawana inihe bedeysabedenyke. Wanieru-txi dokuri rahara. ¹⁰ Jesuisi tahe ritỹnynyre: —Iwesetyhyle biu-ki rare. Deuxu ýju mahãdu reysamy roirenyre, sohoji òrarudu rexirahĩreu.

¹¹ Ixyby tahe Jesuisi narybede: —Hãbuõ iriòre inatxire. ¹² Tiutxumyta ihelỹỹna tyby-ò rarybere: —Waha, ibutumy aõna aõna burukreu wadee rawahikre, wijile bidiwahinykre. Tyby tahe iaõna aõna jura tamy riwahinyre. ¹³ Iriòre helỹỹna tahe ibutumy taaõna aõna-di rare irehe-ò, iwitxira bedehãwã-ò. Tai aõbina binale riwinymyhỹre. Ibutumy tanieru tai rahure. ¹⁴ Taaõwiwi rahu-di ta, tai rama ibede mahãdu rahumyhỹre. Tii uritere reamyhỹ wahe. ¹⁵ Tahe aõmysỹdỹỹnamy rarunyre. Hãwãduõ tahe taixỹniòwedỹỹdumy bede riywinyre taoworu-ò. ¹⁶ Tai rama risamy ta ixỹni rỹsỹna

rỹsỹmy rexinohõtinyre. Tahe aõkõre. ¹⁷ Kia tahe tõhõti deade. Kamy dixinohõtinyde: —Yla aõkõ waha aõmysỹdỹỹdu mahãdu irỹsỹnadireri iwana jiarỹ kaki rama warubudỹỹmyreri. ¹⁸ Ixyby aròòsekre. Kamy Waha-ò arexirybenymy: —Waha, Deuxuko-ò ako-ò rexiitxỹtenyre jiarỹ raòrarunyre wahe. ¹⁹ Ariòre wese aõkõmy wadi mabeke, waitxỹte òraru-ki. Aaõmysỹdỹỹdu mahãdu wese ta ararekre myỹ tii rõhõtiny. ²⁰ Tii tahe tyby heto-ò rare. Irehemy nadeò, tyby tuu dobide. Idi rexiwobrunymy tamy raijaranyre iwehityhydỹỹmy. ²¹ Tahe tii narybede: —Waha, Deuxuko-ò, ako-ò rexiitxỹtenyre jiarỹ, raòrarunyre wahe. Ariòre wese aõkõmy wadi mabeke, waitxỹte òraru-ki. ²² Iule ta tyby teòdu mahãdu-ò rarybere: —Wylemy tywihikỹ tymyra-di bityynybenyke. Debòò tebò-ò roikre. Waõ-di rawanykre. ²³ Tasỹse broreni riòre dedi birubunyenye. Idi rikiroxirenykemy rekeysarenykre dori. ²⁴ Wariòre dori rubu-ribi wese rexixara. Ikõ-ribi itxi ijara rỹira. Tahe rawobedesarenyre. ²⁵ Iwana ta iumydela tahetoreny-ò dehemynymy nade taaõmysỹdỹỹna-ribi. Tahe wobedesana-ò roholamy. ²⁶ Tahe deòduò-ò narybede: —Aõhereriwe. ²⁷ Dirawyònyde: —Ahelỹỹna kie ròòsereri aõhe rotỹỹnyõhyylemy. Tai boo broreni rirubunya. ²⁸ Iumydela tai reburere ròte deramy reare. Idi tyby tamy nade riròtenykemy. ²⁹ Tahe iriòre dirawyònyde: —Aõhe òhòkõ adee raaõmysỹdỹỹnymyhỹre. Ibutumy arybe retyhynymy watximahãre. Ihãreta budoeni wadee tewahinyõhyymyhỹte,

waijoi mahādu-wana idi arexideysanykemy.
³⁰ Katahe ariòre urile aōnawiwi rahura wedena mahādu-wana. Ròðsemyta kai broreni riòrede tamy terubunyta. ³¹ Tai tyby dirawyònyde: — Wariòre iny ratximyhÿre kiaremyta ibutumy waaōwiwi heka ahòròle rare. ³² Iny bedesarenymy heka kawese rewinyre, wadee awireki. Ahelÿÿna dori ruruwese-ribi rexixara. Ikò-ribi itxi ijara rÿira. Tahe rawobedesarenyre.

16

¹ Jesuisi taerydÿÿna mahādu-ò relyyre ijyyò: —Hābuō inieru sōwere. Tamy deòduō ibutumy inieru-di raaōmysÿdÿÿre ijò nieru ributunykemy. Ijòtxu tahe inyò rarybere: —Eòdu riki heka anieru-di òbitimy aōkō raaōmysÿdÿÿmyhÿre. Anieru sōwemy rexihumyhÿre. ² Tahe didyde ixidee taconta retehekemy. Tamy rarybere: —Inatyhymy aōbo umy iny rarybemyhÿre? Wanierumy tyyrity aretehekemy watxireri. Òbitimy aōkòkeki, waribi arateònyke. Wanieru-di tiu maaōmysÿdÿÿnyòkre. ³ Tahe teòdu iximy rexiraykynyre: —Wadinodu riwateònyke. Aōhebo arotÿÿnyke? Warurukøre dori tahe aōmysÿdÿÿsira ariwinyòtyhy. Tule ijò iny-ribi iixitòedÿÿna riwaixÿrure. ⁴ Reeryre tahe, aōhebo arotÿÿnykemy. Aōwiwihikÿ wabiòwa dee ariwinykre. Riwateònykeki tahe wabiòwasÿ-ò arakre. ⁵ Ibutumy nieru huòtedu mahādu-wana rarybere, tawedu-ribi huòtedu wahe. Tamyreny rarybere: —Tiwesebo tewyta wawedu-ribi? ⁶ Tahe diwyònyde: —Adÿÿ rehuòtera, 100 hynamy wahe. Tai tahe rarybere ijò: —Iwekre tahe

wylemy biritinyke, 50 wahe. ⁷ Ijõ-ò tahe rarybere: —Tiwesebo adeve? Diwyònyde: —Trigo rehuòtera, 1000 prato wahe. Tai tamy rarybere: —Kai 800my biritinyke. ⁸ Iribi tahe hãbu ityhy heka teòdumy rarybere: —Tii inatyhy nieru erydu ratxireri. Tahe Jesuisi rarybere: —Kabede wijinabòdu mahãdu heka aõmydỹnana erydutyhy rare, ityhydỹdu mahãdu ratyre wahe. ⁹ Tai tahe adee ararybekre. Kabede mahãdu biòwamy boibeke, anieru-di. Tahe anieru ituekeki, Deuxu taheto wiwihikỹ-ò aradykre, biu-ò heto wiwihikỹ wahe. ¹⁰ Aõmydỹnana aõ aõkõmy kai òbitimy masỹnykeki, tule aõ nihikỹmy kai iweselemy mabeke. Inyõ heka ibutemy wasikeki, tii tule aõ nihikỹmy rawasinykre. ¹¹ Kaiboho heka kabede nieru-di òbitimy aõkõ atxibenykeki, tule biu-ki araròsòna bitaõtyhy, aõ wiwihikỹ inatyhy wahe. ¹² Iny witxira nieru-di heka òbitimy boibebenyõkeki, timybo anieru tyhy-di òbitimy boibeke. ¹³ Inyõ iny inatxi deòdumy aõkõ rarekre. Inatxinaõ dori iluukre, ijõ ta iluukõkre. Deuxu dee maaõmysỹdỹõtyhy. Tiu nierurahi inatyhymy teamyhỹteki.

¹⁴ Fariseu mahãdu tamy roholareu, urile idi nierurahi risinyrenyre, tiiboho ire nieru ributunymyhỹrenyre bòdỹlluurenyre. ¹⁵ Tahe Jesuisi tamyreny rarybere: —Kaiboho heka òbitimy inyko-ò ixi-di atximahãtenyte. Ihãre tahe Deuxu timybo toimahãte rierymyhỹre aõna aõnareny bina. Aõmy hãbu rexinohõtinyinmyhỹre, aõtxi-ki Deuxu-ò awiõhyyre. ¹⁶ Moisesi bede ywina rybe tahe tule Deuxu Rybedu mahãdu awi rare,

Joaõ Sebedỹỹdu rehemynyreu tahe ixãwire. Iu tahe Deuxu Iòlòna Rybe wihikỹ tamyra ròhònyre. Kia tahe iny ritohodỹỹnyre. Ibutumy iny kia-ò ralokremy idi ratxireri. ¹⁷ Biu, bede rexihuke tahe isiraõre. Deuxu rybe tahe rexihuõtyhy. Kia isiratyhy rare. Ityyriti rybe wedenaõ riõnonyõtyhy. ¹⁸ Hãbuõ tahãwyy-ribi ixãwikeki, idi iwitxira-wana roikeki, tii òtadu rare. Hãwyy ixedu-wana tii roikeki, òtadu rare.

¹⁹ Ityhy mahãduõ riki tyy òwyhykỹwiwi-di rexi-tyynymyhỹre. Tii idi rexirabedesirananymyhỹre. Awimyhỹre tuu ratximyhỹre. ²⁰ Tahe urimynodu tyymy binadumy iijò-ki ixyby ixyby ratximyhỹre. Lazaru inire. ²¹ Tii ityhy rỹsỹnauhe rirỹsỹkemy raòbirenymyhỹre. Ijòròsa dori itybyinatòmý dirahumyhỹde. ²² Lazaru rurureu, ýju mahãdu ridyrenyry biu-ò ilabiereny rora-ò, Abraõ wahe. Tule ityhy rurure idi rituunynyrenyry. ²³ Tahe rubu-ki rubu mahãdu bedebina-ribi aõhòkỹmy dỹỹnana ityhy Abraõmy robire irehe-ò Lazaru tule irora-ki. ²⁴ Tahe ityhy dyryde: — Abraõ, walabie, wadi inihe bedexiwoboronyke. Lazaru ini wadee tebò-ki beruty-di kanake wadòròtò elehynamy. Jiarỹ dori raòhỹtỹhỹtỹreri kaheòtywo-ki. ²⁵ Tukõleta, Abraõ narybede: — Dàa aõwiwihikỹ-di tatemyhỹ-di bexinohõtinyke. Tukõlemyta Lazaru aõbina binahakỹle rimyre. Tahe kaki aõwimy Lazaru ratxireri. Tukõmyta kai ibymy atxiteri. ²⁶ Ihãre ta hãloohukỹ inyko-ki rỹire. Timyki kaludu kia-ò iòhòreseõna. Tule kia ludu kaò iòhòreseõna. ²⁷ Hebose, Abraõ walabie, kamy ityhy narybede, Urile Lazaru wasỹ-ò biteònykekõ aõbo. Waseriòreboho deòwarisidỹỹmy. ²⁸ Waseriòrereny

dori iruyrerennyre urikõ-ribi kabedebina-ò kòdòiheny. ²⁹ Tahe Abraõ diwyònyde: —Tiiboho dori Moisesi tyyriti, Deuxu rybedu mahãdu tyyriti dire. Tii tahe tamy roholarenymy rityhynyrenyke. ³⁰ Ityhy narybede: —Aõkõre Abraõ walabie. Kia inyõ tarubu-ribi rexixamy ròòsekeki xiery ta, taòrarunarenny-ribi rexirahĩrenyke. ³¹ Tahe Abraõ dirawyònyde ixyby. —Moisesi tyyriti rybe-ò, Deuxumy rybedu mahãdu rybe-ò roholaõkeki, tii mobo rexixake tule ityhydỹỹõna.

17

¹ Tahe Jesuisi taerydỹỹna mahãdu-ò rarybere: —Kiemy inyõ wodohonadỹỹmy aradykre òraruna-ò besekemy. Kobe làhàxe tii kiawesemy rotỹỹnykreki. ² Tii dori ibinatyhy rare. Wadee heka kabera-txi mana-di rataataamy sỹy-ò reakenawi rare. Tukõmy uri-ribi watyhydỹỹdu tỹmyraõ riòrarudỹỹnyheny. ³ Bexiijebeeny ta. Aityhydỹỹdu seriòre rexiòrarunanykeki, tamy marãhĩke. Tii rexirãhĩkeki, iaõna aõna bina-ribi bexinohõtilosanyke. ⁴ Txu sohojiõmy adee rexibinanykeki, kai tule ibinamy tai mahamy. Tii ixi-di rexiwotòenymy adee nakeki, tule idi bexiwobrunymy bexinohõtilosanyke iaõna aõna-di.

⁵ Jesuisi erydỹỹna mahãdu dexitòenydenyde: —Wanyrỹreny, wainatyhynarenny ini bisõwedỹỹnyke.

⁶ Jesuisi dirawyònyde: —Ainatyhynarenny heka sunysisõmo wesekeki, kamy bederarade-ò marybebenyke: —Bexitake inihe idi bera-txi myike. Tahe tii aratyhynykre. ⁷ Titxibo kaibohoõ eòdudirenykeki aoworu-di itxeredu ada budoeni-di itxeredu wahe. Tii taaõmysỹdỹỹna-ribi

kanalokreu, kawesemy aõbo tamy manarybekre? Wy, wylemy rikiroxikre dori. ⁸ Timyki kawese tamy arybeõna. Tukõmyta tamy marybeke: — Warÿsÿna biywinyke idi wadee, idi manakre. Ariroxikre dori. Wabyre arihu-di ta bexiòenykre. ⁹ Teòdu deòdumy rearahu-di aõbo, txiòtòetuukemy tamy rarybere aõbo. Timyki tukõna. Kiemy dori taaõmysÿdÿÿnale riwinyre. ¹⁰ Iu aõmysÿdÿÿnarenny bihudi, iwese heka atximahãbenyke kamy bexirybenymyhÿbenyke: Inyboho deòdule roire, aõtyhy aõkõ mynodu, iny aõmysÿdÿÿnarenny heka inyboho riwinyrennyre.

¹¹ Jesuisi Jerusalẽ hãwã-ò ramyhÿreu, Samaria bedede, Kalileia bedede wotya-di rare. ¹² Iu hãwã-ò txi raloreu, debo ituemy sõwereny tyymy binamy mahãdu iry-ò doide, tahe irehemy rexiereny. ¹³ Iribi tamy dyrydenyde: — Jesuisi, Erydÿÿdu, wadireny ini bexiwobrunyke. ¹⁴ Tureny robireu, narybede Jesuisi-ò: —Xiwenahãwã-ò mahãdu-ò ixi-di itxerenamy bõike. Kia-ò rariamy roirennyre, tahe reyterennyre. ¹⁵⁻¹⁶ Ijõrenny Samaria ludu mahãduõ reytemy iximy robireu, Deuxu riwowydÿÿnny tamy dòòsede, rawiunny. Tatiowomy Jesuisiko-ò resere. Tahe rarybere: —Txiòtòetuuke. ¹⁷ Tahe Jesuisi rityÿraxyre: —Debò itue wese, asõwerenyre? Titxibo ta debò inaubiòwabohoroire? ¹⁸ Aõherekiwe kaa iny witxira sohojile Deuxu wowydÿÿnny dòòsede, Samaria luduõ wahe? ¹⁹ Tahe Jesuisi tamy rarybere: —Mynyke, idi makre. Atyhydÿÿna òraru-ki dori teyteta. ²⁰ Idi fariseu mahãdu Jesuisi-ò rÿÿraxyre: —Tiubo Deuxu lòlõna kanakre? Tii diwyònyde: —Timyki Deuxu

Iòlòna dehemynysŷnamy inyõ robiõtyhy. ²¹ Tule inyõ kiau rarybeõtyhy: —Betehebeny inihe ka-ò: —Tukõmy aõbo: —Kowaki heka rare? Deuxu Iòlòna dori aworeny-ki rare.

²² Tahe taerydŷŷna mahãdu-ò rarybere: —Tiutxumy heka Deuxu Riòre Hãbutyhyhykŷ txumy bobibenykemy tahe bobibenyõtyhy. ²³ Tahe ijõ adeereny kanarybekre: —Bedetehebeny inihe kaò ada kowa-ò. Tahe iitxerenyõmykre. ²⁴ Iwese tiribi tiò biu relaanymyhŷre wese heka Deuxu Riòre Hãbutyhyhykŷ txu kŷnyikre. ²⁵ Delemy tahe tii aõhõkŷmy rotŷŷnykre. Wijinabòdu mahãdu teramy reakre. ²⁶ Noe bededŷŷnana wesemy heka rŷimyhŷkre. Iu beòra rariareu. Tahe Deuxu Riòre Hãbutyhyhykŷ kedehemynykre iu. ²⁷ Ibutumy heka worana bedehesi rŷire. Lisisò tahe rŷire. Hãwyy herina lisina rŷire iu. Iu tahe beòra rariare. Ibutumy ituere. ²⁸ Lòò bededŷŷnana tule iwesere. Tiiboho worana bedehesidile rŷire. Tiiboho rityhynyõtyhy. Urile hetomy riwinymyhŷre, oworomy riwinymyhŷre, aõna-di rohonymyhŷre. ²⁹ Iu tahe Lòò ihãwã-ribi ròhònyreu, Deuxu heòty ityre riteònyre. Biu-ribi heòty ityre resere enxofre-wana. ³⁰ Iwesele txu tii heka rarekre heka, Wadehemynyna Deuxu Riòre Hãbutyhyhykŷ wahe. ³¹ Kiau tahe inyõ ihetotyre heka rŷire. Malòkekõ heka ahetowo-ò aõnamynamy. Inyõ tule oworu-ki rŷire, taheto-ò aõkõ ròòseke. ³² Lòò hãwyy-di mohòtinyke. ³³ Inyõ taumy riyrubunyekiki, tii ruruke. Ijõ tahe wadeewimy rurukeki, tii taumy rayrubukre. ³⁴ Adeerarybere: —Bede rurureu heka inatxi hãbu rõrõreri. Ijõ

heka rakre dynamy reakre. Ijõ tahe rarikre. ³⁵ Inatxi hāwyy heka r̥s̥s̥na-di raaōmys̥d̥d̥y̥n̥my heto-ki ratxikre. Ijõ heka dynamy reakre, ijõ heka rarikre. ³⁶ Inatxi hābu heka oworu-ki raaōmys̥d̥d̥y̥kre. Ijõ heka rakre dynamy reakre, Ijõ tahe ririkre. ³⁷ Ieryd̥y̥na mahādu r̥y̥r̥axire. Titxibo r̥y̥ikre, Wanyr̥y̥? Tii rirawyònyre: —Titxibo iumy rubu roire-wana, rara tai wii ributunyre.

18

¹ Jesuisi heka ròkewesenanyre ribedeerynyreu. Kia wese heka tii iyyymy relyyre. Rex-itòenyhykemy tii ribedeerynyre tule ixitòed̥y̥-ò ixirarenyōmy. ² Hāwāō-ki tahe hābu matuariō rare, tii tahe ibinare. Juizimy heka ratximyh̥yre ywisid̥y̥du wahe. Tii iny rityhynyōtyhy, Deuxu lau ruberuōmyh̥yre. ³ Tule heka hāwyy wyteseō tai ras̥n̥ymyh̥yre. Kia tamy ramyh̥yre sōwemy. Tamy rarybera: —Biwawikòhenakykre wahe. Wakòludu tahe riwahureri. Kywisid̥y̥k̥du kai atxiteri. Anoherekibo tiwawokutòenykōteri. ⁴⁻⁵ Aōhòkōmy hābu iaōna aōna òbitid̥y̥ deramy reamyh̥yre. Tahe Hābu ixidee rarybehyyra. Inatyhymy jiar̥y̥ inyō retyhynyōtyhy. Tahe hāwyy wytese sōwemy wadee raryberekì, jiar̥y̥ ariòbitinykre iaōna aōna ibutumy iòludu-wana. Aōkōkeki tiemy kidiwarulòlòenyke. ⁶ Tahe Jesuisi rit̥yn̥nyre: —Juizi bina rybe-ò kaiboho bohola benyke. My wahe. ⁷ Deuxu heka taijoi mahādu-ò roholake. Òbitimy iòludu-di riywisinykre. Taijoi mahādu dori tamy rexitòenyre. Tii wymy riwiòhenanyke. ⁸ Tii inatyhymy taijoi mahādu riwiòhenanykre. Jiar̥y̥, Deuxu Riòre Hābutyhyhyk̥y̥

wymy adehemynykreu, watyhydỹỹdu-txi aõbo areakre.

⁹ Tule Jesuisi kia ijyy relyyre, iny ixityhymy ixi-di ratxityhymy kia ijõ inymy kiale radõnymyhỹre. Kia tahe rikewesenanyre. ¹⁰ — Iny inatxi hãbumy heka templo-ò ròirenyre rexitõenykemy. Ijõ fariseu rare, ijõ tahe nieru arisidu rare. ¹¹ Fariseu tahe rỹimy rexitõenykemy ixidee. My wahe: —Deuxu, jiarỹ aõhãbubina aõkõ rare. Tai tahe umy reàlãmy wahãre. Jiarỹ aõwasidu aõkõ, aõòrarudu aõkõ, aõòtadu aõkõ. Iwese kowa nieru arisidu wese aõkõ jiarỹ rare. Txiòtòetuuke tai. ¹² Semana sohoji heka wabyreõ-di inatxixumy rewymyhỹre. Tule waaõna aõna ibutumy ijura adee rewahinyre. Debõwiõna-ribi sohoji rewahinymyhỹre wahe. ¹³ Nieru arisidu tahe irehemy rỹire. Biu-ò aõkõ rethere, tahe rexihetenyre rexitõenyrerimy Deuxu-ò. My wahe: —Deuxu, biwawotõenyke. Jiarỹ òrarudu rare. ¹⁴ Jesuisi ijyy ritỹnynyre: —Adee ararybekre. Mobo teysamy taheto-ò nade? Ixityhydỹỹdu aõbo ada ijõ aõbo. Kohe ijõ tuure, ixityhydỹỹdukõ wahe.

¹⁵ Tiiboho heka uladu tamy didydenyde. Iu Jesuisi tebò iratityre ritidimy ritxuhore awimy roirekemy. Tahe ierydỹỹna mahãdu tamy idyrenyõkremy raryberenyre. ¹⁶ Jesuisi rarybere: —Txiò, kididyke uladu wadee. Uladu wese dori Deuxu Iòlõna rare. ¹⁷ Inatyhymy ararybekre: —Moõ heka uladu wesemy Deuxu Iòlõna rityhynyõkeki kia heka Deuxu Iòlõna-ò ralòõthyhy.

¹⁸ Idi tahe iweduõ rarybere: —Erydỹdu wihikỹ, aõwexe ariwinykre idi biu-ò arahenykemy.

¹⁹ Jesuisi tamy rarybere: —Aõbo wa wihikỹmy wadee tarybeta. Hãbuõ tiu awiõre. Deuxu sohojile tahe awira. ²⁰ Bede ywina tyyriti kai teeryte:

—Rubudỹỹõmykemy, tule òta òtaõmykemy, wasiõmykemy, tule ruiõmykemy, iny wii itxenadỹỹõmykemy, adi biywinykemy, boo tule.

²¹ Hãbu tamy rarybere. —Kia bede ywina rybe retyhynyhyylere, uladudihyyle wahe. ²² Jesuisi rarybere: —Kai sohoji aõmydỹỹnale aki nasir-anyde. Kai makre, ibutumy aõna aõna-di bohonykre, idi tahe kia nieru biwahinykre iny aõkõdu mahãdu-ò. Kia tahe aõmydỹỹnadikre biu-ki. Tahe manakre biwaheludunykrey. ²³ Kia rybe-ki heka hãbu rabadewore. Rexitare ibedewomy iaõna aõna sõwetyhyreki. ²⁴ Jesuisi retehemy ibederyry-di tahe rarybera taerydỹỹna-ò: —Kia iny iaõna aõna sõwemy rỹireri, Deuxu Iòlõna-ò ralòke isirare. ²⁵ Kamelo tyyrorenawo-di ralòkemy isirakeki, kia-ribi isiratyhyre iny iaõna aõnadikeki ralòke Deuxu Iòlõna-ò. ²⁶ Ijohonadu tahe widee rarybere: —Mobo tai biu-ò hedukre. ²⁷ Jesuisi rarybera: —Inatyhymy kōaõboka hãbu-ò isiratyhyre. Deuxu-ò tahe ibutumy aõna aõna isiraõre. ²⁸ Pedro rarybere: —Boholake, jiarỹboho ibutumy rerirenyra araheludunykremy. ²⁹ Jesuisi rarybere tamy: —Inatyhymy adeereny ararybekre. Moõ waluukeki, rybewihikỹ luukeki, kia heka ririkre: heto, taseriõre, tyby tadi-wana, tariõre, tabede, ibutumy waòraru-ki, Deuxu Iòlõna

òraru-ki, ririkre. ³⁰ Ka bedekile ritakre sōwetyhymy ibutumy aōna aōna. Ihāreta biu-ò rahenykre Deuxu-wana rasỹnykemy.

³¹ Jesuisi taerydỹỹna mahādu ridyre inysōwe-ribi tamyreny rarybekemy: — Boholabenyke waijoi! Jerusalē-ò rokoirenykre. Tai iny riwarubunykre jiarỹ Hābutyhy rarehāre, Deuxu Riòre rarehāre wahe. Iwese Deuxu Rybemy rybedu mahādu rarybere wese. ³² Tiiboho riwawahinykre judeukōdu mahādu-ò. Tiiboho riwabinabinadỹỹnykre, riwalahikre, watyre rarybexinykre. ³³ Riwahetenykre òhòte-di, idi riwarubunykre. Ihāre tahe inataō txu-di tahe adexixakre rubu-ribi. ³⁴ Jesuisi erydỹỹna mahādu urile bede riòtiinyrenyre. Aōmybo tii rarybere rierytyhyōrenyre. Irybe tamyreny dori ierynatyhykōreri.

³⁵ Iu Ijeriò hāwā-ribi iòhòmy roirenyreu, inatxi iny ruetāmy heka rononymhỹ Jesuisi ibire-di rareu. Tiiboho nierumy rexitòenymyhỹrenyre.

³⁶ Inysōwe-ò roholarenyre tahe, tii rỹraxyrenyre: —Aōhereriwe. ³⁷ Tahe tamy rarybere: —Jesuisi wa rareri Nazare hāwā ludu wahe. ³⁸ Tahe ruetāō ryryre: —Jesuisi, Davi riokore! Biwatōenyke hewa! Wadi làhà inihe bexiruxetōenyke. ³⁹ Iny sōwemy tamy rarybere: —Iryōmyke! Ihāre ta tii ryrymyhỹre: —Davi riokore, wadi mawotòeke! ⁴⁰ Jesuisi riyyryre tahe rarybere: —Tamy byryke wadee kanakemy. ⁴¹ Jesuisi tamy rarybere: —Aōmybo kai taruteri adee arutỹỹnykremy. Tahe hābu ruetàhākỹ tamy rarybere: —Wawedu, ixityre arobikremy. ⁴² Jesuisi tahe tamy rarybere:

—Makre, atyhydÿÿna kai arateytenyra. Kialehe rare. ⁴³ Aõwesele ixityrele tii robire. Tahe Jesuisihemy rare ryy-di. Taihe ibutumy iny heka Deuxu riwowydynymyhÿ.

19

¹ Ijeriò hãwã-ki Jesuisi rehemynyre. Idi rariareri. ² Tahe hãbuõ tahe Jesuisi riere. Zaqueu inire. Inieru sõwere. Tii nieru tarasadu weduõ rare. Inieru sõwere. Tii heka iyjare tahe Jesuisimy robiõtyhy. Raòwònyre tahe òwòru-txi. ³ Tii Jesuisimy robikemy risÿnymyhÿ, tiu tuu robiõhyymyhÿreki. Iyjare-ki tahe rexisiranyre. Kiemy dori iny rare rare iko-ki rÿimyhÿ. ⁴ Tahe ijoiko-ò rexiraòre tai òwòruõ-ò raòwònyre Jesuisimy robikemy iribi idi kanakreò. ⁵ Iu Jesuisi tamy rehemynyreu, biu-txi retehemy Zaqueu-ò. Narybede: —Wylemy bedeseke Zaqueu. Wiji dori aheto-ki bede wadi rÿike. ⁶ Tahe rabedesamy wymy resere. Awimy Jesuisi rybe-ki rahare. ⁷ Tahe inyõ mahãdu iòraru-ki kamy rexirybenyrenyre: —Aõhewe Jesuisi iheto-ò rara? Tii iny òbikõmy nodu hãrele wahe. ⁸ Zaqueu tahe Jesuisi rarybere: —Bodoholake ini, Wanyrÿ. Tahe waaõna aõna iwekre iaõkõdu mahãdu-ò ariwahinymy ararekre. Tule txibo inyõ-ribi rowasire inaubiòwa wawasi ratyre tamy ariwahinykre. ⁹ Tai Jesuisi narybede: —Wijityhyle kahãbu sÿmahãdu-ò henana rehemynyra. Kahãbu tule Abraõ riore riõrele rare. ¹⁰ Deuxu Riòre Hãbutyhyhykÿ dori iny òrarunamy resere mahãdu òrysymy itarasamy nade. Jiarÿ tiire.

11 Jesuisi tamyreny rawesenanyre timybo Deuxu Iòlòna raremy. Jerusalê hãwã-ò iòhòmy ratximyhỹre. Tai tahe Deuxu Iòlòna iòhòmy ratximyhỹremy roholare. 12 Tahe Jesuisi rarybere iny ityhyõ heka: —Inyõ nihikỹ heka rakemy ratximyhỹre ijõ bedè-ò ratỹinykemy. Tai iòlòmy ronykremy rare. Iribi tahe ròòsere. 13 Tii tahe taaõmydỹnana ririre teòdu mahãdu-ki. Teòdu mahãdu debòwiòmy heka womati tỹrỹrỹhỹkỹ nieruõ sohoji sohoji tamyreny riwahinyre. Tamyreny rarybere: —Nieru bitakre, idi bibutunybenykremy adireny watxireri adoosyekre. 14 Tahe kia bedè ludu mahãdu iòlò deramy ratximyhỹre tai tahe tamy rybemy iny mahãduõ riteònyre: —Kahãbu aõkõ iny iòlòreny ronykre. 15 Ihãre tahe iòlòmy ronyre. Idi tahe tanieru wedu mahãdu-ò rarariòwyre. Tiwesebo teòdu mahãdu nieru ritare rierykemy. 16 Juhuludu tahe rehemynyre: —Wawedu, betehe inihe ijõ debòwiò anieru ratyre rebutynyre. 17 Tahe iòlò sòwemy riwowydynyre: —Awityhymyhe taaõmysỹdỹỹta. Kai heka deòdu wihikỹ tate. Kai ibutedile sòwemy tewinyte tahe debòwiò hãwã adee ariwahinykre. 18 Ijõ tahe rehemynyre: —Wawedu, betehe iny iruyre anieru tyre rebutynyre. 19 Tahe iòlò tamy rarybere: —Kai sỹ iruyre hãwãmy dinodu mabekre. 20 Ijõ deòdu rehemynyre: —Wawedu, ahãxe anieru. Jiarỹ tyky-di reraserasenymy rerarenyre. 21 Jiarỹ alau raberure. Kai dori hãbu nieru tarasaery heka tate. Aõ taaõmysỹdỹỹteri-ribi aõkõ heka nieru tetamahãte. 22 —Kai heka deòdu awi aõkõ heka tate. Arybe xiery waribi

arateònykre. Kai tiwaeryte jiarỹ nieru tarasaery heka watxireri. Aõ raaõmysỹdỹỹre-ribi aõkõ nieru retamahãre. ²³ Aõherekibo. Kia nieru yrubuna heto-ki terikõte. Tai iximyna ratyre ini iribi ratare. ²⁴ Iòlò teòdu inatxi-ò rarybere: —Wanieru iribi bitabenyke. Ijõ hãbu sõwemy ròtareò rawahikre. ²⁵ Ijõ raryberenyre: —Tii heka debòwiò nieru ijõdire. ²⁶ Adee ararybekre: —Inyõ òbitimy raaõmysỹdỹỹkeki, tii sõwetyhymy ritakre. Tule inyõ òbitimy raaõmysỹdỹỹõkeki, tii ibutumy ròõnodỹỹkre. ²⁷ Iwedu rarybekre: —Waòludu mahãdu tahe wadee bididybedenyke. Wadera mahãdu wahe. Wako-ki birubunybenyke.

²⁸ Tarybe rahudi tahe Jesuisi rare Jerusalẽ hãwã-ò.

²⁹ Jerusalẽ iòhòmy ritehemynyrenyreu, tahe inatxi taerydỹỹna bedè riywinyra hãwã-ò roikemy. Inatxi hãwã iòhòmy roire, Betabaji, Betỹnia-wana. Kia-ò Oliveira hãwãlò roire. ³⁰ Jesuisi rarybere: —Kaiboho boikre kowa hãwã-ò. Kowa-ò birònykreu jumenta riòre mahabenykre. Moheka ityre rariaõlemy ratximyhỹre. Biesemy, wadee bididybedenyke. ³¹ Inyõ adeereny rarybekeki: —Aõhekremybo idi atxitenyteri. Tahe tamy marybebenykre: —Wanyrỹ tuu rurureri. Ixityre kaò kidiòkesedỹỹnykre. ³² Tahe hãbu roire. Iwese Jesuisi rarybere wese ibutumy rỹire. Jumenta riòre ryro hetoijø-ki ritisanyumy rỹimyhỹ. ³³ Tai riesereu, iwedu rarybere: —Aõherekibo teeseteri. ³⁴ Tai tiiboho Jesuisi rybe myna tamy raryberenyre: —Inynyryỹ tuu rurureri. ³⁵ Tahe ridyrenyre jumenta riòre Jesuisi-ò. Tiiboho

tatyyreny ritidirenyre jumenta riòre tyremy. Tiiboho risỹnyrenyre Jesuisi ityre-ò. ³⁶ Jesuisi rehemynyreu, ijõboho tahe tauwòhi ryromy ritidire ityre rariakemy. ³⁷ Jerusalē iòhòmy rehemynyreu, Oliveira hāwālò-ribi, ierydỹỹna mahādu rawyhyrarònyreri, tule ryrereri.

³⁸ Tii heka wowydyna rare. Tii heka Wanyrỹ niweseekemy naderi. Wowydyna rare Deuxu Iòlòna. Kai Iòlòna kanakre. Wyhyrarò biu-txi kodoholakre.

³⁹ Ijõ fariseu mahādu rarybere Jesuisi-ò: —Marybeke aerydỹỹna mahādu-ò tiiboho riyrykemy. ⁴⁰ Jesuisi tamy rirawyònyre: —Tiiboho riyrykeki, manale wowydynamy ryrýke.

⁴¹ Jesuisi Jerusalē hāwā-ò iòhòmy rehemynyreu, rahinyre. ⁴² Tii rarybere: —Kaiboho ywinatyhy teeryòte. Inatyhymy teeryte wana wadee awire, tahe aòkõre. ⁴³ Ijõ txu kanakre. Ahāwā ibutumy rirurawonykre aòbina mahādu, aòludu. ⁴⁴ Ibutumy hāwā ituekre. Iny iwo-ki tule rurukre. Mana ibutumy kedeseekre. Rierykõre dori tiubo jiarỹ ahedỹỹrenymy nanade.

⁴⁵ Tahe Jesuisi dohodỹỹna hetowo-ò ralore. Tahe kia-ribi aõna aõna-di rohonomyhỹre mahādu, õbradu mahādu diteònyde. ⁴⁶ Rierynanymyhỹre tahe tamy rarybere:

—Raritidỹỹòlemy aõbo rỹireri: —Waheto kōaõboka inatyhymy ixitòedỹỹna hetomy rỹirakre. Idi kaiboho tewinytenyte wasidu hetowesele.

⁴⁷ Txu ibutumy Jesuisi dohodỹỹna heto-ki ròbedeerydỹỹmyhỹ. Xiwe wedu mahādu, Deuxu aõmysỹdỹỹdu wedu mahādu roholarennyreu, rōhõtynyreny: —Timybo inyboho Jesuisi

rubudỹmy rikiwisỹnyrenykre. ⁴⁸ Tiiboho tahe aõkõhykre iny sõwemy dori bedede riõtĩnĩmyhỹ ibedeernadỹna-ki.

20

¹ Ijõ txu tahe Jesuisi ròbedeerydỹmy, Ijyy Tỹmyra Wihikỹ wahe. Ririranymyhyrenyreu dohodỹna hetowo-ki, bedede ywina erydỹna mahãdu, Deuxu xiwena wahidỹdu mahãdu wedu, tule matuari mahãdu tamy doide.

² Tiiboho tamy rỹraxirenyre: —Mowe ateòdỹdure kia aõna aõnami tatỹnĩmyhỹtemy. ³ Jesuisi dirawyònyde: —Adeereny tule arayraxikre.

Kaiboho bidiwawyònykeki, tahe jiarỹ akoreny yraxina ariwyòkre aõrudibo aõna aõna rewĩnĩmyhỹre. ⁴ Tahe Jesuisi rityỹraxinyre: —Mobo Joaõ ratisebedỹmy riteranyre? Deuxu aõbo ada iny aõbo? ⁵ Tiiboho widee rarybera: —Deuxu riteranyremy inyboho rakaryberenykeki, tai tii rarybekre: —Aõherekibo tahe tii tetyhynytenyõte.

⁶ Inyõ riteranyremy rakaryberenykeki, iny aruberuwỹhyrenykre. Ibutumy iny dori Joaõ rityhynyre tii Deuxu rybe-di rybedumy. Ijõ ijoi mahãdu urile inyreny kidihetenykre. ⁷ Tai tahe tiiboho raryberenyre: —Jiarỹboho reeryõrenyre. Tai tahe Jesuisi rarybere: ⁸ —Hebo, jiarỹ adeereny ixĩmy ararybeõtyhy modeòdỹĩnami jiarỹ tuu watxirerĩmy.

⁹ Iribi tahe Jesuisi tamyreny ijyy-di rierĩnanymyhyre: —Hãbu uva oworuõ wese ròbròre. Tahe riòtĩnyre. Tahe hãloo riare oworu ubetya-ki, ruỹdỹnĩmy. Tahe utò riwinyre. Idi tahe rityhere hãbu mahãdu-ò. Tahe rexitare

tasỹ-ribi ijõ bede-ò. ¹⁰ Tahe bederaty siredemy bededỹñana rehemynyreu, iwedu teòdu riteònyre bederaty ritakemy. Tahe oworu-di itxeredu oworu wedu deòdu rimyrenyre, rihetenyrenyre idi riteònyrenyre ixihyylemy. ¹¹ Ixityre oworu wedu teòduõ riteònyre. Kia heka irati rihetenyre ta tamy rawobinarybenyre. ¹² Ijõ riteònyre. Kia heka rirubunyrenyre. ¹³ Iwedu ixi dee rarybere: —Aõhebo arotỹñnykre. Tahe oworu wedu iriòre sohojilere, wariòre kie kie sohojile ariteònykre. Tai tiiboho rityhynyrenykre. ¹⁴ Kia oworu-di itxeredu mahãdu widee raryberenyre: —Kia heka wedu aõna aõna tarasadu rare. Rurukre, idi tahe iaõna aõna inydeerenykre. ¹⁵ Tahe rimyrenyre idi rirubunyrenyre tahe idi rehurenyre oworu-ribi. Jesuisi rityỹñaxinyre: —Aõhebo tahe oworu wedu rotỹñnykre. Tai Jesuisi ixityre narybede: ¹⁶ —Tii kanakre oworu-di itxeredu mahãdu hudumy, tai tahe oworu rityhekre iny witxiraõ-ò. Kia-ò tiiboho roholareu, tahe raryberenyre. Timyki tukõna. ¹⁷ Jesuisi idi reny retehemy tahe rarybere: —Ritina-di aõbo tariaõletenyte kia ryberiti:

—Mana-di hetowidỹñdu rehura. Kia mana heka hetohàtxi-ki heridu rare.

¹⁸ Inyõ kia manatyre resekeki, kia urile raoroorokre. Mana tahe inytyre resekeki, kia urile risyrisynykre.

¹⁹ Bede ywina erydỹñna mahãdu, tule xiwena wahidỹñna mahãdu wedu rimykeny riwisyñnyre ki-aule. Brebumy ta turenynkõre. ²⁰ Tiiboho hãbubinaõ riòwynyre tamy imynamy irybe-ki. Tai tahe Din-odu-ò riwahinykremy aõsirakõmy timykibo iru-taõmy rirybewitxiranyrenykemy. ²¹ Tiiboho rary-

bere Jesuisi-ò: —Erydÿÿdu, jiarÿboho araerymy adi watximahãrenyre kai inatyhy hãbu tate. Iny ibutumy adee wiwese wiweselere. Inatyhymy iny-ò Deuxurymy teerynanyamahâte. Tahe ti-iboho ritÿÿraxirenyre: ²² —Awire aõbo ada ib-inare aõbo nieru rawahinymyhÿre bede dinodu-ò. Timybo tahe, imposto raòwymy aõbo ada aõkõre aõbo. ²³ Jesuisi rierymyhÿre tõhõtinanareny, tahe ritÿÿraxinyra: —Aõherekibo kaiboho tiwaurihiteny-teri. ²⁴ Wadee womati nieruõ bidiwy waitxer-enamy. —Kawe moõ tyytarasana rare, katahe moõ tyyritina rare. Tiiboho dirawyònyde: —Kiahe bede dinodu hõrõ rare. ²⁵ Jesuisi rarybere: —Hÿdebo, bede dinodu hõrõ tahe tamy biwahiny-beny, tule tahe Deuxu aõna aõnahõrõ Deuxu-ò bi-wahinybeny. ²⁶ Tiiboho aõkõre. Irybe-ki riny-namy aõkõ. Urile ribedeòtiinyre.

²⁷ Saduseu mahãdu tamy nade. Kia heka iny rubu-ribi rexixamy aõkõre-riki rierynanymyhÿre. Tiiboho ritÿÿraxinyre Jesuisi: ²⁸ —Erydÿÿdu, Moisesi raritinyre bede ywina-ò, kaimy:

—Hãbuõ rurukeki, tahãwyi iriòre ijõdiõkeki, tahe
kia hãwyi tahãbu seriòre-wana roike.
Iriòredikre taseriòre rubuòwymy roikre.

²⁹ Seriòre debòinatxi reuròmý raremyhÿ. Juhuu ijõ roire hãwyi-wana. Tahe tii rurure iriòreõlemy.

³⁰ Tahe ihewoludu iseriòre wytese-wana roire. Tii rurure iriòreõlemy. ³¹ Ihewoludutyhy tule

ibutumy roire wytese-wana, tahe ituerenyre iriòreõlemy. ³² Iròòbymy tahe hãwyi tule rurure.

³³ Ixixanau tahe mohãbubo tii-wana rarekre. Ibutumy dori wytese-wana roire. ³⁴ Jesuisi

rirawyònyre: —Kabede-ki hãwyymy iny roimyhÿre.
³⁵ Ixixanabedeu heka moõ roiòtyhy, inyõ dori bede
kia riòbynykreu. ³⁶ Ibutumy iny ýju wese rarekre
biu bede-txi. ³⁷ Moisesi tatyriti itÿnyhÿkÿlemy
rarybere: —Iny rubu-ribi kedexixakremy. Tai
ta heòty òwòru sòmo riworonymyhÿki ixbyblyesÿ
rarybera:

—Deuxu heka Abraõ, Ijai, Ijaò kia Deuxu rare.

³⁸ Tai Deuxu inyru mahãdu Deuxu dori
rare. Iny rubu mahãdu ta aòkòre. ³⁹ Inyõ
rarybere: —Arawyònakyhyna, Wanyrÿ Tate. Bede
ywina tabohe teertyhyte! ⁴⁰ Tai tahe ixbyby
rÿÿraxiòhyrenyre.

⁴¹ Jesuisi rarybere: —Timybo bede ywina ery-
dÿÿdu mahãdu rarybemyhÿre Kristu Davi riòre
raremy. ⁴² Davi rarybere aõmybo Deuxu Tytyby-
tyhy tamy narybedemy iwiuna-ki:

—Wanyrÿ rarybere Wanyrÿ-ò:

—Bodony warurunawe-ribi.

⁴³ Txiòhe inihe, aòludu awarawo-txi aritidikre.

⁴⁴ Tahe Davile tanyrÿmy rininire. Timyki tahe
Davi itybymykre.

⁴⁵ Tii taerydÿÿna mahãdu rierynamyhÿreu.

⁴⁶ Tii rarybera: —Bexiemyhÿbeny bede
ywina erydÿÿdu mahãdu lau. Tiiboho heka
tyyrehytyhywidihikÿle rexitynymyhÿrenyre.
Tiiboho heka ixi rybedÿÿluurenyre hãwã riraki.
Dohodÿÿna heto-ki ryanawi luurenyre. Tule ta
anarÿÿ rÿi-wana, tyhytyrekile ryanana tamyreny
awire. ⁴⁷ Tiiboho tule wytese aõ aòkò mahãdu
aõna aõna ritamyhÿrenyre. Ixitòedÿÿna rehehekÿ

rexitòenymyhỹrenyre. Tiiboho heka aõnihikỹmy aõhõkỹmy dỹỹnanamy rotỹỹnyrenykre.

21

¹ Jesuisi retehemy rỹimyhỹ dohodỹỹna heto nieruhyna-txi. Tii retehere tibo iny tanieru-di rehumyhỹdi. Tai inieru sõwe mahãdu nieru sõwemy ritidimyhỹ. ² Tule tahe nade wytese aõ aõkõ mahãduõ. Tii inatxi nieru sõmo-di rehure. ³ Tai Jesuisi rarybere: —Kowa heka wytese nieru-di rehure ibutumy iny witxira ratyre. ⁴ Ijõ mahãdu tanieru uhedile rehumyhỹ. Tahe wytese idi rehure ibutumy tanieru-di rexihumy taumy-ribi idi rehure. ⁵ Dohodỹỹna hetomy ierydỹỹna tamy rarybere: —Erydỹỹdu, beteheke mana wihikỹ ruxera ruxera-di eryna heto riruxeranyreridi. ⁶ Jesuisi rirawyònyre: —Kaiboho betehebennykre hetonihikỹ-ò. Kia heka mana ijõ wityre-ki rỹiõtyhy, ibutumy heka kedejuxunykre. ⁷ Tiiboho ritỹỹraxinyre. Tiubohe ibutumy kidiixixãwididỹỹnykre. Tiiboho ibutumy bede konanadỹỹnamy reakre. Timybohe arieryrenykre, aõma bede ibutumy rexi-hukre. ⁸ Jesuisi tamyreny rarybere: —Kaiboho anaitxenanydenyheny lau bexiebenyke. Sõwemy dori rỹikre wanimy rarybemy rarekre: —Jiarỹ dori Kristu rare. Tahe iny sõwemy itxenadỹỹmy reakre. ⁹ Kaiboho wounarybe-ò, aõbina rybe-ò, boholakreu, breburenyõmykre. Kia heka kanakremy ratximyhỹre. Urile bededỹỹnana ikonanatyhy aõkõ rare.

¹⁰ Tii tamyreny rarybere: —Uritere iny lahinareny, ijõ lahinareny widee kanaaõbinanykre. Tule iòlòna mahãdu, ijõ

iòlòna mahādu-wana widee kanaaōbinanykre.
¹¹ Bede bedesu ijō hāwā-ki kanamytatakre. Tahe aōkōre rama kedeakre. Kia heka juhu aōhōkỹmydỹñana rarekre. Aōbrebuna brebuna kỹnyikre. Idi biu-ki aōwitzira kỹnyikre. ¹² Tiiboho arawahinyrenykre aòludu wedu-ò, iòlò-ò. Kaiboho heka aōhōkỹmy iu botỹñnybenykre, watyhydỹ òraru-ki. Tiiboho arahatenyrenykre dohodỹñna hetowo-ki. Kiabohoko-txi wadee kaiboho kedelyykre inatyhymy aōna aōna rỹiremy. ¹³ Rybewihikỹmy ibutumy bede bede hāwā hāwā-ò belyybenykre. ¹⁴ Tiubo aradyrenykeu, urile nohōtiōmy aōmybo kaiboho marybebenykre. ¹⁵ Kiautyhyle aōmybo marybebenykre my bierykre. Kia tahe marybekre. Kai aōkō dori marybekre, Deuxu Tyytybytyhy tahe rybedukre. ¹⁶ Asỹreny dori ròtenawo-ò araròtenyrenykre. Seriøre seriørele wii kidirubunykre. Tyby heka tariøre kidirubunykre. Uladule tadi, tyby kidirubunykre. ¹⁷ Ibutumy heka iny iy kedeakre wani òraru-ki adeereny. ¹⁸ Ibedeu araderenytiō reseōtyhy. ¹⁹ Bexityhymy ta tai ixiery dori biu-ò mahenybenykre. ²⁰ Ijō tahe Jesuisi rarybere: — Woudu mahādu Jerusalē rirurawonykreu heka bierybenykre aōhuluhudunamy bede rỹirerimy. ²¹ Judeia hāwā hāwā-ki ratxikeki, mahenybenykre bederatòhòkỹ-ò. Inyō Judeia hāwākikeki, iribi òlò rỹikre. Idi inyō bederokeki ixyby Jerusalē-ò ròteōmykre. ²² Kia txuu heka òwynatxumy rare. Ibutumy rybe tyyriti myna heka bede rỹikre. ²³ Kobexe heny hāwy bòtòmy rỹira, tule hāwy tariøre ritònymy rỹira. Aōhōkỹmydỹñana kanakre

tiu heka tuuõre. Debure nihikỹ heka kanake kia iny tyre-ki. Tiu heka kiamy bede roiõtyhy aõhõkỹmydỹỹnanamy. ²⁴ Sõwemy iny rurukre mayrehe-di. Iny sõwemy radykre ijõ bede-ò aõhõkỹmy tai rotỹỹnykremy. Ityhydỹỹdukõdu mahãdu rasỹnykre Jerusalẽ hãwã-ki iu.

²⁵ Ixityre tahe Jesuisi rarybere: —Idi webòhòna rỹira txuu, aõhõkỹmydỹỹnana itue-di, txuu heka rurunykre. Ahãdu tule rurunykre, tule taina. Beòbò lau iwodỹỹ lau ibutumy iny ruberukre ini-hikỹ òraru-ki. ²⁶ Iu bede bede iny mahãdu aõhebo rotỹỹnymy, tatõhõtibre-di tiiboho reserenyre su-tyre-ki tai. ²⁷ Iny retehekre

Deuxu Riòre, Hãbutyhyhykỹ dehemynyna-di. Biu-rawetyky-ribi kodobehekre tatyhy-di.

²⁸ Tahe kia aõmydỹỹnana rỹikreu, ywinamy bòibenyeke, iòhòlereri.

²⁹⁻³⁰ Tai tahe Jesuisi figueiraò-wana tahe bede ròkewesenanyre: —Figueiraò-di ini bexinohõtinybenyeke. Tii heka tairu-txi, tanoiròsò ritỹmyranymyhỹreu, tai tahe bierybenykre wyra iòhòlereri. ³¹ Tule kia aõna aõnamy bobibenyeke, tii iòhòlereri. Ijò-ki iòhòwesele rỹire. ³² Inatyhymy adee ararybekre, kia wijinabòdu itueõtyhy aõna aõna rỹikre hãrele. ³³ Biu, bede-wana ituekre, tahe warybe itueõtyhy.

³⁴ Tahe Jesuisi tarybe rihumy rarybere: —Kaiboho bexiebenyeke, betehebennykre ixinohõtidiỹỹrenythykõmy. Roxina worana bedehesi-di timybo kaiboho atximyhỹtenytedi. Mona juberere biõbenykemy mohõtinyõke. Kaiboho dori teeryõtenyete tiubedemybo

adòòsekre. ³⁵ Kiatxu kanakre tahe iwese nawii mynyna wese aõwesele rimykre ibutumy bedé iny mahãdu rimykre. ³⁶ Biebenyke tahe, Deuxu-ò bexitòdenybenyke. Kia tahe aõhebo rotỹnykre-ribi mahenyke. Bityhynyke Deuxu Riòre, Hãbutyhyhykỹ, jiarỹ wahe.

³⁷ Txuõ txuõlemy tii Dohodỹỹna heto-ki ribedeerynyre ihãre tahe rumy Oliveira hãwãlò-ò rara. ³⁸ Rudile tahe sõwemy iny dohodỹỹna heto-ò rehemynymyhỹre Jesuisi rybe-ò ijohomy.

22

¹ Iòhòmy ratxireri Pascoa worana bedehesi kodohònykremy. Kia anarỹỹ wehityhynamy heka iny ratya-di reare. Tule orotxu anarỹỹ kia ròhònyre. ² Deuxu aõmysỹdỹỹdu wedu mahãdu, tule bedé erydỹỹdu mahãdu Jesuisi rimykemý ratxireri idi rirubunykemy. ³ Satanasi heka Judasi Isariòwo-ki ralore, tii Jesuisi erydỹỹnaò ihỹre. ⁴ Juda Isariò heka Deuxu aõmysỹdỹỹdu-ò rara Jesuisi riwahinykemy. ⁵ Tiiboho tamý roholarenyreu, reysare. Tahe tamý nieru riwahinykemy riurenanyre. ⁶ Tahe Juda riijemyhỹre aõu aõu bedewihikỹ tamýreny riwahinykemy. Wasimý riwahinykemy tii roholare.

⁷ Juhu orotxu anarỹỹtxure budoeni xiweloo rirubuny rahudi tahe Jesuisi erydỹỹna mahãdu tamý rarybere: —Titxibo anarỹỹ rỹsỹnamý biroxikemy atxiteri. ⁸ Tahe Jesuisi heka Pedro, Joaõ-wana riteònyre: —Kaiboho boike iny rỹsỹnareny ywidỹỹmy. ⁹ Tiiboho rỹrãxire. Titxibo ariywinyrenykre? ¹⁰ Jesuisi tamý rarybere: —Kaiboho boikre hãwãhãkỹ-ò. Tahe hãbu-wana

wii biòbnykre butxi-di retyyleriò. Tahe tii biheludunybeny. Titxibo heto-txi ralokreò, kaiboho tule bironybenymy bitỹĩraxinybenykre heto wedu: ¹¹ —Wawedureny rarybera: — Titxiwexe anarỹĩ rỹsỹna arirỹsỹkre waerydỹĩna mahãdu-wana. ¹² Tii heka adee kiditeòsinykre hetowoõ-txi biu-ki. Ibutumy rexihumy rỹire inydeereny. Tai rỹsỹna inydeereny biywinybenykre. ¹³ Tahe ierydỹĩna rexitare. Roire hãwãhãkỹ-ò. Tahe rotỹĩnyrenyre Jesuisi rybe myna. Tahe ibutumy rexihurenryre anarỹĩ-ò.

¹⁴ Kia txu rimyreu tahe Jesuisi nade taerydỹĩna waòinatxi reurò-wana byremy ronyrenykremy. ¹⁵ Tii tamyreny rarybere: —Jiarỹ awanareny ariroxikemy watxiwãhãre. Karibi dori warubuna-ò arakre. ¹⁶ Inatyhymy ararybekre: —Jiarỹ konanamy ayreny-ki ariroxikre. Ixyby ta Deuxu Iòlònakile tahe rikiroxirenykre. ¹⁷ Tahe vĩ mona hyna rimyre, rexitòenyre, tahe tamyreny riwahinyre. Ibutumy ibute bute iribi tuu riòrenyre. ¹⁸ Inatyhymy ararybekre: —Tiu ixyby tuu ariòõtyhy Deuxu Iòlòna-ki kotyre. ¹⁹ Tiiboho roroxireriu, Jesuisi orotxu rimyreu, raorore, rexitòenyre, tahe tamyreny riwahinyre. Rarybere: —Ahãxe, kia heka waumy wese rare. Iu biroxikey, warubuna-di mohòtinybenykemy. ²⁰ Biòbenyke! Kaa dori wahãlubu wesemy ratxireri. Tahe tamy riwahinyre riòrenykemy. Tai sòwemy iny ròhònyke biu-ò hena-ò ibutumy òraruna ixãwididỹĩmy. Tuu ròhònyra. Kia heka wadeewimy iny Deuxu-wana ratxiinyhỹre, wahãlubu òraru-ki. ²¹ Boholabeny inihe watyhedỹĩdu inykyrenykile

ronyre. ²² Iwese tyyrity-ki roire wese heka arurukremy, Deuxu Riòre, Hãbutyhyhykỹ, jiarỹ wahe. Kobe làhàxe watyhedyỹdu. ²³ Tiiboho tahe widee rarybere: —Mobo tahe rare? Mobo Jesuisi riwahinykre.

²⁴ Iribi tahe widee raryberenyre, mobo wiratyreremy? ²⁵ Tahe Jesuisi tamyreny rarybere: —Kabede iòlò mahãduy-ki iruru dire. Bede dinodu tahe iny rininire: Iny biòwa. ²⁶ Tahe ayreny-ki kawese aòkò ihỹre. Inihikỹtyhy inyõ ratxikeki, tii inyuhe deòdumy ratxikre. ²⁷ Tibo inytyhy rare? Roxidu mahãdu ada deòdu mahãdu? Roxidu mahãdu, aõhe inatyhy? Jiarỹ tahe ayreny-ki deòdu wesemy jiarỹ rare. ²⁸ Kaiboho heka wawanahyy atxitenyte aõhòkỹmy ratỹnymyhỹreu. ²⁹ Tai tahe adee ruruna ariwahinykre. Iwese Waha wadee riwahinyre wese, adee ariwahinykre. ³⁰ Waiòlòna-ki kaiboho wawana biroxi benykre, biõ benykre. Tule rynana wiwihikỹ tyre-ki rỹdu mahãdumy bony benyke. Israeli iny mahãdu heka kaiboho biòbitiny benykre, ibutumy judeu mahãdu wahe.

³¹ Jesuisi ijõ rarybere: —Simaõ, Simaõ, wadee boholatyhyke. Satanasi araurihirenykemy wadee rexitòenyre. Tahe adeereny kanake araurihidyỹmy. ³² Dori rexitòenymyhỹre, Simaõ, kai bityhynyhykemy. Wadee bòdòòsekeu, abiòwa mahãdu biwiòhenanyke. ³³ Tahe Pedro diwyònyde: —Awanahyy arakre, wanyrỹ, arurukre hãre, ròtenawo-ò arakre hãre. ³⁴ Jesuisi tamy rarybere: —Pedro, kai biwatxiõnyke, hãnie hãbu ryrykõule biwatxiõnyke inataõmy.

³⁵ Jesuisi tamyreny rỹřraxire: —Juhu arateònyrenyreu anieruhynakõmy, asaurenykõmy, awarenyõmy, adeereny aõbo aõ rasiranyre? Tiiboho dirawyòmý: —Aõkõ, aõ rasiranyõhyyre.

³⁶ Tahe Jesuisi narybere: —Wiji tahe txibo inyõ inieruhynadikeki, saudikeki, biwykre. Txibo inyõ imayrehedikõkeki tayhyitxena-di rohonykre iòwy-di tahe tii riõbranykremy. ³⁷ Kamy dori Deuxu rybe tyyriti-ki roire:

—Òbitikõmy nodu mahãdu-wana tii rỹire.

Ibutumy timybo tyyriti wamy rarybere heka rỹikre. ³⁸ Tamy ierydỹřna mahãdu rarybere: —Wanyrỹ, kaa inatxi mayrehe rỹire. Tahe Jesuisi rỹire rarybere: —Awire kia.

³⁹ Tahe Oliveira hãwãlò-ò roirenyre, taerydỹřna mahãdu-wana. ⁴⁰ Tiiboho kowa-ò rehemynyre, Jesuisi rarybere: Bexitòenyke! Tai tahe òraruna-txi beseõke. ⁴¹ Tahe iko-txi urihimýò rareu, taowotimy resemý. Rexitòenyre: ⁴² —Waha, adee arexitòenykre. Adee awikeki, aõhõkỹmy dỹřnana waribi biixãwidỹřnyke. Tahe adeewikomykre, wadeewi ta aõkõre. ⁴³ Yjuõ tamy nade biu-ribi tamy ruru riwahinyre. ⁴⁴ Sõwemy tahe rexitòenyre, iòsana-ribi resere bee wahe. Hãlubu wese heka ihỹre resereri bede-ò. ⁴⁵ Tii rehemynyre tai rahare rõrõrenymý roireriò. Tiiboho ele risarenyre sõwemy rabadeworenyreki. ⁴⁶ Tamyreny rarybere: —Aõherekibo tarõtenyteri? Biijebenykre, bexitòenykre.

⁴⁷ Tii rarybereriu, aõwesele Judasi nade. Tii-wana doide hãbu mahãdu. ⁴⁸ Jesuisi rarybere Judasi-ò: —Judasi, Deuxu Riòre bityhenykre

aõbo, jiarỹ hãbutyhyhykỹ wahe? Waòbuò-di aõbo biwatyhenykre? ⁴⁹ Jesuisi erydỹỹna mahãdu tuu robireu, tamy rarybere: —Iny mayrehe-di araaõbinanyrenykre, Wanyrỹ. ⁵⁰ Kia ijoiõ mayrehe ritare tahe Deuxu aõmysỹdỹỹdu wedu deòdu nohõti riorore. ⁵¹ Tahe Jesuisi rarybere: —Ixãwike. Tahe hãbu nohõti riteytenyre. ⁵² Tahe Jesuisi dirawyònyde tamyreny, Xiwe wahidỹỹdu mahãdu-ò, dohodỹỹna heto itxedu wedu-ò, matuari mahãdu-ò: —Kaiboho mayrehe-di, òhòte-di tiwaòrytenyteri jiarỹ wasiduòrys wese. ⁵³ Jiarỹ tahe dohodỹỹna heto-ki watximyhỹ txuõ txuõlemy adeereny anaerynanymahãdenyde. Kowa-ki heka tiwamyõlemyhỹtenyte. Kia heka bededỹỹnana rexihure. Bede luru ruru roirerimy. Tahe aõbo iritina-ki rỹireri, kia heka kỹnyikremy.

⁵⁴ Xiwena wahidỹỹdu mahãdu dinodutyhy-ò wedu-ò tiiboho Jesuisi ridyrenyre. Pedro rihe-ludunyre ireheriòremy. ⁵⁵ Rehemynyreu tai Pedro ixitòteenymy heòtywera-ò ronyre heto itxeredu mahãdu-wana. ⁵⁶ Pedro ratximyhỹ-ò tahe deòduõ rehemynyre, ijadòma wahe. Pedro-di ijadòma retehem y ta rarybere: —Tii tule Jesuisi Nazare-ludu-wana ratximyhỹre. ⁵⁷ Tahe tii rexitxiõnyre: —Jiarỹ reeryõre aõmyboho kai tarybeteri. ⁵⁸ Ixybyle kowa ijoiõ Pedro-ò rarybera: —Inatyhymy kai ijõ mahãduleõ tate. Tii inatyhytyhyrybemy rarybera: —Jiarỹ reerykõre hãbumy tarybetenyteri. ⁵⁹ Ijõ òrau tahe ijõ rarybere: —Inatyhy rare kai Jesuisi-wana ahãte, Kalileia mahãduõreki. ⁶⁰ Tahe Pedro rarybere: —Hãbu, reeryõre aõmybo tarybeteri! Tahe hãnie hãbu robura. ⁶¹ Jesuisi heka Pedro-ò

retere. Tahe Jesuisi rybe-txi Pedro tōhōti reare. Iwese Jesuisi rarybere: —Hānie inataōmy robukre myna, kai waheludumy bedexitxiōnykre. ⁶² Pedro tahe iribi rexitareu, ixidee iky reamy rahinyre.

⁶³ Tahe hābu mahādu Jesuisi rihetenymy, rilahirenymyh̄yre. ⁶⁴⁻⁶⁵ Tiiboho riruehetynymy rihetenymy idi rit̄ȳraxȳnymyh̄yre: —Mowe arahātenyra. Idi tahe sōwemy idi risinymyh̄reny.

⁶⁶ Rudile tahe judeu wedu mahādu ributunyre xiwena wahid̄ȳna mahādu-wana. Jesuisi ridyrenykemy raryberenyre dohod̄ȳna mahādu-ò. ⁶⁷ Tamy rit̄ȳraxȳnyre: —Kai aōbo Kristu tate, Deuxu Riòretyhy. Jesuisi rarybera: —Jiar̄ȳ heka kohemy ararybekeki, kaiboho biwatyhynyōtyhy. ⁶⁸ Adeereny ar̄ȳraxȳkeki, kaiboho biwawyònybenyōtyhy. ⁶⁹ Kaiboho bierybenykre

Deuxu Riòre heka jiar̄ȳ rare. Idi Waha rurunaw-eribi-ò aronykremy.

⁷⁰ Ibutumy tahe tamy rarybere: —Kai aōbo Deuxu Riòre tate? Tii rirawyònyre: —Iwese kaiboho tarybetenyteri wese jiar̄ȳ inatyhy rare. ⁷¹ Tahe tiiboho raryberenyre: —Inyō irybe-ò ijohoke heka aōkōre, inybohoke dori tuu roholarenyre.

23

¹ Kia iny ka ibutumy Jesuisi ridyrenyre Pilato-ò, bedē dinodu-ò wahe. ² Idi tahe aōbina binahak̄ymy tuu raryberenyre: —Kahābu heka bedē rijeijeinyreri iòlōmy ijoi radōnykemy. Iribi iòlò-ò òwyd̄ȳ r̄yiōmyh̄ykemy rarybere. Ihāreta Deuxu Deòd̄ȳnamy raremy idi iòlōmy rexininimyh̄yre.

³ Tahe Pilato r̄ȳraxȳre Jesuisi-ò: —Inatyhywe kai

Deuxu mahādu iòlòtyhy tate? Tai tahe Jesuisi riwyònyre: —Kai tuu tarybeteri, Wanyrỹ. ⁴ Tai tahe Pilato rarybere xiwe wahidỹỹdu mahādu dinodu-ò, tule inysòwe mahādu-ò: —Timyki kahābu aòhòkỹmy wasỹdỹỹòna, aòò bina dori riwinyòlere. ⁵ Tai ixyby idi risỹnyrenyre: —Kahābu heka Kalileia bederibi bederijeijeinymy rareri, idi Judeia bededi tule katahe kakile tuu rotỹỹnyre. ⁶ Taita Pilato rỹỹraxire: —Tii aòbohe Kalileia mahāduò ratxireri? ⁷ —Tii Kalileia mahādu rare. Kia Pilato rieryreu, Herodi-ò riteònykemy rexinohòtinyre. Tii kia dinodureki. Ihāreta Herodi Jerusalē hāwā-ki iu ratximyhỹ.

⁸ Herodi Jesuisi robireu heka reysare. Jesuisimy robikemy riwisỹnymyhỹre sòwemy. Idi tahe tuu robireke, reòsare. Tai tahe reysare. Ini-ò roholahyymyhỹre. Tule aòwihikỹ witxira riwinykemy idi riwisỹnymyhỹre. ⁹ Idi tahe Herodi sòwemy rỹỹraximyhỹre. Jesuisi tahe rirawyònyòhyyre. ¹⁰ Aòbo xiwena wahidỹỹdu mahādu wedu, tule beder ywina erỹdỹỹdu mahādu sòwemy aòna aòna binamy tuu raryberenyre. ¹¹ Herodi tasoldado-wana tuu raòhòtemy idi risinymyhỹreny. Tyywihikỹ-di rirahananyrenyre. Iribi riòkesedỹỹnyre Pilato-ò. ¹² Juhuu heka Herodi Pilato òludumy widi raremyhỹ. Kia txule tahe wídee rowoixirenyre.

¹³ Idi tahe Pilato tahe ibutumy xiwena wahidỹỹdu wedu, tule matuari mahādu tule ijò iny mahādu ributunyenyre. ¹⁴ Tamyreny rarybere: —Kaiboho heka wadee tedytenyteri beder jei jeiwidỹỹdumy tuu tarybetenyte tebutenyteri heka. Jiarỹ akoreny-ò retỹỹraxinyre idi aòhe tai ibinamy

rahaõhyyre. ¹⁵ Tule iòlò Herodi tai ibinamy rahaõhyyre. Tai diòkesedỹỹnyde. Tai iurenana ta aõhereki timyki irubuõna. ¹⁶ Urile raõhòtedỹỹkemy bedede reywinyre idi ta ixinamy rakre. ¹⁷ Kiemy dori worana bedehesiu, ròtena-ribi inyõ heka ròhònymyhỹke. ¹⁸⁻¹⁹ Sõwemy iny heka rirajuare: —Aõkõre uritere ta Baraba biteònyke. Kia hãbu urile ruruke. (Baraba inyrubudỹỹdure. Bede jei jeidỹỹ-ki heka ròtena-ò ralore.) ²⁰ Tai Pilato Jesuisi òlòdỹỹmy riwisỹnymyhỹ tai ixyby rarybere: —Aõkõre Jesuisile ariteònykre. ²¹ Sõwemy iny ixyby ryryre: —Aõkõre, itxeò-ki bitamadỹỹnyke! ²² Tahe Pilato tainatãõnamy narybede: —Aõherewe, aõwe tii ibinamy riwinyre. Aõheka tai ibinaõhyyreri rubu-ò rawahikemy. Òhòteòle ta arawahinykre idi ariteònykre. ²³ Ihãre ta iny sõwe mahãdu ire rirajuamyhỹreny itxeò nihikỹ-ò rurukemy. Ixieryta iryreny-ò roholare idi tukremy. ²⁴ Iu Pilato heka Jesuisi riwahinyre rubu-ò tumyna rexitòenymyhỹrenymy. ²⁵ Ijõ hãbuõ ta ròtenawo-ribi riòlòdỹỹnyre, iixitòedỹỹreny myna wahe. Tii hãbu aleerydu rare, tahe bede jei jeidỹỹdu tule. Iwana ta Jesuisi rawahire irybemynarenymy aõhebo rotỹỹnykre.

²⁶ Tahe Jesuisi ridyreny. Ryki tahe hãbuõ iutedereny-ò nade, Simaõ inire, Sireni hãwã ludu wahe. Nohõtiõlemy ta ityre itxeò nihikỹ ritidi-reny, iherenymy idi kanakremy.

²⁷ Sõwemy ihemy nodu sõwe. Iy-ki hãwyy mahãdu Jesuisi-di robumyhỹreny. ²⁸ Tii tahe tamyreny rexiòkesemy narybede: —Jerusalẽ hãwã ludu hãwyy mahãdu! Ixirahi bobubenyke

ariòre rahi tule warahi ta aòkòre. ²⁹ Tiutxumybo bexirybenybenykre: —Hãwyky bedekòby heka raritxòrenyköre mahãdu rare, tohokuã ritònyköre mahãdu tiku kuladu-di tarukikòre mahãdu. ³⁰ Tiutxumybo

bexirybenybenykre hãwãlò-ò: —Watyrereny be-deseke

tule hãwãlò riòre-ò bexirybenybenykre: —
Biwawòbenykre.

³¹ Wiji kawesemyhÿre hee itukure hãre. Timykrebo tahe hee irubukreu.

³² Ihãre tasÿse iny inatxi hãbu òbitimy nodu aòkò ridyrenyre Jesuisi-wana rururenykremy.

³³ Tahe hãwãlò riòre-ò ratitybymy ninadu-ò rite-hemynyreny. Tahe tii-wana inatxi wasidu itxeò nihikÿ-ò rilamadÿÿnyreny. Ijò ruruw-eribi-ò ijò hyweweribi-ò. ³⁴ —Waha, idireny bexiruxetòenyke rieryòhyrenyreri dori aòmybo ro-todÿÿnyreri.

Tai tahe ityy wimy ritxuatxuakremy dado-di re-humyhyÿreny tibo iwydydukremy.

³⁵ Iny retehemy rÿimyhÿ taile wahe. Judeu wedu mahãdu tule Jesuisimy rarybere: —Tii iny sòwemy rihedÿÿnyre, kia aòherekibo tii rexitaòreri rubu-ribi, tii Deuxu deòdÿÿna rarehãre. ³⁶ Tule soldado mahãdu rarybere aòbina binahakÿlemy. Diwyde tii aõna ta iny kremy rirahòreny tamy idi reare rijeny: ³⁷ —Kai inatyhymy judeu mahãdu iòlòm atxiteri wana heka kaa bexitakre iribi. ³⁸ Itxeò ratya-ki tahe aõma timy roire tyyritidÿÿna.

—Kaa Heka judeu Mahãdu Iòlò Rare.

³⁹ Ijõ heka rarybereri Jesusibire-ki roireriõle tamy rarybereri: —Deuxu deòdỹyna tateki, bex-
itake tule biwatabenyke. ⁴⁰ —Wy, Deuxu lau
taberuõlemahãte aõbo tule dori iny aõhõkỹmy
rokotỹỹnykrelemy iny roireri. ⁴¹ Lõwudu tamy rary-
bereri: —Iny heka rurureri, aõbina binahakỹ iny
riwinyre òraru-ki. Iny rurureri. Kaa hãbu rỹire
tiu aõbina riwinyõhykyre. ⁴² Jesuisi-ò rarybere:
—Jesuisi, watxi õhõti beakre Iòlõmy bonykreu.
⁴³ Jesuisi tamy rarybere: —Wijile heka biu-ò heka
rakakre.

⁴⁴⁻⁴⁵ Txutyemy bedede roronyre idi txioro txu re-
hehekỹ-ò bedede tuu rỹire. Inataõ òramy bedede ry-
bynyre, rỹire. Heto-ki rahanaheridu urile raykare
templo-ki wahe. ⁴⁶ Tahe Jesuisi rirajuare: —
Waha, watyytyby adee rawahinyreri. Iu irybe
rexihureu rurure. ⁴⁷ Soldado mahãdu wedu tuu
robire kia aõhebo rotỹỹnara tuu rarybere: —Kia
inatyhymy hãbu òbitityhy rare. ⁴⁸ Ibutumy iny
kia robire Jesuisi rubu-ò rahinyumy ròðsere rexi-
hetenyrenymy tabreti-ò. ⁴⁹ Ibutumy tii mahãdumy
ratximyhỹre iribi ireheriòremy rexiijemyhỹ.

⁵⁰⁻⁵¹ Tii judeu bedede mahãduõ rare. Jyjemy inire.
Tahe Kristu rubuna-ki awimy rahaõhỹỹre taijoi
mahãdu-ribi. Tii dori Deuxu Iòlõna riraõmyhỹre.
Ihãwã Arimatea inire. ⁵² Tai ta rare ixitòedỹỹmy
Pilato-ò, Jesuisi umy kidiwahinykremy. ⁵³⁻⁵⁴ Tai
tahe ritare itxe-ò-ribi tyy ura nihikỹ-di tyy-di
ritỹtetỹtenyrene. Manawabedewo-ò ritidire. Tai
tiu iny rahãloonaõmyhỹre. Aõma judeu mahãdu
elehyna txu wahe ixiywidỹỹnatxumy txu rỹireu
heka aõma worana bedehesi txu. ⁵⁵ Hãwyy
mahãdu Kalileia-ribi Jesuisi-wana. Tiiboho

doide Jyje-wana Jesuisi hãloo-ò itxeremy. ⁵⁶ Tahe timybo roimyhỹ riòtudunyrenyre. Dòòsedenyde iribi aderòna lỹnyre ywidỹỹmy iumy tỹnyrenamy.

Kia rexielehynyrenyre sabado txu bede ywidỹỹna myna-di.

24

¹ Juhu txu semana bededỹỹnanau txuu deadeu hãwyy roire wabede-ò. Tiiboho riwyre lỹnyrena. ²⁻³ Rehemynyrenyre, mana nihikỹ tahe ijò-ribi ratamy rỹire. Tahe ralòrenyre, Jesuisiumy ihoõhyyre. ⁴ Wabede-ò rirònyrenyre, robirenyre inatxi hãbu. Ityy urahakỹmy rononymhỹre tai. ⁵ Tahe tiiboho bede riòtiinyrenyre idi tabrebu-di suò reserenyre. Yỹjyõ tamyreny rarybere: ⁶ — Iny irumy kaiboho teijeteri kaki wabede-ki aõbo? Tii kaki ratxireri. Tii rexixara rubu-ribi adeereny rarybere wese Kalileia bede-ki: ⁷ — Inyõ riwawahinykre inybina-ò Deuxu Riòre Hãbutyhyhykỹ. Itxeòtyre-ki arỹikre tai arurukre. Inataõ txu-di tahe rubu-ribi arexixakre. ⁸ Tahe hãwyy irybe-di rōhōtinyrenyre. ⁹ Wabede-ribi raijaranyrenyre Jesuisi erydỹỹna mahãdu-ò ijyymy. ¹⁰ Kia tiibohore: —Marie Madalena, Joana, Marie Txiause. Ijõ hãwyy tule tii-wana roirenyre. ¹¹ Iu tamy relyyre, rityhynyōlerenyre. ¹² Pedro tahe rỹimy reare idi raijaranyre wabede-ò. Urile tykylemy robire tahe dòòsede, rexiòtiinyre.

¹³ Itxuleu ta iny inatxi hãbu Jesuisi tyhydỹỹdu mahãdu tahe roirenyre Emau hãwã-ò. Jerusalẽ hãwã-ribi txibo 10 km wese irehere. ¹⁴ Ibutumy aõhebo rotỹỹnyramy wiko relyymy ròimyhỹre.

15 Iuleta Jesuisi tamyreny dehemynyde idi tiiboho-wana roire. 16 Tiiboho tuu robirehâre timykibo rierykôhykyrenyre. 17 Tahe Jesuisi rôtÿÿraxire: —Aõmywe widee tarybetenyteri. 18 Iijõreny Klopamy nidu narybede: —Kai sohojilewe Jerusalê-ki aõhebo bedede rÿira teerykõte. 19 Tii dotÿÿraxide: —Aõherabo ta. Tiiboho tuu relyyre: —Jesuisi Nazare ludu kie. Tii Deuxumy rybedu nihikÿ heka rare, Deuxu-ò dori ibutu iny-ò heka rybe-ki aõni heka aõmywidÿÿ-ki heka ihÿÿna rare. 20 Waxiwenarenny wahidÿÿdu wedu tahe wadinodureny itxeò nihikÿ-ò rurukremy riwahinyrenyre. 21 Tule judeu mahâdu tarasadukresÿna raholarennyre. Ihâreta tukõlemyta inataõ txumy rubu-ki bedede idi rÿira. 22 Bederarasò-di wajoiireny hãwyyõ ihãloo-ò roire. 23 Tai itxi rekoaõhyyre. Dòòsedenydeki tahe ÿjumy riki robirenyremy delyydenyde. Tii Jesuisi rubu-ribi rexixamy tamyreny rarybere riki. 24 Wajoiirenyõ tule ihãloo-ò roirenyre. Inatyhy rikihe rare. Urileta riki Jesuisimy robiõrenyre. 25 Tahe Jesuisi tyhy Klopaboho-ò narybede: —Aõherewexe Deuxu Rybedu mahâdu rybe awo-ki teximytenyteri tetyhynykõtenyteriki wahe. 26 Kialemy dori Kristu dori aõna aõnamy rotÿÿnykremy tai Deuxu riwowydynykremy. 27 Tahe Jesuisi rexidelenyre aõbo rybe ritina roiremy. Moisesi ryberiti juhuumy ritÿnynynyre. Timybo Deuxu rybe ritidÿÿdu raremy. Tiiemy heka iximyyhylye rarybere. 28 Ibutumy tamy relyyhyyre ramyhÿrehyy tahe ritehemyny Emau hãwã-ò, tai inatxi hãbu rarikreò wahe. Tahe

Jesuisi rarybere: —Aõkõ arexinoranykre. ²⁹ Tai ta tamy ihãrele rarybemyhÿre: —Txioinihe bodonyke kakile. Aõma bede ratxinyra ratxioronytyhyra. Taile tiiboho-wana rare ihetoreny-ò. ³⁰ Rorukurenyre riroxirenykremy. Tahe Jesuisi orotxu rimyre rexitòdenyre Deuxu-ò. Tahe orotxu riororiorore imynareny. ³¹ Iu tahe aõwesele rierymy reare Jesuisi. Tai iruereny raraymy rieryrenyre. Tahe aõwesele iõmy iribi reny reare. ³² Tai widee raryberenyre kiamy. Iu tii Ryberitimy inydeereny rydi relyyreu, urile wawo ratooteemy. Kai tahe. Ijõ diwyònyde: —Kohe jiarÿ tulere. ³³ Iribi tahe ritamanyrenyre. Diòòsedenyde ixbyby Jerusalẽ hãwã-ò. Tiu waòsohoji reurò erydÿÿna itxi rekoarenyreu. Tai tiiboho narybedenyde: ³⁴ Inynyrÿrenyhe rexixara. Pedro heka tuu robira: ³⁵ —Jiarÿboho tulerenyra wawanale ròirenyra rydi. Tule wadeereny orotxu riyreyrenyra. Taile reeryrenyre.

³⁶ Iu kiamy relyymyhyrele, Jesuisi dehemynymy deade ityareny-txi. Riryberenyre ibutumy: —Ywina heka akirenyke! ³⁷ Ibutumy ruberurenyre ilau. Urile raresÿny tamy raholarenyre. ³⁸ Jesuisi rarybere: —Aõhebo taberutenyteri. Breburenyõmyke hewa biwatyhynybenyke. ³⁹ Jiarÿle ratxireri. Wadebò-di bedetehebedenyke, wawa-ò tule. Jiarÿ karare wadee inihe bideribedeny. Jiarÿ uni aõkõ watxireri. Uni dori idedire aõkõ wawese aõkõre bedetehebedeny inihe. ⁴⁰ Tai tahe tebò wotõ mona, tawa wotõmona, riteòsinyre tamyreny. ⁴¹ Ihãrele tahe rityhynyrenyõre, ibedesamy bede

riòtiinymyhÿreny. Jesuisi tahe rexitòenyre tamyreny aõ rirÿsÿkemy. ⁴² Tamy riwahinyreny utura wòsi deyreõ. ⁴³ Rirasÿre ikorenyòle.

⁴⁴ Idi tamyreny rarybere: —Aõma wawanale ratximahãre, õhõtireny itxi reara. Aõma wawana atximahãtenyte juhuu. Ibutumy heka adeereny retÿnynymy rarybere aõmybo wamy rybe roimyhÿremy. Ibutumy heka Moisesi rybedu ritidÿÿnaki iritina-ki roimyhÿre. Wiuna tule wamy riritinyre. ⁴⁵ Tai tahe ritÿnynyre òbitimy irakyreny riraynyre. ⁴⁶ Ihetxiu rybe wãhã aõma Deuxu Deòdÿÿna rurukre heka aõhõkÿmy rotÿÿnykremy. Ruru-ribi inataõ txu-di rexixakremy bederoire. ⁴⁷ Kaa rybe wihikÿ ritidÿÿna heka kaa Jerusalẽ bedeki robÿtÿkre ihãreta ibutumy iny iny kõkõmy bede bedemy robÿtÿkre. Kiamy heka ibutumy inydee marybebenykre. Iny riwatyhynymy rÿirakre heka ibutumy iõraru-ribi ariixãwididÿÿnyke. ⁴⁸ Tule terytenyteri ibutumy aõhebo rotÿÿnykremy. ⁴⁹ Tahe adee ariwahinykre iwese Deuxu rarybere wesemy heka adee ariwahinykre. Kaki hewa matxibenykre hãwã-ki. Tahe kanakre heka adee ruruõ biu-ribi. Iribi tahe bõhõnykre karibi.

⁵⁰ Iribi tahe Jesuisi ridyreny Betÿniary-ò. Tai tahe rilàhànanyreny tuu tamy rexitòenyreny ibutumy tamyreny. Tamy rexitòenyreu heka ilàhànany tamy rexitòenyre biutxile ire rexidymy ramyhÿre rynanany ramyhÿre. ⁵¹ Iu rilàhànanyrehÿreny, biu-ò rare. ⁵² Tamy rexitòenyra aõma làhànany, wowydynamy rexitòenymyhÿre Deuxu-ò. Tai riwowydynamyhÿreny.

Teysa-di diòkesedenyde Jerusalẽ-ò ixyby. ⁵³ Tai
tahe Deuxu dohodỹỹna heto-ki ixyby ixyby
rowowydynanymyhỹrenyre.

Deuxu Rybe Tyyriti **New Testament in Karajá (BR:kpj:Karajá)**

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Karajá

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

PDF generated using Haiola and XeLaTeX on 11 Nov 2022 from source files
dated 29 Jan 2022

55ce0bcd-101e-52a3-984e-847027efe150